

欽定唐書

卷一百八十八之一百九十八


土岐文庫

文庫17

W202

27

二十七



文庫 17
W202
27

唐書卷一百八十八

宋 端 明 殿 學 士 宋 祁 撰

列傳第一百二十三

楊時朱孫

楊行密字化源廬州合肥人少孤與羣兒戲常為旗幟戰陣狀年二十七入盜中刺史鄭葵捕得異其貌曰而且富貴何為作賊縱之與里人田頴陶雅劉威善僖宗在蜀刺史遣通章行在日走三百里如約而還秦宗權寇廬壽間刺史募殺賊差首級為賞行密以功補隊長都將忌之俾出戍將行都將問所之對曰我須公頭即斬之自為八營都知兵馬使刺史走淮南節度使高駢因表為廬州刺史乃以田頴為八營都將陶雅為左衝山將討定鄉盜駢將呂用之恐行密不可制遣俞公楚以兵五千屯合肥名討黃巢而陰圖之行密擊殺公楚秦宗權遣弟度准取舒城行密破走之時張敖據壽州許勅據滁州與行密擊戰又舒人陳儒攻刺史高濬濬來告難行密未能定賊吳迴李本逐濬據其城行密虜之取舒州為勅所奪光啟二年張敖遣將魏虔攻廬州大將李神福田頴破之楮城畢師鐸秦彥攻高駢呂用之以駢命署行密行軍司馬督其兵進援客袁襲說行密曰高公耄昏妖人用權彥乃以逆除暴熾其亂公亟應必得

乾隆四年校刊

唐書卷一百八十八列傳

一

昭和六十年二月一日贈
土岐孝吉氏寄

010185193778

其地行密乃檄部州裒兵而東次天長而揚州陷行密薄城而屯用之以兵屬之彥以騎兵背城戰行密臥帳中令曰賊近報我俄而陷一屯別將李宗禮入曰兵相迫戰且不利請堅壁徐引歸可也李濤怒曰以順去逆何眾寡爲今尙何歸願以所部前死行密喜益甲出戰俘殺如藉彥軍不出會駢死襲勸行密舉軍編素大臨三日進攻城未能下用之將張審晟詭伏西壕殺闖者啟外兵彥軍疲守邈皆潰去行密入據揚州未閱月孫儒奄至兵銳甚襲見行密曰公之入以少擊衆室家未完若外被重圍情見勢殆不如避之行密執海陵鎮遏使高霸殺之并其衆輦所收財歸于廬於是朱全忠自爲淮南節度使遣將張廷範致命而授行密副使以行軍司馬李璠知留後行密大怒廷範璠不敢入全忠更請以行密知觀察留後當時孫儒彊赫然有吞吳越意行密欲遁保海陵襲勸還廬州治兵爲後計行密乃還旣又謀趨洪州襲不可曰鍾傳新興兵附食多未易圖也孫端據和州趙暉屯上元結此二人以圖宣州我綽綽有餘力矣行密從之端暉次采石行密自樛潭濟端等戰不勝襲勸行密速趨曷山堅壁以須宜人求戰示以弱待其怠一舉可禽宣將蘇瑋兵二萬對屯行密不戰分奇兵伐木開道四出瑋驚北遂圍宣州刺史趙鏜糧盡親將多出降初行密有銳士五千衣以黑縑黑甲號黑雲都又并盱眙曲溪二屯籍其士爲黃頭軍以李神福爲左右黃頭都尉兵銳甚曲溪將劉金策鏜必遁給曰將軍若出願自吾壘而借鏜喜多

遺之金許妻以女明日譟城上曰劉郎不爲爾增鏜宵遁獲之鏜全忠故人也發使求之襲曰斬首送之無後慮乃歸鏜首于汴昭宗詔行密檢校司徒宣歙池觀察使時韓守威以功拜池州刺史行密表徙湖州以兵護送而李師悅在湖州與杭州刺史錢鏐戰不解蘇湖常潤亂甚行密雖得宣州而蔡儒爲孫儒所破以廬州降儒進攻行密行密復入揚州北結時溥扞儒全忠遣龐師古將兵十萬自潁度淮助行密敗於高郵行密懼退還宣州遣安仁義襲成及取潤州自將三萬屯丹陽仁義又取常州殺錢鏐將杜稜儒亦使劉建鋒奪潤常帝以杭州爲防禦使授鏐以宣州號靈國軍授行密節度使大順二年儒屯溧水循山構壁行密遣李神福屯廣德計曰兵倍不戰當避其銳驕之乃退舍儒衆以爲怯守者懈神福夜襲走之儒將康旺取和州安景思取滁州神福擊降旺逐景思攻梁山屯破之禽儒將李弘章俄而田頌威爲儒所敗行密欲守銅官神福曰儒掃境以來利速戰宜堅壁老其師則我無敵矣又出輕騎絕賊糧道使前不得戰退無仰儲不亡何待於是行密以神福爲宣池都游弈使儒始乏食常熟名賊陳可兒聞儒行密之鬪竊入常州自稱制置使行密遣陶雅守潤州張訓入揚州因執楚州刺史以輕兵襲常州斬可兒孫儒圍行密宣州凡五月不解臺濠作魯陽五堰挖輕舸饋糧故行密軍不困卒破儒卽表田頌宣城長驅入揚州戰凡七年定八州生人將盡行密勞隱休息其下遂安議出鹽茗界民輸帛幕府高勛

曰瘡破之餘不可以加斂且帑貲何患不足若悉我所有易四鄰所無不積日財有餘矣行密納之始遇
吏綏勸所部蔡儒以廬州叛附朱全忠納孫儒將張顥而倪章據舒州與儒連和行密遣李神福攻儒破
其將儒堅壁不出顥超堞降行密以隸袁積軍積請戮之行密愛其勇更置于親軍未幾儒自殺行密先
冢皆爲儒發掘吏請夷發儒世墓不許表劉威爲刺史遣田頴攻歙州於是刺史裴樞有美政民愛之儒
拒戰頴兵數却樞朝廷所命者食盡欲降遣行密書請還京師行密以魯郃代樞州人不肯下請陶雅代
雅於諸將最寬厚以禮歸樞于朝是歲李神福拔舒州倪章亡以神福爲舒州刺史乾寧二年行密襲濠
州李簡重甲絕水縋而入執刺史張璠以劉金守之進取壽州行密將劉知俊儲穀石碭將南襲張訓屯濉
水遣兵浮海掩得其盾知俊戰不勝因攻濉水大敗身僅免詔拜行密淮南節度副大使知節度事檢校
太傅同中書門下平章事封弘農郡王董昌爲錢鏐所攻來告窮行密遣臺濠攻蘇州安仁義田頴攻杭
州身督戰別將張崇爲鏐執行密欲嫁其妻答曰崇不負公願少待俄而還自是行密終身倚愛明年五
月破蘇州執鏐將成及以朱黨守之朱延壽拔蕪光二州行密以霍巨富南北走集以邑豪朱景爲鎮將
景驍殺絕人諸盜莫敢犯行密將寇彥卿以騎三千襲之致全忠厚意景不許苦戰彥卿敗而去田頴魏豹
張宣共圍嘉興鏐大將顧全武救之執宣約逐頴於驛亭埭未幾泰寧節度使朱瑾率部將侯瓚來歸太

原將李承嗣史儂史建章亦來奔行密推赤心不疑皆以爲將於是兵銳甚疆天下帝惡武昌節度使杜
洪與全忠合手詔授行密江南諸道行營都統討洪行密將朱友恭率騎兵萬人與張崇戰泗州金敗
翟章守黃州聞友恭至南走武昌行密遣將馬珣以樓船精兵助章守友恭次樊港章據險不得前友
恭鑿崖開道以彊弩叢射殺章別將遂圍武昌章率軍薄戰不勝友恭斬章拔其壁全忠率萬從周萬騎
攻光州柴再用遣小校王稔以輕騎覘賊汴兵圍之候者請救再用曰稔必殺賊第無往稔解鞍自如暮
依樹步戰殺傷多汴兵乃解時亡馬法峻稔追汴軍得馬乃還從周涉淮圍壽州而龐師古勸金以衆七
萬壁清口朱延壽擊從周軍敗之行密欲汴圍解乃擊師古李承嗣曰公能潛師趨清口破其衆則從周
不擊而潰行密出車西門繇北門去以銳士萬二千齧雪馳迫清口不進壅淮上流潛師古軍張訓自濉
水來行密使將羸兵千人爲前鋒師古易之方圍棋軍中不顧朱瑾侯瓚以百騎持汴旌幟直入師古壘
舞榭而馳訓亦登岸超其柵汴軍大驚卽斬師古士死十八全忠聞之與從周皆遁走追及壽陽大破之
叩淖水方涉爲瑾所乘溺死萬餘瑾徙屯安豐汴將牛全節苦鬪後軍乃得度會大雪士多凍死潁州刺
史王敬堯燒薪屬道汴軍死者數千人未幾復圍壽州七日走馬珣收散卒三百自黃州間道趨分靈絕
山谷襲撫州鏐將危全諷列四壁皆萬人珣謂諸將曰爲諸君擊中壁食其穀以歸乃夜擊之全諷走明

日珣高會廣旗幟伐鼓循山而下連營潰既還行密罵曰豎子不遂據其城邪光化元年秦裴取鏐崑山鎮顧全武圍之行密諸將數敗全武遂圍蘇州臺濠固守鏐自以舟師至濠食盡行密遣李簡蔣勳迎之敗全武兵濠得還後軍潰裴援絕全武勸其降決水灌城城壞裴乃降鏐喜具千人食以待既至士不及百鏐曰軍寡何拒之久裴曰糧盡歸死非僕素也初成及之執行密閱其室唯圖書藥劑將辟爲行軍司馬固辭引刀欲自刺行密乃止厚禮而歸之鏐亦遣魏約等還全忠攻蔡州奉國節度使崔洪來丐師明年遣朱瑾率兵萬人攻徐州屯呂梁洪遂來奔會雨霖瑾引還行密攻徐州汴將李禮壁宿州以援全忠自將次輝州行密戰不勝乃解青州將陳漢賓擁兵送款行密王綰張訓周本率兵迎之漢賓中悔綰訓入見漢賓給麾下饗我不過日中若不至可攻城漢賓釋甲聽命光州叛行密自攻之汴將朱友裕來救撤圍還全忠諭馬殷成汭雷滿合兵攻行密汭滿猶豫汭惡殷事全忠掠其境滿來結好行密壁黃鄂間杜洪竄鳩于酒子并棄城去行密知不入全忠又遣使者督殷汭滿連兵解圍行密還詔加檢校太尉兼侍中天復元年傳言盜殺錢鏐李神福急攻臨安顧全武列八壁相望神福伏軍青山僞若引去謀奔告全武悉衆躡之神福返鬪與伏夾攻斬首五千級執全武明日遂圍臨安鏐將秦昶以步兵三千降神福乃令軍中謾鏐先墓禁樵采鏐遣使者厚謝神福以鏐不死臨安未可下納犒而還明年大將劉存率兵

二萬戰虜七百伐湖南殷伏軍長嶺洲以樓艦據上流乘風颶沙彊弩射之存軍燬行密歸顧全武於鏐鏐亦釋秦裴以報帝在鳳翔以左金吾大將軍李儼爲江淮宣諭使授行密東面諸道行營都統檢校太師守中書令封吳王承制封拜且告難時已削奪全忠封爵詔西川河東忠義幽州保大橫海義武大周八道攻之詔朱瑾爲平盧節度使繇海州取青齊馮弘鐸爲感化節度使出澧水攻徐宿使朱延壽圍蔡州田頴捍錢鏐行密討杜洪馬殷以分全忠勢行密乃以李神福爲鄂岳招討使劉存副之遣冷業攻馬殷杜洪戰屢敗嬰城請救於全忠全忠使韓勅率步兵萬人屯澠口荆南節度使成汭亦悉衆救洪神福逆戰敗之汭溺死勅引衆走冷業屯平江爲三壁殷將許德勳以銳卒號定南刀夜襲業擊三壁皆破禽業掠上高唐年而去是時杜洪困甚且禽會田頴安仁義絕行密行密召神福存還計事洪復振頴之敗更以臺濠爲宣州觀察使復遣神福存攻鄂州順義軍使汪武與頴連和歙州刺史陶雅攻鍾傳兵過武所迎謁縛武於軍無錫當浙衝行密使票將張可悰守之鏐勳兵三千夜襲城可悰以百騎擊走之吏皆賀答曰未也方勞諸軍一戰乃蔽火斂旗以須覘者以告鏐兵復至可悰大破之臺濠卒行密以子渥爲宣州觀察使天祐二年王彥章李德誠拔潤州殺安仁義以王茂章爲潤州團練使聶彥章等率舟師復伐殷攻岳州許德勳詹信以舟千二百椳入蛤子湖瑋山之南爲木龍鎖舟夜徙三百柯斷楊林岸彥章

入荆江將趨江陵信驛之德勳以梅花海鶻迅舸進斷木龍舟蔽江車弩亂發執彥章溺死萬人殷釋彥章還德勳謂曰爲我謝吳王僕等數人在湖湘不可冀也行密寬易善遇下能得士死力每宴使人負劍侍陳人張洪因以劍擊行密不中近將李友禽斬之佗日侍劍如故行密蚤出有盜斷馬鞅不之問以故人人懷恩始乘孫儒亂府庫殫空能約己省費不三年而軍富雄嘗過楚州臺濛感供帳待之行密一夕去遺衣臥內皆經補浣濛還之行密曰吾與細微不敢忘本君笑我邪濛大慙登城見王茂章營第曰天下未定而茂章居寢鬱然渠肯爲我忘身乎茂章遽毀損方帝困鳳翔再遣使督兵以爲行密可亢全忠者然兵至宿州給言糧盡乃還全忠脅帝東遷行密恥憤被病全忠亦知天子倚行密爲重乃弑帝以絕人望行密聞之發喪不視事三日因是病篤召將吏付家事問嗣於其佐周隱對曰宣州司徒易而信讓唯淫酗是好不可以嗣不如擇賢者時劉威以宿將有威名隱意屬威行密不答因以王茂章代渥使亟還行密召所親嚴求曰我使周隱召吾兒而不至奈何求往見隱召檄仍在几始渥守宣州押牙徐温王令謀約渥曰王且疾而君出外此殆姦人計他日有召非我二人勿應也及是一人以符召渥渥至行密承制授檢校太尉同中書門下平章事淮南節度使留後行密諭渥曰左衛都將張顥王茂章李遇皆怙亂不得爲兒除之卒年五十四遺令穀葛爲衣桐瓦爲棺夜葬山谷人不知所在諸將諡曰武忠張顥議

歸都統印於宣諭使李儼行節度事諸將畏顥無敢對渥流涕騎軍都尉李濤曰都統印先帝所以賜王父子安得授人諸將唯顥投袂去乃共請於儼承制授渥兼侍中淮南節度副大使東面諸道行營都統封弘農郡王渥好騎射初與許玄膺爲刎頸交及嗣位事皆決之諸將莫敢忤渥求王茂章親兵不得及去宣鞏帷帘以行茂章媼罵不與踰年遣兵五千襲之茂章奔杭州秦裴執鍾匡時渥授以江西制置使朱思勛范師從陳鏞以兵戍洪州渥爲張顥所制二人者渥腹心也顥脅以爲有異謀遣陳祐疾馳懷短兵微服入秦裴帳中裴大驚命飲召三將入皆色動酒行祐數其罪皆斬之渥召周隱曰君嘗以孤爲不可嗣何也隱不對遂殺之

贊曰行密興賤微及得志仁恕善御衆治身節儉無大過失可謂賢矣然所據淮楚士氣剽而不剛行密無霸材不能提兵爲四方倡以興王室熟視朱温劫天子而東謀窮意沮憤死牖下可爲長太息矣時溥徐州彭城人爲州牙將黃巢亂京師節度使支詳遣溥與陳璠率兵五千西討次河陰軍亂剽居人溥招戢其衆引還屯境上疑不敢歸詳以牛酒犒士約悉贖其罪軍乃入共推溥爲留後逐詳客館溥厚具貲裝遣璠護還京師夜駐七里亭璠擅殺詳屠其家溥怒署璠宿州刺史俄殺之別遣將引銳兵三千入關僖宗因以武靈節度命之巢敗東走圍陳州營激水秦宗權方據淮西相聯結溥地介於賊乃悉師

討之軍鋒甚盛連戰輒克授東面兵馬都統遂合許克鄆兵逐尙讓於太康斬首數萬級讓以所部萬人降溥遣將李師悅等追尾巢至萊蕪大破之諸將爭得巢首而林言斬之持歸溥以獻天子故破賊溥功第一加檢校司徒同中書門下平章事進檢校太尉兼中書令鉅鹿郡王宗權阻兵拜溥蔡州行營兵馬都統賊平與朱全忠爭功嫌瑟日構孫儒方與楊行密爭揚州詔全忠爲淮南節度使平其亂溥自以先起功名顯朝廷位都統顧不得而全忠得之頗悵恨全忠使司馬李璠郭言等東兵道宿州遣溥書請假道溥辭不可間其墮以兵襲之言戰甚力解而還全忠怨自是連歲略徐泗師不弛甲全忠自將及其郊未得志引去溥窮乞師於李克用克用爲攻碭山朱友裕救之各亡其大將友裕進攻宿州不能拔時大順元年也明年丁會築堤閼汴水灌宿鄆三月拔之使劉瓚守而溥將劉俊引兵二千降全忠軍益不振民失田作又大水荐飢死喪十七以上乃請和於全忠全忠約徙地而罷兵昭宗以宰相劉崇望代之授溥太子太師溥慮去徐且見殺惶惑不受命諭軍中固留有詔聽可泗州刺史張諫聞溥已代卽上書請隸全忠納質子焉溥既復留諫大懼全忠爲表徙鄭州刺史諫畏兩怨集己乃奔楊行密行密以諫爲楚州刺史并其民徙之以兵屯泗朱友裕率軍攻溥嬰城不出有語全忠曰軍行非吉日故師無功全忠遣參謀徐璠至軍責諭友裕答曰溥困且破乃狎妖辭士心墮爰焚其書督餉饋急攻之溥將徐汶出降

溥求救於朱瑾全忠自以兵屯曹將去留精騎數千授霍存曰事急可倍道趨之瑾兵二萬與溥合攻友裕存引兵疾戰瑾溥還壁明日復戰霍存敗死之進逼友裕友裕堅營不出瑾食盡還兗州全忠使龐師古代友裕溥分兵固守石佛山師古攻拔之自是完壘不戰王重師牛存節等梯其堞以入溥徙金玉與妻子登燕子樓自焚死實景福二年全忠遂有其地私置守焉

朱宣宋州下邑人父以豪猾聞里中坐竊鹽抵死宣亡命去青州爲王敬武牙軍黃巢之亂敬武遣將曹存實率兵西入關而宣爲軍候道鄆州是時節度使薛崇拒王仙芝戰死其將崔君裕攝州事存實揣知兵寡襲殺之據其地遂稱留後以宣功多署濮州刺史留總帳下兵中和初魏博韓簡東窺曹鄆引兵濟何存實迎戰死于陣宣收殘卒嬰城簡圍之六月不能拔引兵去僖宗嘉其守拜宣天平節度使累加同中書門下平章事宣有衆三萬弟瑾勇冠三軍陰有爭天下心瑾嗜殘殺光啟中求婚於兗州節度使齊克讓託親迎載兵竊發遂克讓據府自稱留後天子卽授以帥節兄弟雄張山東時秦宗權悉兵攻朱全忠使秦賢列三十六壁自將督戰全忠大恐求救于宣宣與瑾身率師往擊宗權宗權敗走全忠厚德宣兄事之情好篤密而內忌其雄且所據皆勁兵地欲造怨乃圖之卽聲言宣納汴亡命移書詆讓宣以新有恩於全忠故答檄盡望全忠由是顯結其隙使朱珍先攻瑾取曹州壁乘氏宣救曹不克奔還范珍圍

濮州宣使弟罕救濮全忠自將擊罕斬之拔濮州朱裕奔歸鄆使珍薄鄆挑戰宣不出裕爲書給降導珍入信之夜以兵數千傅城裕開門軍入縣門發死者數千縱轟石擊未入者殺裨將百餘人復取曹以郭詞爲刺史大將郭銖斬詞奔全忠瑾謀悉兵襲汴全忠乃自攻瑾瑾以兵掠單父與全忠將丁會轉戰不勝去景福初復伐宣令從子友裕先驅自繼之次衛南宣以輕兵夜掩友裕軍走之據其營全忠未知運糧以入乃覺走瓠河與友裕相失距濮十五里舍明日友裕乃至宣留濮州全忠令友裕馳壯騎蹙鄆虛實身將而北會宣引還縱兵戰全忠南走絕壑去幾不脫大將多死乃謀持久微極取宣歲一再暴其鄙奪之食俘其工織鬪有存者宣令賀環守濮州爲友裕所攻委城走友裕進擊徐州時溥求援於宣戰不勝而還溥遂亡全忠卽遣龐師古攻齊州宣瑾皆戍以兵久不下乾寧元年全忠身往薄清河結壘宣瑾三分其兵出擊之全忠迎戰東阿南風急汴軍居下甚懼俄而風返全忠得縱火焚其旁燬薰漲天宣等大北是夏全忠壁曹州南宣薄戰禽其將三人全忠還明年使朱友恭擊兗州瑾堅壁乃壅而守宣饑瑾友恭奪其糧全忠自軍單父會宣求救於李克用友恭退壁曹南數月全忠自伐宣刈其麥敗克用將李承嗣等乃還宣追之大鈔曹州其秋全忠復攻鄆壁梁山宣克用挑戰全忠設伏破之斬首數千級引而南克用躡全忠後至柏和大寒全忠軍多死不閱月復圍兗州因略地襲巨賀環以奇兵擊全忠輜重不

及戰鉅野東環大敗見禽師無子餘軍道大破風暴起全忠曰豈殺人有遺邪乃搜軍中復斬數千人風亦止執環示城下瑾之兄瓊守齊州見勢屈以州歸全忠結同姓懼全忠許之輕騎至軍全忠勞苦加禮因使招瑾瓊領精騎鬪池笑語如平生歡乃使將胡規僞送款欲得瓊躬上符節全忠不之虞瑾伏壯士橋下瓊單騎至方交語士突起掖瓊以入斬其首棄城下汴軍大震全忠恚數日乃去三年克用使其將李瑋以兵屯莘援宣爲羅弘信所破全忠大喜度宣可困遣龐師古伐宣宣逆戰敗于馬頰河師古迫其西門兵不出全忠之攻宣凡十興師四敗績宣才將皆盡益內沮度不能與全忠礪則固守增堞深溝爲不可逼明年葛從周密造舟于塹師人踰而升宣出奔爲民所縛追至執以獻全忠斬之而納其妻使師古攻兗州二月食盡瑾自出督芻粟轉掠豐沛間而子用貞及大將康懷英等舉城降瑾引麾下走沂州刺史尹懷寶不納乃趨海州刺史朱用芝以其衆與瑾奔楊行密行密迎之高郵解玉帶以賜表領徐州節度使昇以兵師古從周以兵七萬討行密瑾敗之清口擊殺師古而從周還師至溍水方涉瑾追及殺傷溺死幾盡瑾事行密尤盡力

孫儒河南河南人以趨下橫里中隸忠武軍爲裨校與劉建鋒善黃巢亂以兵屬秦宗權爲都將光啟初宗權遣儒攻東都留守李罕之出奔儒焚宮闈屠居人河陽節度使諸葛爽與儒戰洛水爽敗儒亦東圍

鄭州朱全忠屯中牟救之不敢前儒家夜登城刺史李璠走儒進拔河橋遂取河陽留後諸葛仲方出奔全忠壁河陰儒掠汴鄙全忠兵卻屯胙城東南列偽旗鼓疑之儒乃還會全忠與宗權戰宗權敗走儒聞殺孟人汴尸於河焚并邑乃去宗權又遣儒鈔淮南乘高駢之亂儒留濠州會楊行密得揚州宗權使弟宗衡爭淮南以儒爲副建鋒爲前鋒儒常曰丈夫不能苦戰萬里賞罰繇己奈何居人下生不能富貴死得願食乎未幾汴兵攻蔡宗權召之儒稱疾不往宗衡督之卽大會帳下酒酣斬宗衡并其衆與建鋒許德勳等盟有騎七千因略定傍州不淹旬兵數萬號土團白條軍文德元年破揚州自爲淮南節度使與時溥連和初全忠嘗以書招儒故又納款於汴且送宗衡秦彥畢師鐸首全忠藉以聞昭宗授儒檢校司空全忠嘗爲招討副使龍紀初悉兵攻宣州行密取淮南儒還行密走始得潤常蘇三州兵益彊使建鋒守潤常全忠約行密圖之儒謀定江南乃北爭天下畏全忠搆虛乃遣人卑辭厚賄全忠薦於朝詔授淮南節度使大順元年行密取潤州以安仁義守之常州以李友守之儒怒三分其軍度江建鋒復拔常潤仁義走全忠遣將龐從等軍十萬奄至高郵儒悉師禦之故仁義間取潤州劉威田頔等敗建鋒於武進取常州杭州錢鏐將沈粲自蘇州奔儒行密諸將在潤常者皆爲建鋒所逐仁義頔棄潤州走明年儒引兵自京口轉戰召建鋒皆行行密諸將屯險者聞儒至皆走頔威等合兵三萬邀儒黃池儒遣馬殷擊走

之儒營廣德乘勝至東溪淮人大恐行密遣臺濠屯西溪自引軍逆戰儒軍圍之數重黑雲將李簡以騎馳行密乃免儒遂圍宣州行密乞師於錢鏐會谿濠濠廣德黃池諸壁皆沒儒分兵取和滁二州其秋儒焚揚州引而西傳檄遠近號五十萬旌旗相屬數百里所過燒廬舍殺老弱以給軍行密懼將遁去戴規曰儒軍數敗今掃地而至決死於我若吾遣降者間至揚州撫尉衣食使儒軍聞其家尙完人人思歸不戰可禽也行密乃遣親將入揚州取儒營糧數十萬斛以稟飢民儒屯廣德陶雅以騎軍破儒前鋒屯巖公臺十一月頔威與儒決戰皆大敗儒連屯稍西行密使陶雅屯潤州扼其歸路景福元年儒復圍宣州屯陵陽行密戰不利謀出奔時劉威方繫獄且死行密窮更召問計對曰儒焚倉隳壘以來糧盡將爲我禽若勁兵背城坐制其困李神福亦請據險邀儒糧行密乃分兵攻廣德壁而絕饒道軍適大疫儒病疴建鋒殷鈔諸縣行密知城下兵寡乃晨出率仁義頔背城決戰破五十壁會暴澍且冥儒軍大敗不久當入京師至是傳首闕下建鋒殷哭之相語曰公常有志廟食吾等有土當願以報德及殷據湖南表儒贈司徒樂安郡王立廟以祀

唐書卷一百八十八

唐書卷一百八十八考證

楊行密傳左衛○閣本作左衛

二人者渥腹心也○臣酉按上文云朱思勳范師從陳鏘以兵戍洪州下文云三將入皆色動則此二人

當作三人為是然諸本俱作二未詳

孫儒傳仁義走○臣酉按上文行密取潤州以安仁義守之常州以李友守之則儒復拔常潤二州守將

當皆走今但云仁義走而不及李友疑有脫文

仁義類棄潤州走○臣酉按上文仁義間取潤州劉威田頴等取常州此處不應云仁義類棄潤州走

唐書卷一百八十八考證

唐書卷一百八十九

宋 端 明 殿 學 士 宋 祁 撰

列傳第一百一十四

高趙田朱

高仁厚亡其系出初事劍南西川節度使陳敬瑄為營使黃巢陷京師天子出居成都敬瑄遣黃頭軍部將李鋌鞏咸以兵萬五千戍興平數敗巢軍賊號蜀兵為鷓兒每戰輒戒曰毋與鷓兒鬪敬瑄喜其兵可用益選卒二千使仁厚將而東先是京師有不肖子皆著疊帶冒持挺剽閭里號閑子京兆尹始視事輒殺尤者以怖其餘竄滂治京兆至殺數十百人稍稍憚賊巢入京師人多避難寶雞閑子掠之吏不能制仁厚素知狀下約入邑閭縱擊軍入閑子聚觀噴侮於是殺數千人坊門反閉欲亡不得故皆死自是閭里乃安會邛州賊阡能眾數萬略諸縣列壁數十涪州刺史韓秀昇等亂峽中韓求反蜀州諸將不能定敬瑄召仁厚遣使督兵四討屯永安阡能遣諜者入軍中吏執以獻諜自言父母妻子囚於賊約不得軍虛實且死仁厚哀之曰為我報賊明日我且戰有能釋甲迎我者署背曰歸順皆得復農矣縱諜去命諸將毀柵鼓而前賊渠羅渾擊設伏詐降仁厚遣將不持兵入諭其眾皆真降渾擊詐窮而逸吏執之仁厚

曰愚人不足語降衆署背得免則告諸壁大軍至賊帥句胡僧大驚斬之莫能禁衆執胡僧以降韓求知大賊已禽徇諸壁曰敢出者斬衆罵之求赴水死衆鉤出斬以徇餘柵皆下仁厚按轡裴回視賊壘吏請焚之仁厚命取財糧乃縱火尸賊成都仁厚還天子御樓勞軍授仁厚檢校尚書左僕射眉州刺史敬瑄與仁厚謀曰秀昇未禽貢輸梗奪百官乏奉民不鹽食公能破賊當以東川待公仁厚許之詔拜行軍司馬仁厚聞賊儲械子女皆在屯乃以銳兵溯江伐木積水礙舟道負岸而陣使游軍逼賊久不戰則夜以千卒持短刀彊弩直薄營火而譟之秀昇率舟兵救火仁厚遣人驚沒鑿舟皆沈衆懼多潰秀昇斬潰兵欲脅止之衆怒執秀昇以降仁厚問狀對曰天子蒙塵反者何獨我仁厚檻車送行在斬於市東川節度使楊師立初隸神策軍累遷檢校司空中書門下平章事聞敬瑄以仁厚代己有望言敬瑄諷帝召師立以本官兼尚書右僕射師立益怒移檄言敬瑄十罪殺監軍田繪屯涪城遣兵攻綿州不克又檄劍州刺史姚卓文共攻成都假卓文爲指揮應接使卓文不應帝乃下詔削官爵敬瑄卽表仁厚爲東川節度留後楊茂言爲行軍副使楊棠爲諸軍都虞候率兵二萬討之師立遣大將張士安鄭君雄守鹿頭關仁厚次漢州前軍戰德陽師立嬰城閱四旬夜出兵擾北柵仁厚設兩翼而伏披柵門列炬賊不敢進伏發擊走之楊茂言謂仁厚且敗引兵走久乃還明日會諸將仁厚曰副使當以死報天子斬而徇於是士安

旌敢出師立自督士十戰皆北仁厚約城中斬首惡者賞君雄譁于軍曰天子所討反者耳吾等何與乃與士安譁而進以仁厚書示師立曰請以死謝衆自沈于池死君雄悉誅其家獻首天子仁厚入府縱繫囚賑貧絕詔拜劍南東川節度使光啟二年遂據梓州絕敬瑄君雄時爲遂州刺史亦陷漢州攻成都敬瑄使部將李順之逆戰君雄死又發維茂州羌軍擊仁厚斬之乾寧中皆追贈司徒

趙犖陳州宛丘人世爲忠武軍牙將犖資警健兒弄時好爲營陣行列自號令指顧群兒無敢亂父叔文見之曰是當大吾門稍長喜書學擊劍善射會昌中從伐潞州收天井關又從征蠻忠武軍功多遷大校黃巢入長安所在盜興陳人詣節度府請犖爲刺史表于朝授之旣視事會官屬計曰巢若不死長安必東出關陳其衝也乃培城疏塹實倉庫峙藁薪爲守計民有貲者悉內之繕甲兵募悍勇悉補子弟領兵巢敗果東奔賊將孟楷以萬人寇項犖擊禽之僖宗嘉其功遷累檢校司空巢聞楷死驚且怒悉軍據澗水與秦宗權合兵數十萬緣長壕五周百道攻之州人大恐犖令曰士貴建功立名節今雖衆寡不敵男子當死地求生徒懼無益也且死國不愈生爲賊乎吾家食陳祿誓破賊以保陳異議者斬衆聽命引銳士出戰屢破賊巢益怒將必屠之乃起八仙營於州左僭象宮闕列百官曹署儲糧爲持久計宗權輸鎧仗軍須賊益張犖小大數百戰勝負相當故人心固乃問道乞師於朱全忠未幾汴軍至壁西北陳人思

番犇引兵急擊賊破之圍凡三百日而解中和五年擢彰義軍節度使巢雖敗宗權始熾略地數千里屠二十餘州唯陳賴犇獨完以功檢校司徒加泰寧浙西兩節度皆在陳并領之龍紀初進同中書門下平章事忠武軍節度仍治陳州流亡踵還與弟昶至友愛後將老悉以軍事付之乃卒贈太尉犇悉忠力以孤城抗賊巢卒敗亡然附全忠亦賴其力復振故委輸調發助全忠常先宅鎮云

昶字大東神采軒異而內沈厚有法度破孟楷功多巢之圍昶夜振師疲而寢如有神相之者犁曙決戰士爭奮死鬪禽賊會數人斬級千餘犇領泰寧以昶爲州刺史檢校尚書右僕射當時方鎮言忠壯吏治舉言犇昶犇之老乃授留後遷忠武節度使亦留陳進檢校司徒勸農桑於人有恩惠加同中書門下平章事乾寧二年卒年五十三贈太尉

犇子珣字有節雄毅喜書善騎射巢之難激勵麾下約皆死以先冢邇賊畏見殘齧卽夜縋死士取柩以入庫有巨弩機牙壞不能張珣以意調治激矢至五百步人馬皆洞賊莫敢逼以勞檢校尚書右僕射遙領處州刺史昶帥忠武珣遷行軍司馬昶之喪知忠武留後政簡濟上下安之全忠表爲忠武軍節度使陳土惡善地珣疊表埔遂無患三加檢校太保光化三年同中書門下平章事進兼侍中封天水郡公按鄧艾故蹟決翟王渠溉稻以利農一家三節度相繼二十餘年陳人宜之天復初韓建帥忠武以珣

知同州節度留後昭宗遣長安詔入朝賜號迎鑾功臣以檢校太傅爲右金吾衛上將軍從東遷歲餘以疾免卒年五十五贈侍中陳人爲罷市

田頴字德臣廬州合肥人略通書傳沈果有大志與楊行密同里約爲兄弟應州募屯邊遷主將行密據廬州頴謀爲多攻趙鏐於宣州鏐出東溪乘暴流以逸阻水解甲謂追騎不能及頴乘輕舸追之鏐驚遂見禽行密表頴爲馬步軍都虞候沙陀叛將安仁義奔淮南行密大喜屬以騎兵使在頴右兩人名冠軍中共攻常州殺刺史杜稜錢鏐方屯潤州一夕潰會孫儒南略頴等屯丹陽儒火揚州壁廣德頴破其屯與戰頴走行密怒奪其兵或諫行密曰疆敵傳壘不用頴非計也行密復將頴儒詒書仁義通好以疑行密行密待益厚署行軍副使卒用此二人功禽儒乃表仁義爲潤州刺史頴監國軍節度使累遷檢校太保同中書門下平章事仁義至檢校太保頴已平馮弘鐸至揚州謝行密左右求貲不已獄吏亦有請頴怒曰吏覬吾入獄邪又求池歛爲屬州行密不許頴始怨將還指府門曰吾不復入此是時錢鏐部將徐綰叛鏐入杭州遂綰綰屯靈隱山迎頴頴遣客何曉見鏐曰王宜東保會稽無爲虛屠士衆也鏐曰軍中小叛常然公爲人長何助逆耶頴攻北門鏐登城與語射中麾下頴築壘絕往來道鏐患之出金幣十舉募能奪地者陳璋以死士三百免胄馳擊奪其地鏐授璋衢州刺史頴攻城未能克將濟江絕西陵爲鏐

將所却圖益急先是行密欲女鏐子鏐急乃遣元璋迎女且告行密曰穎得志爲患必大請以子爲質願召還穎行密使人請穎曰不還我遣人代守宣州穎不從鏐輸錢二百萬緡犒軍穎又請鏐子元璋出質乃與緡引兵還然內怨行密與鏐因移書曰侯王守方以奉天子譬百川不朝于海雖狂奔澶漫終爲涸土不若順流無窮也東南揚爲大刀布金玉積如阜願公上天子常賦穎請悉儲時單車以從行密答曰貢賦繇汴而達適足資敵爾於是穎絕行密大募兵李神福白行密穎必叛宜先圖之行密曰穎有大功而反狀未明殺之諸將不爲用穎遣其佐杜荀鶴至汴通好全忠喜屯宿州須變行密以康儒在穎所故授廬州刺史以問之穎怒族其家儒曰公不用吾謀死無地矣穎與安仁義連和攻昇州劫刺史李神福妻息厚養之神福方與劉存攻鄂州行密召之神福謂諸將曰穎反此心腹疾宜速攻之穎遣李臯詣書神福曰公家在此苟從我當分地以王答曰吾以一卒從吳王任上將終不以妻子易意乃斬臯破穎兵於曷山始穎將王壇等以舟師躡神福後至吉陽磯不戰會日暮壇掩神福軍半濟神福反舟順流急擊大破之因縱火士多死明日壇復戰敗於皖口穎乃自將來戰神福曰賊棄城而來此天亡也乃瀕水堅壁不出請行密以兵塞穎走道仁義焚東塘戰艦夜攻常州不克轉戰至夾岡立三幟解甲而息追兵莫敢嚮穎陳舟蕪湖行密遣將王茂章攻潤州仁義以善射冠軍中當時稱朱瑾梁米志誠等皆爲第一仁

義常曰志誠弩十不當瑾槩之一瑾槩十不當吾弓之一人以爲然又其治軍嚴善得士心戰卒數百濠梁不毀開門鬪先告所當中然後射之茂章等不敢與礮行密遣使謂曰吾不忘公功能自歸當復爲行軍副使但不可處兵仁義欲降其子固諫乃止行密召其將臺濠泣語曰人嘗告穎必反我不忍負人穎果負我吾思爲將者非公莫可濠頓首謝率騎度江爲陣以行士笑其怯濠曰穎宿將多謀備之何害與王壇等戰廣德濠以行密書遺壇諸將皆再拜氣奪濠麾兵擊之壇走神福旣以不戰困穎穎給言母病還至蕪湖聞壇敗留精兵二萬屬郭行琮身走城濠之行爲狹營小舍覘者以爲才容二千人穎輕之不復召兵與戰黃池矢石始交而濠遁兵爭逐北遇伏穎大敗召蕪湖兵不得入行琮及壇皆歸行密穎志自料死士數百號爪牙都身薄戰濠退軍示弱士超隍濠殊死戰軍潰穎奔城橋陷爲亂兵所殺年四十六其下猶鬪示穎首乃潰穎始以元璋歸戰不勝輒欲殺之穎母護免及鏐與行密合穎曰今日不勝必殺元璋已而穎死傳首至淮南行密泣下葬以庶人禮亦葬康儒還元璋於杭穎善爲治資寬厚通利商賈民愛之善遇士若楊夔康軫夏侯淑殷文圭王希羽等皆爲上客文圭有美名全忠鏐交辟不應穎置田宅迎其母以甥事之故文圭爲盡力夔知穎不足亢行密著溺賦以戒穎不用行密使王茂章穴地取潤州安仁義以家屬保城樓兵不敢登召李德誠曰汝可以委命乃抵弓矢就縛父子斬揚州市濠字頂

雲亦合淝人頽破行密表為檢校太保宣州觀察使天祐初卒

朱延壽者廬州舒城人事行密破秦彥畢師鐸趙鐸孫儒功居多行密欲以寬恕結人心而延壽敢殺時揚州多盜捕得者行密輒賜所盜遺之戒曰勿使延壽知已而陰許延壽殺之初壽州刺史高彥溫舉州入朱全忠行密襲之諸將憚城堅不可拔延壽鼓之拔其城即表為淮南節度副使全忠猶屯壽春延壽以新軍出每旗五伍為列遣李厚以十旗擊西偏不勝將斬之厚請益五旗殊死戰全忠引去於是取黃蘄光三州以功遷壽州團練使昭宗在鳳翔詔延壽圍蔡以披全忠勢擢奉國軍節度使全忠兵每至延壽開門不設備而不敢逼也延壽用軍常以寡鬪衆敗還者盡斬之田頽之附全忠延壽陰約曰公有所為我願執鞭頽喜二人謀絕行密行密憂甚給病目行觸柱僵妻延壽姊也掖之行密泣曰吾喪明諸子幼得舅代我無憂矣遣辯士召之延壽疑不肯赴姊遣婢報故延壽疾走揚州拜未訖士禽殺之而廢其妻

贊曰全忠唐之盜也行密志梟其元而後已田頽使出軍賦而助之此其謀賁難而絕之非忠於唐也棄所附而覬尊大亦已妄矣孔子稱孟公綽為趙魏老則優不可以為滕薛大夫如仁厚田朱材不足為吳蜀之老可與事天子哉

唐書卷一百八十九

唐書卷一百八十九考證

田頽傳侯王守方以奉天子譬百川不朝于海雖狂奔澶漫終爲涸土○天子下疑有闕文

唐書卷一百八十九考證

唐書卷一百九十

宋 端 明 殿 學 士 宋 祁 撰

列傳第一百一十五

三劉成杜鍾張王

劉建鋒字銳端蔡州朗山人為忠武軍部將與孫儒馬殷同事秦宗權儒之敗建鋒殷收散卒轉寇江西有衆七千推建鋒為主殷為前鋒張佖為謀主略洪虔數州衆遂十餘萬乾寧元年取潭州殺武安節度使鄧處訥自稱節度留後奉表京師詔即拜檢校尚書左僕射武安軍節度使建鋒已得志即嗜酒不事事新息小史陳贍為建鋒御者妻美且豔乃私之贍怒袖鐵槌擊建鋒死斷其喉衆推張佖為帥佖固辭馬蹠傷佖左髀下令曰吾非而主時馬殷攻邵州未克於是遣人迎殷礮贍于市殷至佖坐受其謁既而率將吏推殷為留後詔即除檢校太傅潭州刺史殷以成汭楊行密劉隱皆養士以圖王霸謂其屬高郁曰吾欲重幣以奉四鄰而固吾境計安出郁曰荆南闇弱焉能患我淮南我讎也固不吾援公若置邸京師歸天子職貢王人來錫命四方畏服然後按兵討不廷霸業成矣殷悟厚結宣武朱全忠以請于朝乃拜湖南節度兵馬留後郁又教殷鑄鉛鐵錢十當銅錢一民得自摘山收茗算募高戶置邸閣居茗號八

牀主人歲入算數十萬用度遂饒於是收邵衡永道郴連六州進攻桂州執留後劉士政諸城望風奔潰盡得昭賀梧象柳宜蒙等州又攻容管執靈遠節度使龐巨曠虜其衆及贊昭宗在鳳翔難方亟遣中人間道賜朱書密詔使殷與楊行密攻汴州殷兵訖不出

殷弟賓沈勇知書史從孫儒爲盜晚事楊行密爲黑雲軍使與錢鏐戰數有功夜臥常有光怪行密知之曰吾今歸汝于兄辭曰實一敗卒公待以不死湖南在宇下朝夕至但誼不忍舍公行密具齋以遣曰爾還與兄共食湘楚然何以報我答曰願通二國好使商賈相資行密喜既至殷表以自副每勸殷與行密連和殷畏全忠卒不克殷與建鋒同里人凡宗權黨散爲盜者皆以酷烈相矜時通名蔡賊云

成汭青州人少無行使酒殺人亡爲浮屠後入蔡賊中爲賊帥假子更姓名爲郭禹當戍江陵亡爲盜保火門山後詣荆南節度使陳儒降署裨校久之張瓌囚儒以禹凶慄欲殺之禹結千人奔入峽夜有蛇環其所祝曰有所負者死生唯命既而蛇亡禹乃襲歸州入之自稱刺史招還流亡訓士伍得勝兵三千秦宗權故將許存奔禹禹以青州剽卒三百界之使討荆南部將牟權于清江禽權取其衆禹又破其將王建肇建肇奔黔州昭宗拜禹荆南節度留後始改名汭復故姓宗權餘黨常厚攻夔州是時西川節度使王建遣將屯忠州與夔州刺史毛湘相脣齒厚屯白帝汭率存乘二軍之間攻之二軍使人諄辱汭韓楚

言尤據汭恥之曰有如禽賊當支解以逞會存夜斬營襲厚破之厚奔萬州爲刺史張造所拒走縲州存入夔州楚言妻李語夫曰君常辱軍且支解不如前死楚言不決李礪刀席下方共食復語之夫曰未可知李取刀斷其首并殺三子乃自到汭畏其烈禮葬之刻石表曰烈女即使司馬劉昌美守夔率存泝江略雲安建將皆奔存按兵渝州盡下瀕江州縣時王建肇據黔州自守帝以建肇爲武泰軍節度使汭遣將趙武率存攻之建肇走汭乃以武爲留後存爲萬州刺史存不得志汭遣客伺之方蹴蹴汭曰存必叛自試其力矣遣將襲之存夜率左右超堞走與王建肇皆降於王建汭頗知吏治嘗錄囚盡其情墊江賊陰殺令其主簿疑小史導之訊不承臨刑曰我且訟地下踰月吏暴死汭聞益詳於獄始治州民版無幾未再葺自占者萬餘帝數詔刻石頌功輒固辭時鎮國節度使韓建亦以治顯號北韓南郭汭進累檢校太尉中書令上谷郡王雲安權鹽本隸鹽鐵汭擅取之故能畜兵五萬初任賀隱隱賢者也故汭所舉少過晚得妻父任之譖害諸子汭皆手殺之至絕嗣澧朗本荆南隸州爲雷滿所據別爲節度汭數請之幸相徐彥若不許及彥若罷道江陵汭出怨言彥若曰公專一面自視桓文一賊不能取而怨朝廷乎汭大慙晚喜術士餌藥瀕死而蘇天復三年帝詔淮南節度使楊行密圍鄂州朱全忠使韓勅救之諷汭與馬殷雷彥威犄角汭身自將而行下知汭不足亢行密無敢諫惟親吏楊師厚勸之汭爲巨艦堂皇悉備行

至公安卜不吉欲還師厚曰公舉全軍中道還何以見百姓汭乃行彥威潛師略江陵汭諸將念私無關忘淮南將李神福壁沙橋望汭軍曰戰艦雖盛首尾斷絕可取也擊汭君山敗之火其船衆大潰汭投江死士民皆爲彥威所劫韓勅走還王建遂取夔施忠萬四州天祐中全忠表汭死國事請與杜洪皆立廟云

杜洪鄂州人爲里俳兒乾符末黃巢亂江南永興民皆亡爲盜刺史崔紹募民疆雄者爲土團軍賊不敢侵於是人人知兵杭州刺史路審中爲董昌所拒走客黃州中和末聞紹卒募士三千入鄂州以守洪爲州將有功亦逐岳州刺史居之光啟二年安陸賊周通率兵攻審中審中亡去洪乘虛入鄂自爲節度留後僖宗卽拜本軍節度使是時永興民吳討據黃州路殷據永興二人皆隸土團者也故軍剽甚洪雖得節制而附朱全忠絕東南貢路乾寧初身自將擊討乞師淮南楊行密遣朱延壽助之洪引還延壽拔黃州俘討獻京師路殷棄永興走行密取其地洪得駱殷倚爲心腹間取永興守之全忠方圖鳳翔昭宗遣使者東出道武昌洪皆殺之時行密略光州詔洪出兵與忠義趙匡凝武安馬殷襲安州行密使李神福劉存率舟師萬人討洪駱殷棄永興走縣民方詔守以待命神福已得詔大喜以永興壯縣館會所仰既得鄂半矣遂進圍鄂州洪嬰城請救於汭全忠率兵五萬營霍丘行密禦之汭兵不利引還使別將吳章

以三千兵解圍神福迎破之時全忠方與河東軍薄戰故不能救洪洪乃求助於馬殷殷不答洪計窮復走全忠全忠遣曹延祚合吳章兵萬三千救洪淮南將劉存濬坎傅城殷爲洪謀曰淮兵深入仰永興以濟若奇兵取之賊不戰而潰洪以精兵合汭人問道掩永興三十里而舍存以方詔苗璘當之汭亡卒走淮壁言軍虛實曰鄆軍懦可取開道軍不可當也璘曰殺強則弱者撓矣乃自擊開道軍敗之禽汭士三百人徇城下洪軍氣沮存使辯士臨說洪恃汭方強無降意或勸存急擊援兵則城自下存曰擊之賊入則城固矣若縱其遁城可取也俄而汭軍走是日城陷執洪及曹延祚窮斬其餘行密見洪責曰爾同逆賊弑主與孤爲仇吾軍還而復爲賊後拒今定何如洪謝曰不忍負朱公與延祚皆斬揚州市以劉存守鄂州行密死馬殷遂取其地

鍾傳洪州高安人以負販自業或勸其爲盜必大顯時王仙芝猖狂江南大亂衆推傳爲長乃鳩夷獠依山爲壁至萬人自稱高安鎮撫使仙芝遣柳彥璋略撫州不能守傳入據之言諸朝詔卽拜刺史中和二年逐江西觀察使高茂卿遂有洪州撫民危全諷間傳之去竊州以叛使弟仔昌據信州僖宗擢傳江西團練使俄拜鎮南節度使檢校太保中書令爵潁川郡王又徙南平傳率兵圍撫州天火其城士民譴驚諸將請急攻之傳曰乘人之險不可乃祝曰全諷罪無害民者火卽止全諷聞謝罪聽命以女女傳子匡

時傳以匡時爲袁州刺史擊馬殷又以彭玕爲吉州刺史玕健將也傳倚以爲重廣明後州縣不鄉貢惟傳歲薦士行鄉飲酒禮率官屬臨觀資以裝齋故士不遠千里走傳府傳少射獵醉過虎與鬪虎搏其肩而傳亦持虎不置會人斬虎然後免既貴悔之戒諸子曰士處世尙智與謀勿效吾暴虎也乃畫搏虎狀以示子孫凡出軍攻戰必禱佛祠積餽餅爲犀象高數尋晚節重斂商人至棄其貨去天祐三年卒匡時自立爲節度觀察留後次子匡範爲江州刺史怨兄立黎州附淮南因言兄結汴人圖揚州楊渥使秦裴攻匡時圍洪州匡時城守不出凡三月城陷淮軍大掠三日止執匡時及司馬陳象歸揚州渥切責匡時頓首請死渥哀赦之斬象于市彭玕既失援厚結馬殷且觀虛實使者還曰殷將校輯睦未可圖也遂歸款玕通左氏春秋嘗募求西京石經厚賜以金揚州人至相語曰十金易一筆百金償一篇況得士乎故士人多往依之始危全諷聞匡時立喜曰聽鍾郎爲節度三年我自取之及渥兵盛不敢救潛謀攻渥會淮南亡將王茂章過州請曰聞公欲大舉願見諸將軍才否全諷蒐衆十萬邀茂章觀之對曰揚州有士三等公衆正當其下盍更益之全諷不能答後爲楊氏所并

劉漢宏本兗州小史從大將擊王仙芝劫輜重叛去乾符末略江陵焚民室廬無完家於是都統王鐸遣將崔鏐降之表爲宿州刺史漢宏恨賞薄有望言會浙東觀察使柳璠得罪乃授漢宏觀察使之僖

宗在蜀貢輸驛驛而西帝悅寵其軍爲義勝軍卽授節度使漢宏既有七州志侈大輒曰天下方亂卯金刀非吾尙誰哉鳴噪諸廷命斫樹或曰巨木不可伐怒曰吾能斬白蛇何畏一木中和二年遣弟漢宥率諸將攻杭州壁西陵爲董昌所敗復遣兵七萬瀕江而屯昌使錢鏐宵濟襲破之明年漢宏屯黃嶺發洞獠同攻昌鏐出富陽擊諸營多潰去漢宏大沮悉軍十萬列艦西陵謀宵濟襲昌禱於江有一矢墜前惡之俄與鏐遇鏐俘馘五千漢宏羸服走或執之給而免明日復戰鏐斬其弟漢容將辛約時鍾季文守明州盧約處州蔣瓌婺州杜雄台州朱褒温州褒兵最彊故漢宏使褒治大艦習戰以史惠施堅實韓公汶將其軍帝聞杭越拏戰遣中人焦居璠持節詔通好皆不奉詔光啟二年鏐率諸將攻越自趨導山破公汶於曹娥埭與褒戰燒其艦進屯豐山堅實詣鏐降漢宏率麾下六百人走台州鏐斬其母妻子于屯杜雄褒其軍皆醉執漢宏以見董昌漢宏曰自古豈有不亡國邪昌使斬于市叱刑者曰吾節度使非庸人可殺我嘗夢持金殺我者必錢鏐也昌命鏐斬之

張雄泗州濉水人與里人馮弘鐸皆爲武寧軍偏將弘鐸爲吏辱雄爲辯數并見疑於節度使時溥二人懼禍乃合兵三百度江壁白下取蘇州據之稍稍嘯會戰艦千餘兵五萬乃自號天成軍鎮海節度使周寶之敗奔常州聞高駢將徐約兵銳甚誘之使擊雄與之蘇州雄匿衆海中使別將趙暉據上元資以舟

械寶兵散多降暉眾數萬雄卽以上元爲西州負其才欲治臺城爲府旌旗衣服僭王者楊行密圍揚州畢師鐸厚齎寶幣唱雄連和雄率軍浮海屯東塘是時揚州圍久皮囊革帶食無餘軍中殺人代糧纒千錢聞雄至間道挾珍走軍以銀二斤易斗米速糠粃以差爲直雄軍富過所欲卽不戰去暉數剽江道雄擊殺之坑其衆自屯上元大順初以上元爲昇州詔授雄刺史未幾卒雄善馭衆人思之爲立廟弘鐸代爲刺史弘鐸善騎射侃侃若儒者行密已得淮南弘鐸納好然倚兵艦完利謀取潤州遣客尙公迺進說行密行密不從客曰公不見聽未知勝幾樓船時行密大將田頵在宣州陰圖弘鐸募工治艦工曰上元爲舟市木遠方堅緻可勝數十歲頵曰我爲舟於一用不計其久取木於境可也弘鐸介宣揚間不自安而州數有怪天復二年大風發屋巨木飛舞州人駭曰州且易主大將馮暉等勸弘鐸悉軍南嚮聲言討鍾傳實襲頵行密知之遣客說止不聽頵逆擊於曷山弘鐸大敗收殘士欲入海行密懼復振遣人迎犒東塘好謂曰兵有勝負今衆尙彊乃自棄于海奈何吾府雖隘尙可以居若欲揚州我且讓公弘鐸舉軍盡哭行密擊飛艦不持兵入其軍執弘鐸手尉勉遂以歸表爲淮南節度副使尙公迺曰頗憶爲馮公求潤州否何多尙邪謝曰臣爲君恨其未遂行密笑曰吾得君尙何憂

徐約者曹州人已得蘇州有詔授刺史錢鏐遣弟鉞攻之約驅民墨鏡其形曰願戰南都從事或曰都者

國稱杭終有國乎約後寢寤與其下哭而別入海死鏐使沈粲守蘇州約衆降潤州阮結結不能定鏐以成及討之盡殲其衆

王潮字信臣光州固始人五代祖暉爲固始令民愛其仁留之因家焉世以貲顯僖宗入蜀盜興江淮壽春亡命王緒劉行全合羣盜據壽州未幾衆萬餘自稱將軍復取光州劫豪傑置軍中潮自縣史署軍正主廩庾士推其信緒提二州籍附秦宗權它日賦不如期宗權切責緒懼與行全拔衆南走略潯陽贛水取汀州自稱刺史入漳州皆不能有也初以糧少故兼道馳約軍中曰以老孺從者斬潮與弟審邽審知奉母以行緒切責潮曰吾聞軍行有法無不法之軍對曰人皆有母不聞有無母之人緒怒欲斬其母三子同辭曰事母猶事將軍也殺其母焉用其子緒赦之會母死不敢哭夜殯道左時望氣者言軍中當有暴興者緒潛視魁梧雄才皆以事誅之衆懼次南安潮語行全曰子美須眉才絕衆吾不知子死所而行全怪寤亦不自安與左右數十人伏叢翳徂縛緒以徇衆呼萬歲推行全爲將軍辭曰我不及潮請以爲主潮苦讓不克乃除地刺劍祝曰拜而劍三動者我爲主至審知劍躍於地衆以爲神皆拜之審知讓潮自爲副緒歎曰我不能殺是子非天乎潮令于軍曰天子蒙難今當出交廣入巴蜀以幹王室於是悉師將行會泉州刺史廖彥若貪暴聞潮治軍有法故州人奉牛酒迎潮乃圍城歲餘克之殺彥若遂有其

地初黃巢將竊有福州王師不能下建人陳巖率眾拔之又逐觀察使鄭益自領州詔卽授刺史久之巖卒其壻范暉擁兵自稱留後巖舊將多歸潮言暉可取潮乃遣從弟彥復將兵審知監之攻福州審知乘白馬履行陣望者披靡號白馬將軍暉守彌年不下潮令曰兵盡益將兵將盡則吾至矣於是彥復急攻暉亡入海追斬之建汀二州皆舉籍聽命潮乃盡有五州地昭宗假潮福建等州團練使俄遷觀察使乃作四門義學還流亡定賦歛遣吏勸農人皆安之乾寧中寵福州爲威武軍卽拜潮節度使檢校尙書左僕射卒贈司空潮病以審知權節度讓審知不許詔審知檢校刑部尙書節度觀察留後厚事朱全忠全忠薦爲節度使同中書門下平章事帝在鳳翔賜審知朱詔自三品皆得承制除授天祐初進琅邪郡王

審邦字次都爲泉州刺史檢校司徒喜儒術通書春秋善吏治流民還者假牛犁興完廬舍中原亂公卿多來依之振賦以財如楊承休鄭璘韓偓歸傳懿楊贊圖鄭戩等賴以免禍審邦遣子延彬作招賢院以禮之

劉知謙壽州上蔡人避亂客封州爲清海牙將節度使韋宙以兄女妻之衆謂不可宙曰若人狀貌非常吾以子孫託之黃巢自嶺表北還湖湘間羣盜蟻結知謙因據封州有詔卽授刺史兼賀水鎮使以遏梧

桂知謙撫納流亡愛蓄用度養士卒未幾得精兵萬人多具戰艦境內肅然久之疾病召諸子曰今五嶺盜賊方興吾有精甲犀械爾勉建功時哉不可失也知謙卒共推其子隱爲嗣清海軍節度使劉崇龜表爲封州刺史嗣薛王知柔代領節度未至而牙將盧瑒叛隱率兵奉迎知柔直趨廣州瑒獻之於是知柔以聞昭宗拜隱本軍行軍司馬俄遷副使天復初節度徐彥若死隱自稱留後虔人盧光稠者有眾數萬據州自爲留後又取韶州隱與爭之戰不勝悉師攻虔州光稠伏軍掉戰隱縱驅伏發挺身免天祐初始詔隱權節度留後乃遣使者入朝重賂朱全忠以自固是歲光稠死子延昌自稱刺史爲其下所殺更推李圖總州事圖死鍾傳盡劫其衆欲遣子匡時守之不克州人自立譚金播爲刺史附全忠云

唐書卷一百九十

Blank columns for text on the right page.

唐書卷一百九十一

宋 端 明 殿 學 士 宋 祁 撰

列傳第一百二十六

忠義上

夫有生所甚重者身也得輕用者忠與義也後身先義仁也身可殺名不可死志也大凡捐生以趣義者
寧豫期垂名不朽而為之雖一世成敗亦未必濟也要為重所與終始一操雖顏高岱不吾壓也夷齊排
周存商商不害亡而周以興兩人至餓死不肯屈卒之武王蒙慙德而夷齊為得仁仲尼變色言之不敢
少損焉故忠義者真天下之大閑歟姦逆鼎搏人而肆其毒然殺一義士則四方解情故亂臣賊子絕
然疑沮而不得逞何哉欲所以為彼者而為我也義在與在義亡與亡故王者常推而褒之所以砥礪生
民而窒不軌也雖然非烈丈夫曷克為之彼委靡軟熟偷生自私者真畏人也哉故次叙夏侯端以來凡
三十三人于左方

夏侯端壽州壽春人梁尚書左僕射詳孫也仕隋為大理司直高祖微時與相友大業中討賊河東表端
為副端遂數術密語高祖曰玉牀搖帝坐不安晉得歲真人將興安天下之亂者其在公乎但上性沈忌

內惡諸李今金才已誅次且取公宜早爲計帝感其言義師興端在河東吏捕送長安帝入京師釋囚引入臥內擢祕書監李密之降關東地未有所屬端請假節招諭乃拜大將軍爲河南道招慰使卽傳檄州縣東薄海南捷淮二十餘州遣使順附次譙州會亳汴二州刺史已降王世充道塞無所歸計窮彷徨麾下二千人糧盡不忍委端去端乃殺馬宴大澤中謂衆曰我奉王命義無屈公等有妻子徒死無益吾丐若首持與賊以取富貴衆號泣不忍視端亦泣欲自刎爭持之乃止行五日餓死十四三遇賊衆潰從者纒三十餘人遂東走纒登豆以食端持節臥起歎曰平生不知死地乃在此縱其下令去毋俱沒會李公逸守杞州勒兵迎端時河南地悉入世充公逸感端之節亦固守世充遣人以淮南郡公尙書少吏部印綬召端解所服衣以贈端曰吾天子使寧汙賊官耶非持首去不可見卽焚書及衣因解節毛懷之間道走宜陽歷崖峭榛莽比到其下僅有在者皆體髮癯焦人不堪視端入謁自謝無功不及危困狀帝憫之復拜祕書監出爲梓州刺史散祿粟周孤窮不爲子孫計貞觀元年卒

劉感岐州鳳泉人後魏司徒豐生孫也武德初以驃騎將軍戍涇州爲薛仁果所圍糧盡殺所乘馬啖士而煮骨自飲至和木屑以食城垂陷長平王叔良救之賊乃解與叔良出戰爲賊執還圍涇州令感約城中降感給諾至城下大呼曰賊大飢亡在朝暮秦王數十萬衆且至勉之無苦仁果怒執感埋其半土中

馳射之至死嘗益甚賊平高祖購得其尸祭以少牢贈瀛州刺史爵平原郡公封戶二千諡忠壯詔其子嗣封爵賜田宅焉

常達陝州陝人仕隋爲鷹擊郎將嘗從高祖征伐與宋老生戰霍邑軍敗自匿帝意已死久乃自歸帝大悅命爲統軍拜隴州刺史時薛舉方強達敗其子仁果斬首千級舉遣將什士政給降達不疑厚加撫接士政伺隙劫之并其衆二千歸賊舉指其妻謂達曰識皇后乎答曰彼嫗老嫗何所道舉奴張貴又曰亦識我否達瞋目曰若乃奴耳貴忿舉笏擊其面達不爲懼亦拔刀逐之趙弘安爲蔽捍乃免仁果平帝見達勞曰君忠節正可求之古人爲執士政殺之賜達布帛三百段以達并劉感事授史臣令狐德棻云終隴西刺史

敬君弘絳州絳人北齊尙書右僕射顯備曾孫也累功歷驃騎將軍封黔昌侯以屯營兵守玄武門隱太子之死左右解散其車騎將軍馮立者有材武歎曰生賴其寵死不共難我無以見士大夫乃與巢王親將謝叔方率兵攻玄武門殊死鬪君弘挺身出或曰事未可判當按兵待變成列而鬪可也不從與中郎將呂世衡呼而進皆戰歿立願其下曰足以報太子矣遂解兵走君弘等敗秦府兵不振尉遲敬德擲巢王首示叔方叔方下馬慟亦出奔明日自歸太宗曰義士也置之俄而立又至帝讓曰汝離我兄弟罪一

也殺我將士罪二也何所逃死答曰出身事主當戰之日不知其它因伏地悲不自勝帝亦勞遣之詔贈君弘左屯衛大將軍世衡右驍衛將軍立已蒙貸歸語人曰上赦吾罪吾當以死報未幾突厥犯便橋立引數百騎與虜薄敗之咸陽帝喜授廣州都督前日牧守苛肆爲蠻夷患故數叛立至不事家產衣食弗求羸嘗見貪泉曰此豈隱之所酌邪吾雖日汲庸易吾性哉遂劇飲去在職不三年有惠愛卒于官叔方歷伊州刺史善治軍戎華愛之累加銀青光祿大夫徙洪廣二州都督卒諡曰勤本萬年人從巢王征討有功王表爲屈咤眞府左軍騎云

呂子臧蒲州河東人剛直健于吏隋大業末爲南陽郡丞捕擊盜賊有功高祖入京師遣馬元規慰輯山南獨子臧堅守元規遣士諷曉子臧殺之及煬帝已弑帝更使其壻薛君倩齋詔言隋所以亡諭子臧子臧爲故君發喪訖卽送款就拜鄧州刺史封南陽郡公武德初朱粲新謁子臧率兵與元規并力元規兵不進子臧曰乘賊新敗上下惶沮一戰可禽若遷延其衆稍集吾食盡致死於我不可當也不納子臧請以所部兵獨進又不許俄而粲得衆復張元規嬰城子臧扼腕曰謀不見用坐公死矣賊圍固會霖雨雉堞崩剝或勸其降子臧曰我天子方伯且降賊乎乃率麾下數百人赴敵死城亦陷元規死之元規安陸人初以隊正從帝征伐持節下南陽得兵萬餘然無謀以至於敗

王行敏并州樂平人隋末爲盜長高祖興來降拜潞州刺史遷屯衛將軍劉武周入并州寇上黨取長子壺關或言刺史郭子武懦不支且失潞帝遣行敏馳往既至與子武不叶賊圍急儲侍空乏衆恟懼行敏患之會有告子武謀反遂斬之州民陳正謙者以信義稱鄉里出粟千石濟軍由是人自奮賊乃去行敏又敗竇建德兵於武陟武德四年督兵徇燕趙與劉黑闥戰歷亭破之旣而釋甲不設備爲黑闥所掩縛致麾下終不屈賊遂斬之且死西向跪曰臣之忠惟陛下知之帝聞而悼惜黑闥之亂死事者又有盧士叡李玄通

士叡客韓城隋亂結納英豪高祖與之舊及兵興率數百入上謁汾陰又使兄子諭降劇賊孫華與劉弘基敗隋將桑顯和於飲馬泉擢累右光祿大夫爲瀛州刺史黑闥遣輕騎破其郭拒戰半日士見親屬係虜乃潰士叡爲賊禽欲使說下城堡不從見殺

玄通藍田人爲隋鷹揚郎將高祖入關率所部自歸拜定州總管爲黑闥所破愛其才欲以爲將玄通曰吾當守節以報烏能降志賊邪不聽囚之故吏有餉飲餽者玄通曰諸君見哀吾能一醉遂縱飲謂守者曰吾能劍舞可借刀守士與之曲終仰天大息曰大丈夫撫方面不能保所守尙何視息邪乃潰腹死帝爲流涕擢其子伏護大將軍

羅士信齊州歷城人隋大業時長白山賊王薄左才相孟讓攻齊郡通守張須陁率兵擊賊士信以執衣年十四短而悍請自効須陁疑其不勝甲少之士信怒被重甲左右韃上馬顧眄須陁許之擊賊濰水上陣纒列執長矛馳入賊營刺殺數人取一級擲之承以矛戴而行賊皆貽懼無敢亢須陁乘之大破賊士信逐北每殺一賊輒剽鼻納諸懷暨還驗以代級須陁歎伏遣以所乘馬凡戰須陁先登士信副以為常煬帝遣使圖須陁士信陣法上內史後須陁為李密所殺士信與裴仁基歸密署總管俾統所部討王世充身被重創見獲於世充世充愛其才厚遇之與同寢食後得密將郟元真等故士信稍稍疏斥士信恥與伍率所部千餘人來降高祖拜陝州道行軍總管因謀世充士信行則先鋒反則殿有所獲悉散戲下有功者或脫衣解馬賜之士以故用命然持法嚴至親舊無少貸其下亦不甚附師次洛陽攻千金堡堡有惡言詢軍士信怒夜遣百人載嬰兒唬譟堡下若自東都出奔者既而陽悟曰非也此千金堡耳因散去堡兵開門追掠士信伏入屠之無類賊平授絳州總管封郟國公從秦王擊劉黑闥洛水上得一城王君廓戍之賊急攻潰而出王語諸將孰能守此士信曰願以守乃命之士信已入賊悉眾攻方雨雪救軍不得進城陷黑闥欲用之不屈而死年二十八王隱悼購其尸以葬諡曰勇初士信為仁基所禮及東都平出家財斂葬北邙以報德且曰我死當墓其側至是如所志

張道源并州祁人名河以字顯年十四居父喪士人賢其孝縣令郭湛署所居曰復禮鄉至孝道源嘗與客夜宿客暴死道源恐主人忽怖臥尸側至曙乃告又徒步護送還其家隋末政亂辭監察御史歸閬里高祖興署大將軍府戶曹參軍至賈胡堡復使守并州京師平遣撫慰山東下燕趙有詔褒美封累范陽郡公淮安王神通略定山東令守趙州為竇建德所執會建德寇河南問遣人詣朝請乘虛擣賊心脅即詔諸將率兵影接俄而賊平還拜大理卿時何稠得罪籍其家屬賜羣臣道源曰禍福何常安可利人之亡取其子女自奉仁者不為也更資以衣食遣之天子見其年耆拜綿州刺史卒贈工部尚書諡曰節道源雖官九卿無貲產比亡餘粟二斛詔賜帛三百段

族孫楚金有至行與兄越石皆舉進士州欲獨薦楚金固辭請俱罷都督李勣歎曰士求才行者也既能讓何嫌皆取乎乃並薦之累進刑部侍郎儀鳳初彗見東井上疏陳得失高宗欽納賜物二百段武后時歷秋官尚書爵南陽侯有清槩然尚文刻當時亦少之為酷吏所搆流死嶺表

李育德趙州人祖諤仕隋通州刺史為名臣世富于財家僮百人天下亂乃私完械甲嬰武陟城自保人多從之遂為長劇賊來掠不能克隋亡與柳燮等歸李密私署總管密為王世充所破以郡來降即拜陟州刺史兄厚德自賊所逃歸度河復被執賊使招育德陽許之故兄不死賊帥段大師令裨校以兵守厚

德陰得其驩乃與州人賈慈行謀逐賊慈行夜登城呼曰唐兵登矣厚德自獄擁羣囚謀而出斬長史衆不敢動大師縋城走卽拜殷州刺史厚德省親留育德以守引兵拔賊河內堡三十一所世充怒悉銳士攻之城陷猶力戰與三弟皆歿時死節者又有李公逸張善相凡三人

公逸者與族弟善行居雍州以才雄爲衆所歸始附王世充策其必敗乃獻款高祖因其地置杞州卽拜總管封陽夏郡公以善行爲刺史世充遣其弟將徐毫兵攻之公逸請援未報因使善行守身入朝言狀至襄城爲賊邏送洛陽世充曰君越鄭臣唐何哉答曰我於天下唯聞有唐賊怒斬之善行亦死帝悼惜封其子襄邑縣公

善相襄城人大業末爲里長督兵迹盜爲衆附賴乃據許州奉李密密敗挈州以來詔卽授伊州總管王世充攻之屢困賊遣使三輩請救朝廷未暇也會糧盡衆餓死善相謂僚屬曰吾爲唐臣當効命君等無庸死斬吾首以下賊可也衆泣不肯曰與公同死愈於獨生城陷被執罵賊見殺高祖歎曰吾負善相善相不負我乃封其子襄城郡公

高叡京兆萬年人隋尙書左僕射頰孫也舉明經稍遷通義令有治勞人刻石載德歷趙州刺史平昌縣子聖麻初突厥默啜入寇叡嬰城拒虜攻益急長史唐波若度且陷卽與虜通叡覺之力不能制卽自經

不得死爲虜執使降諭諸縣不肯應見殺初虜至有爲叡計者突厥蓋銳所向無完公不能亢且當下之答曰我刺史不戰而降罪大矣武后歎息贈冬官尙書諡曰節詔誅波若籍其家下制暴叡忠節波若臣賊使天下知之

子仲舒通故訓學擢明經爲相王府文學王所欽器開元初宋璟蘇頌當秉多咨訪焉時舍人崔琳練達政宜璟等禮異之常語人曰古事問高仲舒時事問崔琳何復疑終太子右庶子

安金藏京兆長安人在太常工籍睿宗爲皇嗣少府監裴匪躬中官范雲仙坐私謁皇嗣皆殊死自是公卿不復見唯工優給使得進俄有誣皇嗣異謀者武后詔來俊臣問狀左右畏慘楚欲引服金藏大呼曰公不信我言請剖心以明皇嗣不反也引佩刀自割腹中腸出被地眩而仆武后聞大驚與致禁中命高醫內腸褫桑杜紕之闊夕而蘇后臨視歎曰吾有子不能自明不如爾之忠也卽詔停獄睿宗乃安當是時朝廷士大夫翕然稱其誼自以爲弗及也神龍初母喪葬南闕口營石墳晝夜弗息地本中燥泉忽湧流廬之側李冬有華犬鹿相擾本道使盧懷慎上其事詔表闕于閭景雲時遷右武衛中郎將玄宗屬其事於史官擢右驍衛將軍爵代國公詔鑲其名於秦華二山碑以爲榮卒配饗睿宗廟廷大厯中贈兵部尙書諡曰忠以子承恩爲廬州長史中和中擢其遠孫敬則爲太子右諭德

王同皎相州安陽人陳駙馬都尉寬曾孫也陳亡徙河北長安中尚太子女安定郡主拜典膳郎太子中宗也桓彥範等誅二張遣同皎與李湛李多祚即東宮迎太子請至玄武門指授諸將太子拒不許同皎進曰逆豎反道顯肆不軌諸將與南衙執事刻期誅之須殿下到以係眾望太子曰上方不豫得無不可乎同皎曰將相毀家族以安社稷奈何欲內之鼎鑊乎太子能自出諭之眾乃止太子猶豫同皎即扶上馬從至玄武門斬關入兵趨長生殿太后所環侍嚴定因奏誅易之等狀帝復位擢右千牛將軍封琅邪公食實戶五百主進封公主拜同皎駙馬都尉遷光祿卿神龍後武三思烝濁王室同皎惡之與張仲之祖延慶周憬李俊冉祖雍謀須武后靈駕發伏弩射殺三思會播州司兵參軍宋之慈以外妹妻延慶延慶辭之慈固請乃成昏延慶心厚之不復疑故之慈子曇得其實之慈兄之問嘗舍仲之家亦得其謀令曇密語三思三思遣俊上急變且言同皎欲擁兵闕下廢皇后帝殊不曉大怒斬同皎於都亭驛籍其家同皎且死神色自如仲之延慶皆死憬遁入比干廟自剄將死謂人曰比干古忠臣神而聰明其知我乎后三思亂朝虐害忠良滅亡不久可干吾頭國門見其敗也憬壽春人後太子重俊誅三思天下共傷同皎之不及見也睿宗立詔復官爵諡曰忠壯誅祖雍俊等先是許州司戶參軍燕欽融再上書斥韋后擅政且逆節已萌后怒勸中宗召至廷撲殺之宗楚客復私令衛士極力故死又博陵人郎崧亦表后及楚

客亂被誅至是俱贈諫大夫備禮改葬賜欽融一子官

同皎子繇尚永穆公主生子潛字弘志生三日賜緋衣銀魚幼莊重不喜兒弄以帝外孫補千牛復選尚公主固辭元和中擢累將作監吏或籍名北軍輒驕墮不事潛悉奏罷之故不戒而辦監無公食而息錢舊皆私有至潛取以具食遂為故事遷左散騎常侍拜涇原節度使憲宗與對大悅曰吾知而善職我自

用之潛至鎮繕壁壘積粟構高屋侍兵利而嚴遂引師自原州踰硤石取虜將一人斥烽候築歸化潘原

二壘請復城原州度支沮議故原州復陷穆宗即位封琅邪郡公更節度荆南疏吏惡榜之里閭殺尤縱

者分射三等課士習之不能者罷故無冗軍太和初檢校尚書左僕射卒于官贈司空

吳保安字永固魏州人氣挺特不俗睿宗時姚嵩變叛拜李蒙為姚州都督宰相郭元振以弟之子仲翔

託蒙蒙表為判官時保安罷義安尉未得調以仲翔里人也不介而見曰願因子得事李將軍可乎仲翔

雖無雅故哀其窮力薦之蒙表掌書記保安後往蒙已深入與蠻戰沒仲翔被執蠻之俘華人必厚責財

乃肯贖聞仲翔貴胄也求千緡會元振物故保安留嵩州營贖仲翔苦無資乃力居貸十年得緡七百妻

子客遂州聞闕求保安所在困姚州不能進都督楊安居知狀異其故贊以行求保安得之引與語曰子

棄家急朋友之患至是乎吾請貸官貲助子之乏保安大喜即委緡于蠻得仲翔以歸始仲翔為蠻所奴

三逃三獲乃轉鬻遠會嚴遇之晝役夜囚役凡十五年乃還安居亦丞相故吏嘉保安之誼厚禮仲翔遺衣服備用檄領近縣尉久乃調蔚州錄事參軍以優遷代州戶曹母喪服除喟曰吾賴吳公生吾死今親歿可行其志乃求保安于時保安以彭山丞客死其妻亦沒喪不克歸仲翔爲服縗經囊其骨徒跣負之歸葬魏州廬墓三年乃去後爲嵐州長史迎保安子爲娶而讓以官

李愷并州汶水人或言其先出興聖皇帝譜系疏晦不復傳父希倩神龍初右臺監察御史愷少秀敏舉明經高第授成安尉張說罷宰相爲相州刺史坐有善相者說徧問官屬後孰當貴工指愷及臨河尉鄭巖說以女妻巖而歸其甥陰於愷會母喪免自武功尉以政尤異遷主簿說在并州引愷置幕府及執政爲長安尉宇文融括天下田高選官屬多致賢以重其柄表假愷監察御史分道檢察以課貢拜御史坐小累下除晉陽令三遷給事中力于治有任事稱明簿最下無敢給失李林甫意出爲河南少尹尹蕭晁內倚權飭法植私愷裁抑其謬吏下賴之道士孫甌生以左道幸託祠事往來嵩少間干請亂吏治愷不爲應故挾見譖諸朝天寶初除清河太守舉美政遷廣陵長史民爲立祠賽祝歲時不絕以捕賊負徒彭城太守封酒泉縣侯連徙襄陽河東並兼採訪處置使入爲京兆尹楊國忠惡之改光祿卿東京留守安祿山反玄宗遣封常清募兵東京愷與留臺御史中丞盧奕河南尹達奚珣繕城壘綏勵士卒將遏賊西

錄帝開擢禮部尙書祿山度河號令嚴密候詞不能知已陷陳留滎陽殺張介然崔無諛不數日薄城下常清兵皆白徒戰不勝輒北愷收殘士數百哀斷弦折矢堅守人不堪鬪愷約奔吾曹荷國重寄雖力不敵當死官部校皆夜縋去愷坐留守府奔守臺城陷祿山鼓而入虜數千人矢著闕門執愷奔及官屬蔣清害之有詔贈司徒諡曰忠懿河洛平再贈太尉拜一子五品官愷通左氏春秋頗殖產伊川占膏腴自都至闕口疇聖彌望時謂地瘠巖仕終少府監產利埒愷云愷十餘子江涵灑灑等同遇害唯源彭脫源八歲家覆俘爲奴轉側民間及史朝義敗故吏識源於洛陽者贖出之歸其宗屬代宗聞授河南府參軍遷司農主簿以父死賊手常悲憤不仕不娶絕酒葷惠林佛祠者愷舊墅也源依祠居閩戶日一食祠殿其先寢也每過必趨未始踐階自營墓爲終制時偃臥塋中長慶初年八十矣御史中丞李德裕表薦源曰賈誼稱守圉扞敵之臣死城郭封疆天寶時士卒伏節逆羯始興委符組棄城郭者不爲恥而愷約義同列守位自加抵刃就終臣節之光由愷始而源天與至孝絕心祿仕五十餘年常守沈默理契深要一辭開析百慮洗然抱此真節棄於清世臣竊爲陛下惜之穆宗下詔曰昔盜起幽陵振蕩河洛贈太尉愷處難居首正色就死兩河聞風再固危壁殊節卓焉到今稱之源有曾參之行葉父之操泊然無營訖此高年夫喪忠所以勸臣節也旌孝所以激人倫也鎮澆浮莫如尙義厚風俗莫如尊老舉是四者大

微于時其以源守諫議大夫賜緋魚袋河南尹遣官敦諭上道帝自遣使者持詔書袍笏即賜又賜絹二百匹源頓首受詔謂使者伏疾年耄不堪趨拜即附表謝辭吐哀慙一無受尋卒敬宗時擢澄孫爲河南兵曹參軍

彭擢明經第天寶中選名臣子可用者自咸寧丞遷右補闕從天子入蜀後澄數年卒有孫景讓景莊景溫別傳武德功臣十六人貞觀功臣五十三人至德功臣二百六十五人德宗卽位錄武德以來宰相及實封功臣子孫賜一子正員官史館考勳名特高者九十二人以三等條奏第一等以其歲授官第二等以其次年第三等子孫數訟於朝有詔差爲二等增至百八十七人每等武德以來宰相爲首功臣次之至德以來將相又次之大中初又詔求李峴王珪戴胄馬周褚遂良韓瑗郝處俊婁師德王及善朱敬則魏知古陸象先張九齡裴寂劉文靜張柬之袁恕己崔玄暉桓彥範劉幽求郭元振房瑄袁履謙李嗣業張巡許遠盧弈南霽雲蕭華張鎬李勉張鎰蕭復柳渾賈耽馬燧李愷三十七人畫像續圖凌煙閣云司空太子太傅知門下省事梁國公房玄齡
尙書右僕射檢校侍中萊國公杜如晦
太子太保同中書門下三品宋國公蕭瑀

開府儀同三司同中書門下三品知政事上柱國申國公高士廉

太子太師知政事特進鄭國公魏徵

侍中永寧郡公王珪

吏部尙書參預朝政道國公戴胄

中書令江陵縣子岑文本

中書令兼太子左庶子檢校吏部尙書高唐縣公馬周

侍中兼太子左庶子檢校吏部禮部民部尙書事清苑縣男劉洎

尙書右僕射同中書門下三品河南郡公褚遂良

太子太師同中書門下三品燕國公子志寧

尙書右僕射同中書門下三品兼太子少傅北平縣公張行成

中書令行侍中兼太子少保舊縣公高季輔

侍中兼太子賓客襲潁川縣公韓瑗

中書令兼太子詹事南陽縣侯來濟

侍中兼太子賓客張文瓘

侍中甌山縣公郝處俊

中書侍郎同中書門下三品兼太子右庶子酒泉縣公李義琰

內史河東縣侯裴炎

文昌左相同鳳閣鸞臺三品溫國公蘇良嗣

內史梁國公狄仁傑

納言檢校并州大都督府長史天兵軍大總管隴右諸軍大使譙縣子冀師德

鳳閣侍郎同鳳閣鸞臺平章事石泉縣公王方慶

文昌左相同鳳閣鸞臺三品襲邢國公王及善

尚書右僕射兼中書令知兵部尚書事齊國公魏元忠紫微令梁國公姚崇

正諫大夫同鳳閣鸞臺平章事朱敬則

尚書左僕射同中書門下平章事許國公蘇瓌

吏部尚書兼侍中廣平郡公宋璟

黃門監梁國公魏知古

中書侍郎同中書門下平章事兗國公陸象先

紫微侍郎同紫微黃門平章事許國公蘇頌

中書令河東縣侯張嘉貞

中書侍郎同中書門下平章事清水縣公李元紘

黃門侍郎同中書門下平章事宜陽縣子韓休

中書令始興縣伯張九齡

司空河東郡公裴寂

納言上柱國魯國公劉文靜

太尉檢校中書令同中書門下三品揚州大都督趙國公長孫無忌

禮部尚書河間郡王孝恭

尚書右僕射檢校中書令行太子左衛率上柱國衛國公李靖

司空兼太子太師英國公李勣

乾隆四年校刊

唐書卷一百九十一列傳

開府儀同三司鄜州都督鄂國公尉遲敬德

左光祿大夫洛州都督蔣國公屈突通

陝東道大行臺吏部尚書鄖國公殷開山

衛尉卿夔國公劉弘基

澤州刺史邳國公長孫順德

民部尚書上柱國莒國公唐儉

右驍衛大將軍駙馬都尉譙國公柴紹

右驍衛大將軍襄國公段志玄

洪州都督渝國公劉政會

左武侯將軍相州都督鄴國公張公謹

右武衛大將軍盧國公程知節

左武衛大將軍上柱國胡國公秦叔寶

弘文館學士祕書監永興縣公虞世南

右衛大將軍兼太子右衛率工部尚書武陽縣公李大亮

右武衛大將軍邢國公蘇定方

夏官尚書同中書門下三品清邊道行軍總管耿國公王孝傑

中書令漢陽郡公張柬之

中書令博陵郡公崔玄暉

侍中平陽郡公敬暉

侍中譙國公桓彥範

中書令南陽郡公袁恕己

右武衛大將軍同中書門下三品韓國公張仁愿

尚書左丞相兼黃門監徐國公劉幽求

黃門侍郎參知機務修文館學士齊國公崔日用

兵部尚書同中書門下三品代國公郭元振

尚書左丞相兼中書令集賢院學士燕國公張說

乾隆四年校刊

唐書卷一百九十一列傳

紫微侍郎上柱國趙國公王珣

兵部尚書同中書門下三品持節朔方軍節度大使中山郡公王峻

尚書左僕射同中書門下平章事兼河南江淮副元帥東都留守冀國公裴冕

文部尚書同中書門下平章事清河縣公房瑄

門下侍郎同中書門下平章事衛國公杜鴻漸

鎮西北廷行營節度使開府儀同三司衛尉卿兼懷州刺史魏國公李嗣業

平盧軍節度使柳城郡太守劉正臣

恆州刺史衛尉少卿兼御史中丞顏杲卿

常山郡太守袁履謙

河南節度副使左金吾衛將軍檢校主客郎中兼御史中丞張巡

睢陽郡太守兼御史中丞許遠

御史中丞留臺東都知武選盧弈

睢陽郡太守特進左金吾衛將軍南霽雲

右第一

內史令延安郡公竇威

將作大匠判納言陳國公竇抗

侍中兼太子左庶子江國公陳叔達

納言觀國公楊恭仁

判吏部尚書參議朝政安吉郡公杜淹

中書令虞國公溫彥博

中書侍郎檢校刑部尚書參知機務崔仁師

中書令兼檢校太子詹事上柱國安國公崔敦禮

戶部尚書平恩縣公許圜師

兵部尚書同中書門下三品俱江道行軍總管任雅相

度支尚書同中書門下三品范陽郡公盧承慶

西臺侍郎同東西臺三品兼弘文館學士楚國公上官儀

乾隆四年校刊 唐書卷一百九十一 列傳

右相廣平郡公劉祥道

左侍極兼檢校左相嘉興縣子陸敦信

文昌左相同鳳閣鸞臺三品樂城縣公劉仁軌

荊州大都督府長史安平郡公李安期

尚書右僕射同中書門下三品兼太子賓客襲道國公戴至德

司列少常伯太子右中護兼正諫大夫同東西臺三品趙仁本

中書令趙國公李敬玄

中書令兼太子左庶子薛元超

中書令同中書門下三品崔知溫

侍中同中書門下三品襲廣平郡公劉齊賢

納言樂平縣男王德真

地官尚書檢校納言鉅鹿縣男魏玄同

文昌左相同鳳閣鸞臺三品特進輔國大將軍鄧國公岑長倩

第一百七十九批

鳳閣侍郎同鳳閣鸞臺三品臨淮縣男劉祿之

納言博昌縣男李思謙

地官尚書同鳳閣鸞臺平章事格輔元

司禮卿判納言事渤海縣子歐陽通

內史李昭德

鸞臺侍郎同鳳閣鸞臺平章事陸元方

鳳閣侍郎同鳳閣鸞臺三品杜景佺

尚書右僕射兼太子賓客同中書門下三品鄆國公章安石

左散騎常侍同中書門下三品知東都留守趙郡公李懷遠

中書令趙道公韋嗣立

守侍中同中書門下三品兼太子右庶子常山縣男李日知

檢校黃門監滄陽縣伯盧懷慎

中書令左丞相兼侍中安陽郡公源乾曜

黃門侍郎同紫微黃門平章事魏縣侯杜暹

侍中趙城侯裴耀卿

左武衛大將軍開府儀同三司淮安王神通

特進太常卿江夏王道宗

荊州都督周國公武士彟

右屯衛大將軍檢校晉州都督總管譙國公竇琮

少府監萬國公劉義節

右光祿大夫羅國公張平高

洛州都督右衛大將軍鄆國公竇勣

夔州都督息國公張長遜

金紫光祿大夫夷國公李子和

左監門衛大將軍檢校右武侯將軍榮國公樊興

左監門衛大將軍樂國公錢九隴

右驍衛大將軍歸國公安興貴

右武衛大將軍申國公安修仁

殿中監鄧國公宇文士及

右武衛大將軍沔陽郡公公孫武達

荊州都督懷遠郡公杜君綽

右驍衛將軍濮國公龐卿暉

代州都督同安郡公鄭仁恭

右翊衛將軍遂安郡公李安遠

幽州都督慮陽郡公獨孤彥雲

始州刺史左屯衛大將軍襄武郡公劉師立

右威衛大將軍濟東郡公李孟嘗

右監門衛大將軍河南縣公元仲文

右監門衛將軍廬陵郡公壽師行

乾隆四年校刊

唐書卷一百九十一列傳

左領軍大將軍新興公馬三寶

右衛大將軍駙馬都尉畢國公阿史那社尒

鎮軍大將軍虢國公張士貴

左衛大將軍琅邪郡公牛進達

鎮軍大將軍嘉州郡公周護

陝州刺史天水郡公巨行恭

潭州都督吳興郡公沈叔安

散騎常侍豐城縣男姚思廉

太子少師同中書門下三品特進朔方道行軍大總管宋國公唐休璟

左羽林軍大將軍遼陽郡王李多祚

左領軍大將軍趙國公李湛

刑部尚書太子賓客魏國公楊元琰

殿中監兼知總監汝南郡公翟無言

冠軍大將軍左羽林軍大將軍光祿卿天水縣公趙承恩

將作大匠裴思諒

右羽林軍將軍弘農郡公楊執一

左衛將軍河東郡公薛思行

光祿卿駙馬都尉琅邪郡公王同皎

中書令越國公鍾紹京

太僕卿立節郡王薛崇簡

右金吾衛大將軍涼國公李延昌

太子中允同正冀國公馮道力

少府監趙國公崔諤之

左監門衛中候光祿卿申國公許輔乾

左金吾衛大將軍鄧國公張暉

朔方道行軍大總管左羽林軍大將軍平陽郡公薛訥

河南副元帥太尉兼侍中臨淮郡王李光弼

河東節度副大使守司空兼兵部尚書霍國公王思禮

左相幽國公韋見素

太保韓國公苗晉卿

中書令趙國公崔圓

太原節度使檢校尚書左僕射同中書門下平章事金城郡王辛雲京

河西隴右副元帥兵部尚書同中書門下平章事涼國公李抱玉

太子太師檢校尚書右僕射知省事信都郡王田神功

四鎮北庭涇原節度使檢校尚書左僕射知省事扶風郡王馬璘

左羽林軍大將軍檢校戶部尚書兼御史大夫薛景仙

右散騎常侍檢校禮部尚書兼御史大夫尚衡

太原尹兼御史大夫北都留守河東節度副大使南陽郡公鄧景山

河東節度副使兼鴈門郡太守光祿卿賈循

禮部尚書東京留守酒泉縣侯李燧

東平郡太守姚闡

右第二

盧弈黃門監懷慎少子也疏眉目豐下謹重寡欲斤斤自脩與兄奐名相上下而剛毅過之天寶初僞鄆令所治輒最積功擢給事中拜御史中丞自懷慎奐及弈三居其官清節似之時傳其美俄留臺東都兼知武部選安祿山陷東都吏亡散弈前遣妻子懷印間道走京師自朝服坐臺被執將殺之即數祿山罪徐顧賊徒曰為人臣者當識逆順我不蹈失節死何恨觀者恐懼弈臨刑西向再拜而辭罵賊不空口逆黨為變色肅宗詔贈禮部尚書下有司諡時以為洛陽亡操兵者任其咎執去吏去之可也委身寇讎以死誰歎博士獨孤及曰荀息殺身於晉不食其言也玄冥勤其官水死守位忘躬也伯姬待姆而火死先禮後身也彼死之日皆於事無補然則祿山亂大於里丕弈廉察之任切於玄冥之官分命所繫不啻保姆逆黨兵威烈於水火于斯時也能與執干戈者同其戮力挽之不來推之不去全操白刃之下孰與夫懷安偷生者同其風請諡曰貞烈詔可子杞別有傳杞子元輔

元輔字子望少以清行聞擢進士補崇文校書郎杞死德宗念之不忘拜元輔左拾遺歷杭常絳三州刺

史課當最召授吏部郎中進累兵部侍郎為華州刺史卒元輔端靜介正能紹其祖故歷顯劇而人不以杞之惡為累云

張介然者猗氏人本名六朗性慎愿長計畫始為河隴支郡太守王忠嗣皇甫惟明哥舒翰踵領節度並署營田支度等使入奏稱旨賜與良渥介然啟曰臣位三品當給棨戟若列於京師雖富貴不為鄉人知願得列戟故里玄宗許之別賜戟京師第門仍賜絹五百匹宴閭里長老本鄉得列戟自介然始翰薦為少府監歷衛尉卿祿山反授河南節度採訪使守陳留陳留據水陸劇居民孳夥而太平久不知戰介然到屯不三日賊已度河車騎蹂躪煙塵漫數十里日為奪色士聞鉦鼓聲皆褫氣不能授甲凡旬六日城陷初有詔購賊首而暴誅慶宗狀祿山入陳留見詔書拊膺大哭曰我何罪吾子亦何罪乃殺之即大恚憤殺陳留降者萬人以暹血流成川斬介然於軍門以僞將李廷望為節度使守陳留祿山已拔陳留則鼓而前無敢亢中宿攻滎陽太守崔無詵率眾乘城聞師譟自墜如雨無詵與官屬皆死賊手以僞將武令珣戍焉無詵者本皇后外家博陵舊望也始無詵娶蕭至忠女至忠敗被貶久乃為益州司馬素善楊國忠既用事引為少府監守滎陽有詔贈禮部尚書諡曰毅勇

唐書卷一百九十一

唐書卷一百九十二

宋 端 明 殿 學 士 宋 祁 撰

列傳第一百二十七

忠義中

顏杲卿字昕與真卿同五世祖以文儒世家父元孫有名垂拱間為濠州刺史杲卿以蔭調遂州司法參軍性剛正莅事明濟嘗為刺史請讓正色別白不為屈開元中與兄春卿弟曜卿並以書判超等吏部侍郎席豫咨嗟推伏再以最遷范陽戶曹參軍安祿山聞其名表為營田判官假常山太守祿山反杲卿及長史袁履謙謁于道賜杲卿紫袍履謙緋袍令與假子李欽澹以兵七千屯土門杲卿指所賜衣謂履謙曰與公何為著此履謙悟乃與真定令賢深內臣令張通幽定謀圖賊杲卿入稱疾不視事使子泉明往還計議陰結太原尹王承業為應使平盧節度副使賈循取幽州謀泄祿山殺循以向潤客牛廷珣守泉卿陽不事事委政履謙潛召處士權渙郭仲崑定策時真卿在平原素聞賊逆謀陰養死士為拒守計李愷等死賊使段子光傳首徇諸郡真卿斬子光遺甥盧遜至常山約起兵斷賊北道杲卿大喜以為兵犄角可挫賊西鋒乃矯賊命召欽澹計事欽澹夜還杲卿辭城門不可夜開舍之外郵使履謙及參軍馮虔

乾隆四年校刊 唐書卷一百九十二列傳

郡豪翟萬德等數人飲勞既醉斬之并殺其將潘惟慎賊黨殲投尸泮沱水履謙以首示臬卿則喜且泣先是祿山遣將高邈召兵范陽未還臬卿使棗城尉崔安石圖之邈至滿城處萬德皆會傳會安石給以置酒邈捨馬處叱吏縛之而賊將何千年自趙來處亦執之日未中送二賊臬卿乃遣萬德深通幽傳欽濬首械兩賊送京師與臬明偕至太原王承業欲自以爲功厚遣臬明還陰令壯士殺番賊於路番不平告之故乃免玄宗擢承業大將軍送吏皆被賞已而事顯乃拜臬卿衛尉卿兼御史中丞履謙常山太守深司馬卽傳檄河北言王師二十萬入土門遣郭仲崇領百騎爲先鋒馳而南曳柴揚塵望者謂大軍至日中傳數百里賊張獻誠方圍饒陽棄甲走於是趙鉅鹿廣平河間並斬僞刺史傳首常山而樂安博陵上谷文安信都魏郡諸郡皆自固臬卿兄弟兵大振祿山至陝關兵興大懼使史思明等率平盧兵度河攻常山蔡希德自懷會師不涉旬賊急攻城兵少未及爲守計求救於河東承業前已殲殺賊功兵不出臬卿晝夜戰并竭糧矢盡六日而陷與履謙同執賊酋使降不應取少子季明加刃頸上曰降我當活而子臬卿不答遂并盧遯殺之臬卿至洛陽祿山怒曰吾擢爾太守何所負而反臬卿瞋目罵曰汝營州牧羊羯奴耳竊荷恩寵天子負汝何事而乃反乎我世唐臣守忠義恨不斬汝以謝上乃從爾反耶祿山不勝忿縛之天津橋柱節解以肉噉之誓不絕賊鉤斷其舌曰復能言否臬卿含胡而絕年六十五履謙旣

斷手足何千年弟適在傍咀血噴其面賊嚮之見者垂泣臬卿宗子近屬皆被害臬卿已虜諸郡復爲賊守張通幽以兄相賊譖臬卿於楊國忠故不加贈肅宗在鳳翔真卿表其枉會通幽爲普安太守上皇杖殺之李光弼郭子儀收常山出臬卿履謙二家親屬數百人於獄厚給遺令行喪乾元初贈臬卿太子太保諡曰忠節封其妻崔清河郡夫人初博士裴郁以臬卿不執政但諡曰忠議者不平故以二字諡焉邈季明及宗子等皆贈五品官建中中又贈臬卿司徒初臬卿被殺徇首于衢莫敢收有張濬者得其髮持謁上皇是昔見夢帝寤爲祭後濬歸髮于其妻妻疑之髮若動云後臬明購尸將葬得刑者言死時一足先斷與履謙同坎瘞指其域得之乃葬長安鳳栖原季明邈同塋臬明有孝節喜振人之急旣爲承業所遣未至而常山陷故客壽陽史思明圍李光弼獲臬明裹以革送幽州間關得免思明歸國而真卿方爲蒲州刺史令臬明到河北求宗屬始一女及姑女並流離賊中及是并得之悉錢三萬贖姑女還取贖復往則已女復失之履謙及父故將妻子奴隸尙三百餘人轉徙不自存臬明悉力贖給分多勻薄相扶挾度河託真卿真卿隨所歸資送之臬明之殯父與履謙分柩護還長安履謙妻疑斂具儉狹發視之與臬卿等乃號踊待臬明如父肅宗拜臬明郾令政化清明誅宿盜人情翕然成都尹舉其課第一遷彭州司馬家貧居官廉而孤藐相從百口飢寒不給無愠歎居母喪毀骨立其行義當世以爲難

春卿儻美姿儀通當世務十六舉明經拔萃高第調犀浦主簿嘗送徒於州亡其籍至廷口記物色凡千人無所差長史陸象先異之轉蜀尉蘇頌代爲長史被譖繫獄爲椹欄賦自託頌遠出之魏徵遠孫瞻罪抵死春卿爲請玉真公主得不死時人高其節終偃師丞臨終捉真卿臂曰爾當大吾族顧我不得見以諸子諉汝後真卿主其昏嫁沈盈者亦臬卿甥有行義明黃老學解褐博野尉與臬卿同死難贈大理正官其二子遙達

賈循者京兆華原人其先家常山父會有高節嘗稱疾不答辟署里中號一龍親亡負土成墓廬其左手薛松栢時號關中曾子卒縣人私諡曰廣孝徵君循有大略禮部尙書蘇頌嘗謂今頗牧及爲益州表署列將敗吐蕃於西山三遷靜塞軍營田使張守珪北伐次灤河屬凍泮欲濟無梁循揣廣狹爲橋以濟破虜而還以功擢游擊將軍榆關守捉使地南負海北屬長城林垠岑巖寇所蔽伏循調士斬木開道賊遁去范陽節度使李適之薦爲安東副大都護安祿山兼平盧節度表爲副選博陵太守祿山欲擊奚契丹復奏循光祿卿兼副使知留後九姓叛祿山兼節度河東而循亦兼鴈門副之毋亡將葬宅有枯桑一夕再生芝出北墉人以爲瑞玄宗以循有功詔贈其父常山太守祿山反使循守幽州故臬卿招之以傾賊巢穴循許可爲向潤客等發其謀賊縊之建中二年贈太尉諡曰忠

從子隱林爲承平兵馬使嘗入衛屬朱泚難率衆扈行在德宗見隱林偉其貌問家世答曰故范陽節度副使循臣從父也帝異之引至臥內以手板畫地陳攻守計即奏曰臣嘗夢日墜以首承之帝曰非朕耶因令糾察行在遷檢校右散騎常侍封武威郡王賊圍急隱林與侯仲莊冒矢石死戰已而解從臣稱慶隱林流涕前曰泚已奔羣臣大慶宗社無疆之休然陛下資性急不能容掩若不悛雖今賊亡憂未艾也帝不以爲忤拜神策統軍卒帝思其質直贈尙書左僕射以實戶三百封其家

張巡字巡鄧州南陽人博通羣書曉戰陣法氣志高邁略細節所交必大人長者不與庸俗合時人叵知也開元末擢進士第時兄曉已位監察御史皆以名稱重一時巡繇太子通事舍人出爲清河令治績最而負節義或以困阨歸者傾貲振護無吝秩滿還都於是楊國忠方專國權勢可炙或勸一見且顯用答曰是必爲國怪祥朝宜不可爲也更調真源令土多豪猾大吏華南金樹威恣肆邑中語曰南金口明府手巡下車以法誅之赦餘黨莫不改行遷善政簡約民甚宜之安祿山反天寶十五載正月賊曾張通晤陷宋曹等州譙郡太守楊萬石降賊逼巡爲長史使西迎賊軍巡率吏哭玄宗皇帝祠遂起兵討賊從者千餘初靈昌太守嗣吳王祇受詔合河南兵拒祿山有單父尉賈贛者閬州刺史璿之子率吏稱吳王兵擊宋州通晤走襄邑爲頓丘令盧諶所殺贛引軍進至雍丘巡與之合有衆二千是時雍丘令令孤潮舉

縣附賊遂自將東敗淮陽兵虜其眾反接在廷將殺之暫出行部淮陽囚更解縛起殺守者迎責等入潮不得歸巡乃屠其妻子磔城上祇聞承制拜責監察御史潮怨責還攻雍丘責趨門為眾躡死巡馳騎決戰身被創不顧士乃奉巡主軍間道表諸朝騰牋祇府祇乃舉竟以東委巡經略潮以賊眾四萬薄城人大恐巡諭諸將曰賊知城中虛實有輕我心今出不意可驚而潰也乘之勢必折諸將曰善巡乃分千人乘城以數隊出身前驅直薄潮軍軍却明日賊攻城設百樓巡柵城上束芻灌膏以焚焉賊不敢向巡伺隙擊之積六旬大小數百戰士帶甲食裹瘡鬪潮遂敗走追之幾獲潮怒復率眾來然素善巡至城下情語巡曰本朝危感兵不能出關天下事去矣足下以羸兵守危堞忠無所立盍相從以苟富貴乎巡曰古者父死於君義不報子乃衞妻孥怨假力于賊以相圖吾見君頭于通衢為百世笑奈何潮赦然去當此時王命不復通大將大人白巡以勢不敵且上存亡莫知不如降六人者皆官開府特進巡陽許諾明日堂上設天子畫像率軍士朝人人盡泣巡引六將至責以大誼斬之士心益勸會糧乏潮餉賊鹽米數百艘且至巡夜壁城南潮悉軍來拒巡遣勇士衞枚濱河取鹽米千斛焚其餘而還城中矢盡巡縛藁為人千餘被黑衣夜縋城下潮兵爭射之久乃藁人還得箭數十萬其後復夜縋人賊笑不設備乃以死士五百斫潮營軍大亂焚壘幕追奔十餘里賊慙益兵圍之薪水竭巡給潮欲引眾走請退軍二舍使我逸潮

不知其謀許之遂空城四出三十里撤屋發木而還為備潮怒圍復合巡徐謂潮曰君須此城歸馬三十匹我得馬且出奔請君取城以藉口潮歸馬巡悉以給驍將約曰賊至人取一將明日潮責巡答曰吾欲去將士不從奈何潮怒欲戰陣未成三十騎突出禽將十四斬百餘級收器械牛馬潮遁還陳留不復出七月潮率賊將瞿伯玉攻城遣僞使者四人傳賊命招巡巡斬以徇餘繫送祇所圍凡四月賊常數萬而巡眾纔千餘每戰輒克於是河南節度使嗣號王巨屯彭城假巡先鋒俄而魯東平陷賊濟陰太守高承義舉郡叛巨引兵東走臨淮賊將楊朝宗謀趨寧陵絕巡餉路巡外失巨依拔眾保寧陵馬裁三百兵三千至睢陽與太守許遠城父令姚暉等合乃遣將雷萬春南霽雲等領兵戰寧陵北斬賊將二十殺萬餘人投尸于汴水為不流朝宗夜去有詔拜巡主客郎中副河南節度使巡籍將士有功者請于巨巨纔授折衝果毅巡諫曰宗社尚危圍陵孤外渠可吝賞與貲巨不聽至德二載祿山死慶緒遣其下尹子琦將同羅突厥奚勁兵與朝宗合凡十餘萬攻睢陽巡勵士固守日中二十戰氣不衰遠自以材不及巡請稟軍事而居其下巡受不辭遠專治軍糧戰具前此遠將李滔救東平遂叛入賊大將田秀榮潛與通或以告遠曰晨出戰以碧帽為識視之如言盡覆其眾還輒曰我誘之也請以精騎往易錦帽遠以告巡巡召登城讓之斬首示賊因出薄戰子琦敗獲車馬牛羊悉分士秋毫無入其家有詔拜巡御史中丞遠侍御

史闡吏部郎中巡欲乘勝擊陳留子琦聞復圍城巡語其下曰吾蒙上恩賊若復來正有死耳諸君雖捐軀而賞不直勳以此痛恨聞者感槩乃椎牛大饗悉軍戰賊望兵少大笑巡遠親鼓之賊潰追北數十里其五月賊刈麥乃濟師巡夜鳴鼓嚴隊若將出賊申警俄息鼓賊覘城上兵休乃弛備巡使南霽雲等開門徑抵子琦所斬將拔旗有大酋被甲引拓羯千騎麾幟乘城招巡巡陰縋勇士數十人墮中持鉤陌刀彊弩約曰聞鼓聲而奮會恃衆不爲備城上謀伏發禽之弩注矢外向救兵不能前俄而縋士復登陴賊皆愕眙乃按甲不出巡欲射子琦莫能辨因刻蒿爲矢中者喜謂巡矢盡走白子琦乃得其狀使霽雲射一發中左目賊還七月復圍城初睢陽穀六萬斛可支一歲而巨發其半饑濮陽濟陰遠因爭不聽濟陰得糧卽叛至是食盡士日賦米一勺斲木皮鬻紙而食才千餘人皆羸劣不能戰救兵不至賊知之以雲衝傅縡巡出鉤干柱之使不得進篝火焚梯賊以鉤車木馬進巡輒破碎之賊服其機不復攻穿壕立柵以守巡士多餓死者皆瘞傷氣乏巡出愛妾曰諸君經年乏食而忠義不少衰吾恨不割肌以啖衆竄惜一妾而坐視士饑乃殺以大饗坐者皆泣巡彊令食之遠亦殺奴僮以哺卒至羅雀掘鼠煮鐵弩以食賊將李懷恩過城下巡問君事胡幾何曰二暮巡曰君祖父官乎曰然君世受官食天子粟奈何從賊關弓與我爾懷忠曰不然我昔爲將數死戰竟沒賊此殆天也巡曰自古悖逆終夷滅一日事平君父母妻

子並誅何忍爲此懷忠掩涕去俄率其黨數十人降巡前後說降賊將甚多皆得其死力御史大夫賀蘭進明代巨節度屯臨淮許叔冀尙衡次彭城皆觀望莫肯救巡使霽雲如叔冀請師不應遺布數千端霽雲嫚罵馬上請決死闕叔冀不敢應巡復遣如臨淮告急引精騎三十冒圍出賊萬衆遮之霽雲左右射皆披靡旣見進明進明曰睢陽存亡已決兵出何益霽雲曰城或未下如已亡請以死謝大夫叔冀者進明麾下也房琯本以牽制進明亦兼御史大夫勢相埒而兵精進明懼師出且見襲又忌巡聲威恐成功初無出師意又愛霽雲壯士欲留之爲大饗樂作霽雲泣曰昨出睢陽時壯士不粒食已彌月今大夫兵不出而廣設聲樂義不忍獨享雖食弗下咽今主將之命不達霽雲請置一指以示信歸報中丞也因拔佩刀斷指一坐大驚爲出涕卒不食去抽矢回射佛寺浮圖矢著輒曰吾破賊還必滅賀蘭此矢所以志也至真源李賁遺馬百匹次寧陵得城使廉坦兵三千夜冒圍入賊覺拒之且戰且引兵多死所至才千人方大霧巡聞戰聲曰此霽雲等聲也乃啟門驅賊牛數百入將士相持泣賊知外援絕圍益急衆議東奔巡遠議以睢陽江淮保障也若棄之賊乘勝鼓而南江淮必亡且帥饑衆行必不達十月癸丑賊攻城士病不能戰巡西向拜曰孤城備竭弗能全臣生不報陛下死爲鬼以癘賊城遂陷與遠俱執巡衆見之起且哭巡曰安之勿怖死乃命也衆不能仰視子琦謂巡曰聞公督戰大呼輒背裂血面嚼齒皆碎何至

是答曰吾欲氣吞逆賊顧力屈耳子琦怒以刀抉其口齒存者三四巡罵曰我爲君父死爾附賊乃犬彘也安得久子琦服其節將釋之或曰彼守義者烏肯爲我用且得衆心不可留乃以刃脅降巡不屈又降霧雲未應巡呼曰南八男兒死爾不可爲不義屈霧雲笑曰欲將有爲也公知我者敢不死亦不肯降乃與姚閻雷萬春等三十六人遇害巡年四十九初子琦議生致一人慶緒所或曰用兵拒守者巡也乃送遼洛陽至偃師亦以不屈死巨之走臨淮巡有姊嫁陸氏遮王勸勿行不納賜百緡弗受爲巡補縫行間軍中號陸家姑先巡被害巡長七尺鬚髯每怒盡張讀書不過三復終身不忘爲文章不立臺守睢陽士卒居人一見問姓名其後無不識更潮及子琦大小四百戰斬將三百卒十餘萬其用兵未嘗依古法勒大將教戰各出其意或問之答曰古者人情敦樸故軍有左右前後大將居中三軍望之以齊進退今胡人務馳突雲合鳥散變態百出故吾止使兵識將意將識士情上下相習人自爲戰爾其械甲取之於敵未嘗自修每戰不親臨行陣有退者巡已立其所謂曰我不去此爲我決戰士感其誠皆一當百待人無所疑賞罰信與衆共苦寒寒暑雖旰養必整衣見之下爭致死力故能以少擊衆未嘗敗被圍久初殺馬食既盡而及婦人老弱凡食三萬口人知將死而莫有叛者城破遺民止四百而已始肅宗詔中書侍郎張鎬代進明節度河西率浙東李希言浙西司空襲禮淮南高適青州鄧景山四節度犄角救睢陽巡亡

三日而鎬至十日而廣平王收東京鎬命中書舍人蕭昕誅其行時議者或謂巡始守睢陽衆六萬既糧盡不持滿按隊出再生之路與夫食人寧若全人於是張澹李紆董南史張建封樊晃朱巨川李翰咸謂巡蔽遮江淮沮賊勢天下不亡其功也翰等皆有名士由是天下無異言天子下詔贈巡揚州大都督遠荆州大都督霧雲開府儀同三司再贈揚州大都督並寵其子孫睢陽雍丘賜徭稅三年巡子亞夫拜金吾大將軍遠子致婺州司馬皆立廟睢陽歲時致祭德宗差次至德以來將相功效尤著者以顏杲卿袁履謙盧弈及巡遠霧雲爲上又贈姚閻潞州大都督官一子貞元中復官巡它子去疾遠子峴贈巡妻申國夫人賜帛百自是訖僖宗求忠臣後無不及三人者大中時圖巡遠霧雲像于凌煙閣睢陽至今祠享號雙廟云

許遠者右相敬宗曾孫寬厚長者明吏治初客河西章仇兼瓊辟署劍南府欲以子妻之固辭兼瓊怒以事劾貶高要尉更赦還會祿山反或薦遠於玄宗召拜睢陽太守遠與巡同年生而長故巡呼爲兄大歷中巡子去疾上書曰孽胡南侵父巡與睢陽太守遠各守一面城陷賊所入自遠分尹子琦分郡部曲各一方巡及將校三十餘皆剖心剖肌慘毒備盡而遠與麾下無傷巡臨命歎曰嗟乎人有可恨者賊曰公恨我乎答曰恨遠心不可得誤國家事若死有知當不赦於地下故遠心向背梁宋人皆知之使國威喪

劾巡功業墮敗則遠於臣不共戴天請追奪官爵以刷冤恥詔下尚書省使去疾與許峴及百官議皆以去疾證狀最明者城陷而遠獨生也且遠本守睢陽凡屠城以生致主將爲功則遠後巡死不足惑若曰後死者與賊其先巡死者謂巡當叛可乎當此時去疾尙幼事未詳知且艱難以來忠烈未有先二人者事載簡書若日星不可妄輕重議乃罷然議者紛紜不齊元和時韓愈讀李翰所爲巡傳以爲闕遠事非是其言曰二人者守死成名先後異耳一家子弟材下不能通知其父志使世疑遠畏死而服賊遠誠畏死何苦守尺寸地食其所愛之肉抗不降乎且見援不至人相食而猶守雖甚愚亦知必死矣然遠之不畏死甚明又言城陷自所守此與兒童之見無異且人之將死其臟腑必有先受病者引繩而絕之其絕必有處今從而尤之亦不達於理矣愈於褒貶尤慎故著之

南霽雲者魏州頓丘人少微賤爲人操舟祿山反鉅野尉張沼起兵討賊拔以爲將尙衡擊汴州賊李廷望以爲先鋒遣至睢陽與張巡計事退謂人曰張公開心待人真吾所事也遂留巡所巡固勸歸不去衡齎金帛迎霽雲謝不受乃事巡巡厚加禮始被圍築臺募萬死一生者數日無敢應俄有暗鳴而來者乃霽雲也巡對泣下霽雲善騎射見賊百步內乃發無不應弦斃子承嗣歷涪州刺史劉闢叛以無備謫承

州

雷萬春者不詳所來事巡爲偏將令孤潮圍雍丘萬春立城上與潮語伏弩發六矢著面萬春不動潮疑刻木人謀得其實乃大驚遙謂巡曰向見雷將軍知君之令嚴矣潮壁雍丘北謀襲襄邑寧陵巡使萬春引騎四百壓潮先爲賊所包巡突其圍大破賊潮遁去萬春將兵方略不及霽雲而彊毅用命每戰巡任之與霽雲鈞

姚聞者開元宰相崇從孫父奔楚州刺史聞性豪蕩好飲謔善絲竹歷壽安尉素善巡及爲城父令遂同守睢陽累加東平太守巡之遺霽雲萬春敗城於寧陵也別將二十有五石承平李辭陸元鍾朱珪宋若虛楊振威耿慶禮馬日昇張惟清廉坦張重孫景趨趙連城王森喬紹俊張恭默祝忠李嘉隱翟良輔孫廷皎馮顏其後皆死巡難四人逸其姓名

贊曰張巡許遠可謂烈士矣以疲卒數萬嬰孤壘抗方張不制之虜鯁其喉牙使不得搏食東南牽掣首尾逐潰梁宋間大小數百戰雖力盡乃死而唐全得江淮財用以濟中興引利償害以百易萬可矣巡先死不爲遽遠後死不爲屈巡死三日而救至十日而賊亡天以完節付二人畀名無窮不待留生而後顯也惟宋三葉章聖皇帝東巡過其廟留駕裴回咨巡等雄挺盡節異代著金石刻贊明厥忠與夷齊餓賸西山孔子稱仁何以異云

唐書卷一百九十二

Blank columns for text in the right-hand page.

唐書卷一百九十三

宋 端 明 殿 學 士 宋 祁 撰

列傳第一百一十八

忠義下

程千里京兆萬年人長七尺魁岸有力應募積西累官安西副都護天寶末兼北廷都護安西北廷節度使突厥首領阿布思內附本隸朔方賜氏李名獻忠度屬幽州素與安祿山有怨內懼故叛還積外數盜邊玄宗患之詔千里將兵討捕千里諭葛邏祿陰令犄角獻忠果以窮歸葛邏祿縛之并妻子帳下數千人送千里所乃獻俘勤政樓詔斬以徇擢千里右金吾衛大將軍留宿衛祿山反詔募兵河東即拜節度副使雲中太守遷上黨長史賊來攻鑿馘多累加開府儀同三司禮部尚書至德二載賊將蔡希德圍上黨輕騎挑戰千里恃勇開縣門率百騎欲直禽希德幾得而救至乃退會橋壞馬顛為賊執仰首敕諸騎使還曰為我報諸將可失帥不可失城軍中皆為泣下增備固守賊不能下乃還囚千里至東都安慶緒偽署特進囚客省慶緒敗為嚴莊所害後赦令數下追襲死難者惟千里生見執不及云初祿山搆難西北戍兵悉入援故河隴郡縣皆陷吐蕃惟河西戍將袁光廷為伊州刺史固守歷年雖游說百緒終不降

諸下同心無攜畔者及糧竭手殺妻子自焚死建中初贈工部尚書

龐堅京兆涇陽人四世祖玉事隋爲監門直閤李密據洛口玉以關中銳兵屬王世充擊之自戰不虧世充歸東都秦王東徇洛玉率萬騎降高祖以隋舊臣禮之玉魁梧有力明軍法久宿衛習知朝廷制度帝顧諸將多不閑儀檢故授玉領軍武衛二大將軍使衆觀以爲模倣出爲梁州總管巴山獠叛玉梟其首餘黨四奔屬縣獠與反者州里親戚爲賊游說言不可窮躡玉不聽下令軍中日穀熟吾盡收以饋軍非盡賊吾不反聞者懼相謂曰軍不止吾穀盡且餓死乃共入賊營與所親相結斬渠長以降衆遂潰徙越州都督召爲監門大將軍太宗以耆厚令主東宮兵雖老不怠小大之務無不親卒帝爲廢朝贈幽州都督工部尚書堅歷潁川太守安祿山反南陽節度使魯晁表堅爲長史兼防禦副使以薛愿爲潁川太守共守潁川時陳留滎陽已陷賊南陽被圍而潁川當往來劇賊將阿史那承慶悉銳攻之傅城百里樹木皆刊城中士單寡糧少而堅晝夜戰諸郡兵無援者自正月盡十一月賊設木鵝衝車飛梯薄城矢如雨士皆雷譟夜半踰城入二人不肯降賊縛致東京將磔解之有說祿山曰義士也彼爲其主殺之不祥乃縛于樹比且死見者哭之愿汾陰人父縉太常卿兄崇一娶惠宣太子女其女弟爲太子瑛妃瑛廢貶愿嶺外久乃得還

張興者東鹿人長七尺一飯至斗米肉十斤悍趨而辯爲饒陽裨將祿山反攻饒陽興開張禍福譬曉敵人而嬰城彌年衆心遂固滄趙已陷史思明引衆傅城興擐甲持陌刀重五十斤乘城賊將入興一舉刀輒數人死賊皆氣懾城破思明縛之馬前好謂曰將軍壯士能屈節當受高爵對曰昔嚴顏一巴郡將猶不降張飛我大郡將安能委身逆虜今日幸得死然願以一言爲誠思明曰云何興曰天子遇祿山如父子今乃反大丈夫不能爲國掃除反爲其下何哉思明曰將軍不觀天道邪吾上起兵二十萬直趣洛陽天下大定以偏師叩函谷守將面縛唐亡固矣興曰桀紂秦隋窮人力舉四海與爲怨故商周漢唐因得代之而有神器皇帝無違德祿山非數帝賢是苟延歲月終卽禽耳思明怒鋸解之且死罵曰吾能哀驅死兵敗賊衆軍中凜然爲改容

蔡廷玉幽州昌平人事安祿山未有聞與朱泚同里閉少相狎近泚爲幽州節度使奏署幕府廷玉有沉略善與人交內外愛附泚多所叩咨數遣至京師當是時幽州兵最彊財雄士驕悍日思吞并不知有上下禮法廷玉間語泚曰古未有不臣而能推福及子孫者公南聯趙魏北奚虜兵多地險然非永安計一日趙魏反噬公乃沸鼎魚耳不如奉天子劉多難可勒勳鼎彝若何泚善之廷玉陰欲耗其力則諷泚出金幣禮士又勸歸貢賦助天子經費獻牛馬係道儲廩爲單因勸泚入朝泚將聽諸校怒縛廷玉辱之廷

玉無撓辭泚不忍殺囚歲餘出之謂曰而亦悔乎廷玉曰導公爲逆卽悔勉公以義何悔爲復藝滿歲問曰能省過否不爾且死對曰不殺我公得名殺我吾得名泚不能屈待如初又有朱體微者亦泚腹心廷玉有建白體微輒左右之故泚愈信桀傲稍革廷玉遂歲朝事泚乃奏涿州爲永泰軍薊州靜塞軍瀛州清夷軍莫州唐興軍置團練使以支郡隸屬盧龍軍稍削而泚內畏弟滔偪已滔亦勸泚入朝乃以軍屬滔廷玉體微共白泚公入朝爲功臣首後務至重須誠信者乃可付滔雖大弟多變不情如假以兵是嫁之禍也泚不聽二人隨泚到朝德宗爲太子時知廷玉名及見禮眷殊渥泚統幽州行營爲涇原鳳翔節度使詔廷玉以大理少卿爲司馬體微爲要籍滔有請於泚或不順廷玉必折之俾循故法滔已破田悅懷傲肆自用左右有惡廷玉者妄云素毀滔欲四分燕廷玉倡之體微和之滔表言二人離間骨肉請殺於有司亦遺泚書云云泚患滔奪其軍不從會滔以幽州叛帝示滔表而泚亦白發其書乃歸罪於二人貶廷玉柳州司戶參軍體微南浦尉以慰滔滔使諜伺諸朝曰上若不殺廷玉當謫去得東出洛我且縛致麾下支解之將行帝勞廷玉曰爾姑行爲國受屈歲中當還廷玉至藍田驛人白左巡使鄭詹商於道險不可往詹追使趨潼關廷玉告子少誠少良曰我爲天子不血刃下幽十一城欲裂其壤使不得桀而敗於將成天助逆耶今更使我出東都此殆滔計吾不可以辱國比至靈寶自投于河宰相盧杞方疾御

史大夫嚴郢欲逐之得廷玉死狀卽抵簷死而斥出郢帝閱廷玉忠歸其柩厚賻之李晟平朱泚少誠等適終喪晟表丐追贈廷玉并官二子而帝方招來滔寢其奏遂已

符令奇沂州臨沂人初爲盧龍軍裨將會幽州亂挈子璘奔昭義節度使薛嵩署爲軍副嵩卒田承嗣盜其地引令奇爲右職田悅拒命馬燧敗之洹水令奇密語璘曰吾聞世事多矣自安史干紀無噍類吾觀田氏覆亡無時安用苟且夕係縲京師宗族屠地汝能委質朝廷爲唐忠臣吾亦名揚後世矣璘泣曰悅忍人也近禍可畏答曰今王師四合吾屬俎中醢兒今行吾死不朽不行吾亦死尸疊逆地云何璘俯泣不能對初悅與李納會濮陽因乞師納分麾下隨之至是納兵歸齊使璘以三百騎護送璘與父嚙臂別乃以衆降燧璘之出與三子同降悅怒引令奇切讓令奇罵曰爾忘義背主且夕死吾教子以順殺身庸何悔鈞死愈爾達矣悅怒奮而起令奇臨刑色不變年七十九夷其家燧署璘爲軍副詔拜特進封義陽郡王旣聞父見害號絕泣血燧表其冤加檢校左散騎常侍賜晉陽第一區祁田五十頃贈令奇戶部尚書

璘字元亮李懷光反詔燧討之璘介五千兵先濟河與西師合從燧入朝爲輔國大將軍賜靖恭里第一區藍田田四十頃璘之降母匿里中獨免及悅死詔迎於魏賜宴別殿璘居環衛十三年卒年六十五贈

越州都督

劉迺字永夷河南伊闕人少警穎聞誦六經日數千言善文詞爲時推目天寶中擢進士第喪父以孝聞服終中書舍人宋昱知銓事迺方調因進書曰書稱知人則哲能官人則惠此唐虞以爲難今文部始掄材終授位是知人官人兩任其責昔禹稷臯陶之聖猶曰載采有九德考績以九載今有司獨委一二小宰察言於一幅之判觀行於一揖之內何其易哉夫判者以狹詞短韻爲體是以小治鼓衆金雖欲爲鼎鑪不可得已故雖有周公尼父圖書易象之訓以判責之曾不及徐庾雖有至德以喋喋取之曾不若奮夫故干霄蔽日巨樹也求尺寸之材必後於樛杙龍吟虎嘯希聲也尙頰舌之感必下於蛙黾豈不悲乎執事誠能先政事次文學退觀其治家進察其臨節則雁鴻深沉之事亦可窺其門闕矣昱嘉之補剡尉劉晏在江西奏使巡覆充留後大厯中召拜司門員外郎德宗初進郭子儀爲尙父時冊禮廢視詔文者不適所宜宰相崔祐甫召迺至閣草之少選成文詞義典裁俄擢給事中權知兵部侍郎楊炎盧杞當國五歲不遷建中四年真拜兵部侍郎帝狩奉天迺臥疾私第朱泚遣人召之固稱篤復遣僞相蔣鎮慰誘迺佯瘖不答炎無術鎮再至知不可脅乃太息曰我嘗忝曹郎不能死盃以自辱羶腥復欲汗賢哲乎遂止迺聞車駕如梁州自投於牀搏膺呼天不食卒年六十帝聞其忠贈禮部尙書諡曰貞惠子伯芻別

傳

孟華史失其所人初事李寶臣爲府官屬論議倖倖不同舍疾之王武俊斬李惟岳遣華至京師陳事德宗問河朔利害華對稱旨擢檢校兵部郎中兼侍御史朱滔與武俊謀解田悅之圍帝詔華還諭欲亂其謀華至讓武俊曰安史未覆滅時大夫觀其兵自謂天下可取今日何汨汨且上於大夫恩甚厚將還康中丞他州而歸我深趙自古忠臣未有不先大功而後得高官者大夫何望於失地邪夫藥苦口者利病大夫後日思愚言悔無逮或曰華入朝私奏便宜欲傾我故得顯職武俊惑之然以華舊人未忍奪其職卒進援悅華從至臨清稱病還恒州武俊令子察所爲乃闔門謝賓客武俊知不足忌無殺華意既僭稱王授禮部侍郎不肯起嘔血死

張仵者本爲澤潞將守臨洛田悅攻之乘城固守累月士死糧且盡救不至仵悉召部將立軍門命女出徧拜因曰諸君戰良苦吾無貲爲賞願以是女賣直爲衆士一日費士皆哭曰請死戰會馬燧自河東將兵擊悅城下敗之仵乘勝出戰無不一當百以功遷泗州刺史居州十年擢右金吾衛大將軍未拜卒贈尙書右僕射軍中議立其子重政母徐及兄號訴不肯從奔告淮南節度使王鐔乃免詔嘉其忠起爲金吾衛大將軍委鐔處以劇職封徐魯國夫人

周曾者本李希烈部將與王玢姚愔章清志相善號四公子希烈反曾密得其計一二以告李勉玢爲許州鎮遏使會哥舒曜拔汝州希烈遣曾往拒曾欲引軍據蔡使玢爲應愔清居中謀取希烈密求藥毒希烈不死曾之行希烈使假子十人從次襄城知其謀以告希烈使李克誠率驍軍千人劫曾殺之而收其兵并殺玢愔始約事覺毋相引清懼陽說希烈曰今兵寡恐不能就事請乞師朱滔希烈然之至襄邑奔劉洽德宗贈曾太尉玢司徒愔工部尚書擢清安定郡王實封戶二百又有呂賁康秀琳梁興朝賈樂卿侯仙欽皆死希烈之難贈賁秀琳尚書左右僕射興朝等皆秩尚書遣蕭昕致祭境上命李勉哥舒曜訪其家子孫詔雖三世有罪常降一等曾無後貞元中女及曾兄子鄆爭襲封有司奏曾首謀歸順身死賊手陛下錫眞食不幸絕嗣宜令鄆以五十戶奉祀女亦封五十戶

張名振本事李懷光爲都將始懷光已立功德宗賜鐵券奉詔偃其名振到軍門大言曰太尉見賊不擊使到不迎將反耶且安史僕固等今皆族滅公欲何爲是資忠義士立功耳懷光召見諭以賊疆須蓄銳俟時誘爲不反及引軍入咸陽又曰公不反來此何邪不急攻泚收京城欲以賊誰遣懷光怒曰病狂人也使左右拉殺之

石演芬者本西域胡人事懷光至都將尤親信畜爲假子懷光軍三橋將與朱泚連和演芬使客部成義

到行在言懷光無破賊意請罷其總統成義走告懷光子璉懷光召演芬罵曰爾爲我子奈何欲破吾家今日負我宜卽死對曰天子以公爲股肱公以我爲腹心公乃負天子我何不負公且我胡人無異心惟知事一人不呼我爲賊死固吾分懷光使士饗食之皆曰烈士也可令快死以刀斷其頸德宗聞贈演芬兵部尚書賜其家錢三百萬斬成義於朔方

吳淑者章敬皇后之弟代宗立詔贈后祖神泉爲司徒父令珪太尉擢叔父令瑤太子家令濮陽郡公令瑜太子諭德濟陽郡公淑太子詹事濮陽郡公並開府儀同三司令瑤兄弟故爲縣令郎將矣而淑用盛王府參軍進俄遷鴻臚少卿金吾將軍建中初遷大將軍淑循循有禮讓無倨氣矜色見重朝廷時以爲材當所位不自戚屬者朱泚反盧杞白志貞皆謂泚有功不宜首難得大臣一人持節慰曉惡且懷德宗顧左右無敢行淑曰陛下不以臣亡能願至賊中諭天子至意帝大悅淑退謂人曰吾知死無益而決見賊者人臣食祿死其難所也方危時安得自計且不使陛下恨下無犯難者卽日齋詔見泚具道帝待以不疑者而泚業僭逆故留淑客省不遣卒被害帝悲梗甚贈太子太保諡曰忠賜其家實戶二百一子五品正員官京師平官庀其葬子士矩別傳

高沐者渤海人父馮事宣武李靈耀假守曹州靈耀反馮密遣人奏賊纖悉有詔卽拜曹州刺史會李正

己盜有曹濮馮不能自通朝廷死官下沐貞元中擢進士第以家託郵故李師古辟署判官師道叛沐率其僕郭昉郭航李公度引古今成敗前後鑄說不能入師道所厚吏李文會林英等乘間訴曰比悉心憂公家事而爲沐等所疾公奈何舉十二州地成沐輩千載名乎由是疏斥沐令守濮州沐上書盛夸山東煮海之饒得其地可以富國師道謀皆露後英奏事京師胥邸史言沐以誠款結天子師道怒誅沐而囚昉濮州守衛苛嚴凡十年吳元濟拒命師道引兵攻彭城敗蕭浦數縣而還以緩王師昉爲繪書藏衣絮間使郭航間道走武寧軍見李愿請奇兵三千浮海擣萊淄賊倚海不爲備且居皆罪人無與守始昉畏事泄署師道所信吏劉諒名以遺愿白諸朝議者疑師道使爲之不得報航不敢循故道間關回遠還昉所未幾師道召航昉疑事露欲引決航曰事覺吾獨死君無患航卒自殺遂絕及王師討師道諸節度兵四入而彭城兵下魚臺金鄉李聽軍取海州若拾遺頗用昉策初淮西平師道勢感內甚懼李公度與大將李英曇教獻三州使長子入侍師道然可俄中悔欲殺英曇賈直言諷師道嬖奴曰高沐冤氣在天禍且至英曇復死是益其祟也乃止逐于萊州俄殺之又有崔承寵楊偕陳佐崔清皆抗節忤賊李文會指爲沐黨沐之死皆被囚劉悟既平師道捉昉臂歔歔流涕辟置義成節度府亦請公度爲僚屬元和十四年贈沐吏部尚書委馬總備禮收葬恤其家航萊州人以氣聞師道署右職與昉世居齊初昉舉進士權

德輿將取之聞其家賊中乃罷遂爲賊聘二人卒能忠顯

賈直言河朔舊族也史失其地父道冲以藝待詔代宗時坐事賜鳩將死直言給其父曰當謝四方神祇使者少怠輒取鳩代飲迷而暗明日毒潰足而出久乃蘇帝憐之減父死俱流嶺南直言由是蹙後署師道府屬及師道不軌提刀負棺入諫曰願前死不見城之破又畫縛載檻車狀而妻子係纍者以獻師道怒囚之劉悟既入釋其禁辟署義成府後徙潞亦隨府遷監軍劉承偕與悟不平陰與慈州刺史張汶謀縛悟送闕下以汶代節度事洩悟以兵圍承偕殺小使直言遽入責曰司空縱兵脅天子使者是欲効李司空邪它日復爲軍中所指笑悟聞感悔匿承偕於第以免悟每有過必爭故悟能以臣節光明於朝穆宗召爲諫議大夫羣情灑然稱允而悟固留得聽始悟子從諫貴甚見直言輒衣紫擁笏以兵自衛直言諫悟曰郎少年毋使襲山東態朝服可擅著邪悟死從諫不發喪召大將劉武德等矯悟遺言與隣道使共表求襲位直言入讓曰父死不哭何顏面見山東義士乎從諫曰欲反耳直言仰天哭曰爾父提十二州地歸朝廷爲功臣然以張汶故自謂不潔淋頭卒羞死郎今日乃欲反邪從諫起抱直言項哭曰計窮而然直言曰君何憂無土地今齊朝廷正速死耳若從武德謀吾見劉氏爲元濟矣從諫拜曰唯大夫救之直言乃自攝留後使從諫居喪初從諫惟鄆兵二千同謀直言既折之軍中遂安太和九年卒贈工部

尙書

辛讜者太原尹雲京孫也學詩書能擊劍重然諾走人所急初事李嶧主錢穀性廉勁遇事不處文法皆與之合罷居揚州年五十不肯仕而慨然常有濟時意龐勛反攻杜愔於泗州讜聞之擊舟趨泗口貫賊柵以入愔素聞其名握手曰吾僚李延樞嘗爲吾道夫子爲人何意臨教吾無憂矣讜亦謂愔可共事乃請遣與妻子決同愔生死時賊張甚衆皆南走獨讜北行讜未至愔憂之延樞知必來曰讜至可表爲判官愔許諾俄而至愔喜曰國急飛鳥不敢過君乃冒白刃入危城古人所不能乃勸解白衣被甲賊將李圓焚淮口讜曰事棘矣獨出可以求援乃與楊文播李行實戊夜踰淮坎岸登馳三十里至洪澤見戍將郭厚本告急厚本許出兵大將袁公昇等曰賊衆我寡不可往讜拔劍瞋目呼曰泗州陷在旦夕公等被詔來乃逗留不進欲何爲大丈夫孤國恩雖生可羞且失泗則淮南爲寇場君尙能獨存吾今斷左臂殺君去推劍直前厚本持之公昇等僅免讜望泗慟哭帳下皆流涕厚本決許付兵五百讜曰足矣徧問士曰能行乎皆曰諾讜仆面于地泣以謝衆既叩准有人語曰賊破城矣讜將斬之衆爲請讜曰公等登舟吾赦其死士遽登已濟愔亦出兵表裏擊賊大敗讜入人心遂固浙西杜審權遣將翟行約赴援壁蓮塘愔欲遣人延勞諸吏憚不敢出讜獨往犒而還圍三月救兵外敗城益危讜復請乞兵淮南與壯士徐珍

十人持斧夜斬賊柵出見節度使令狐綯復詣浙西見審權時皆傳泗州已陷疑讜爲賊計囚之讜引李嶧自明嶧時爲大同防禦使稱其忠可信審權乃許救合淮南兵五千鹽粟具方淮路梗不得進讜引兵決戰斬賊六百級乃克入城上譴叫愔與下迎泣表其功于朝授監察御史圍凡十月乃解卒完一州初讜求救也過家十餘未嘗見妻子得糧累二十萬讜子及兄子客廣陵託愔曰使先人不乏祀公之惠也後以功第一拜亳州刺史徙曹泗二州乾符末終嶺南節度使方讜之少耕于野有牛鬪衆畏奔踐讜直前兩持其角牛不能動久而引觸竟折其角里人駭異屠牛以飯讜然讜羸短才及中人後貴力亦少衰云

黃碣閩人也初爲閩小將喜學問軒然有志向同列有假其筆者碣怒曰是筆它日斷大事不可假後戰安南有功高駢表其能爲漳州刺史徙婺州治有績劉漢宏遣兵攻之兵寡不可守棄州去客蘇州董昌爲威勝軍節度使表碣自副久乃應及昌反碣諫曰大王拔田畝席貢輸之勤位將相非有勳業可紀今不能盡忠王朝乃自尊大一日誅滅無種矣桓文不侮周室曹操弗敢危漢今王儼嬰一城乃爲大逆何邪碣請舉族先死不能見王之滅昌怒曰碣不順我邪斥出之碣移書幕府李滔曰順天建元以愚策之針可爲稍邪或竊其書示昌昌令使者斬之使以首至昌諾曰賊負我三公不肯爲而求死邪抵滬中東

其家百口坎鏡湖之南同瘞焉昌敗有詔贈司徒求其後不能得昌已殺碣滔亦遇害乃召會稽令吳錄
問策錄曰王爲真諸侯遺榮子孫而不爲乃作僞天子自取滅亡昌叱斬之族其家又召山陰令張遜知
御史臺固辭曰王自棄爲天下笑且六州勢不助逆王據孤州以速死謂何遜不敢以身許王也昌惡之
曰遜不知天意以邪說拒我囚之他日謂人曰我無碣錄遜何乏事卽害之

孫揆字聖圭刑部侍郎逖五世從孫也第進士辟戶部巡官歷中書舍人刑部侍郎京兆尹昭宗討李克
用以揆爲兵馬招討制置宣慰副使旣而更授昭義軍節度使以本道兵會戰克用伏兵刀黃嶺執揆厚
禮而將用之曰公輩當從容廟堂何爲自履行陣也揆大罵不訕克用怒使以鋸解之鋸齒不行揆謂曰
死狗奴解人當束之以板汝輩安知行刑者如其所言言聲不輟至死昭宗憐之贈左僕射

唐書卷一百九十三

唐書卷一百九十三考證

辛讜傳袁公昇○舊書作王公弁

唐書卷一百九十三考證

唐書卷一百九十四

宋 端 明 殿 學 士 宋 祁 撰

列傳第一百二十九

卓行

元德秀字紫芝河南河南人質厚少緣飾少孤事母孝舉進士不忍去左右自負母入京師既擢第母亡廬墓側食不鹽酪藉無茵席服除以窶困調南和尉有惠政黜陟使以聞擢補龍武軍錄事參軍德秀不及親在而娶不肯婚人以爲不可絕嗣答曰兄有子先人得祀吾何娶爲初兄子襁褓喪親無資得乳媪德秀自乳之數日湮流能食乃止既長將爲娶家苦貧乃求爲魯山令前此墮車足傷不能趨拜太守待以客禮有盜繫獄會虎爲暴盜請格虎自贖許之吏白彼詭計且亡去無乃爲累乎德秀曰許之矣不可負約卽有累吾當坐不及餘人明日盜尸虎還舉縣嗟歎玄宗在東都酺五鳳樓下命三百里縣令刺史各以聲樂集是時頗言帝且第勝負加賞黜河內太守鞏優伎數百被錦繡或作犀象環譎光麗德秀惟樂工數十人聯袂歌于薦于于薦于者德秀所爲歌也帝聞異之歎曰賢人之言哉謂宰相曰河內人其塗炭乎乃黜太守德秀益知名所得奉祿悉衣食人之孤遺者歲滿筭餘一緡滿柴車去愛陸渾佳山水

乾隆四年校刊

唐書卷一百九十四列傳

乃定居不爲牆垣局鑰家無僕妾歲饑日或不爨嗜酒陶然彈琴以自娛人以酒肴從之不問賢鄙爲酣
飲是時程休邢宇宇弟宙張茂之李嶠嶠族子丹叔惟岳喬潭楊拯房垂柳識皆號門弟子德秀善文辭
作騷士賦以自況房瑄每見德秀歎息曰見紫芝眉宇使人名利之心都盡蘇源明常語人曰我不幸生
衰俗所不耻者識元紫芝也天寶十三載卒家惟枕履簞瓢而已潭時爲陸渾尉庀其葬族弟結哭之慟
或曰子哭過哀禮歟結曰若知禮之過而不知情之至大夫弱無固性無專老無在死無餘人情所孰溺
喜愛可惡者大夫無之生六十年未嘗識女色視錦繡未嘗求足無苟辭佚色未嘗有十畝之地十尺之
舍十歲之僮未嘗完布帛而衣具五味之餐吾哀之以戒荒淫貪佞綺紈棄梁之徒耳李華兄事德秀而
友蕭穎士劉迅及卒華諡曰文行先生天下高其行不名謂之元魯山華於是作三賢論或問所長華曰
德秀志當以道紀天下迅當以六經諧人心穎士當以中古易今世德秀欲齊愚智迅感一物不得其正
穎士呼吸折節而獲重祿不易一刻之安易於孔子之門皆達者歟使德秀據師保之位瞻形容乃見其
仁迅被卿佐服居賓友謀治亂根源參乎元精乃見其妙穎士若百鍊之剛不可屈使當廢興去就一生
一死間而後見其節德秀以爲王者作樂崇德天人之極致而辭章不稱是無樂也於是作破陣樂辭以
訂商周迅世史官述禮易書春秋詩爲古五說條貫源流備古今之變穎士尤罪子長不編年而爲列傳

後世因之非典訓也自春秋三家後非訓齊生人不錄然各有病元病酒劉病賞物蕭病貶惡太亟獎能
太重若取其節皆可爲人師也世謂篤論休字士美廣平人字字紹宗宙字次宗河間人茂之字季豐南
陽人嶠字伯高丹叔字南誠惟岳字謨道趙人潭字源梁人垂字翼明清河人拯字齊物隋觀王雄後舉
進士終右驍衛騎曹參軍嶠擢制科遷南華令大水他縣飢人至相屬嶠爲具糞鬻及去糶糧送之吏爲
立碑安祿山亂嶠客清河爲乞師平原太守顏真卿一郡獲全歷廬州刺史拯與嶠名最著潭識以文傳
後

權臯字士繇秦州略陽人徙潤州丹徒晉安丘公翼十二世孫父倕與席豫蘇源明以藝文相友終羽林
軍參軍臯擢進士第爲臨清尉安祿山籍其名表爲勳尉署幕府臯度祿山且叛以其猜虐不可諫欲行
慮禍及親天寶十四載使獻俘京師還過福昌尉仲暮妻臯妹也密約以疾召之暮來臯暗陽直視暮
而瞑暮爲盡哀自含斂之臯逸去人無知者吏以詔書還臯母母謂實死慟哭感行路故祿山不之虞歸
其母臯潛候於淇門奉侍晝夜南奔客臨淮爲驛亭保以調北方既度江而祿山反天下聞其名爭取以
爲屬高適表試大理評事淮南採訪判官承王舉兵脅士大夫臯詭姓名以免玄宗在蜀聞之拜監察御
史會母喪得風痺疾客洪州南北梗否踰年詔命不至有中人過州頗求取無厭南昌令王遵欲按之謀

於學早長久不答泣曰今何由致天子使而遽欲治之掩面去遵悟厚謝浙西節度使顏真卿表爲行軍司馬召拜起居舍人固辭嘗曰吾潔身亂世以全吾志欲持是受名邪李季卿爲江淮黜陟使列其高行以著作郎召不就自中原亂士人率度江李華柳識韓洄王定皆仰臯節與友善洄定常評臯可爲宰輔師保華亦以爲分天下善惡一人而已卒年四十六洄等制服行哭詔贈祕書少監元和中諡爲貞孝子德輿至宰相別傳

甄濟字孟成定州無極人叔父爲幽涼二州都督家衛州宗屬以伉俠相矜濟少孤獨好學以文雅稱居青巖山十餘年遠近伏其仁環山不敢畋漁採訪使苗晉卿表之諸府五辟詔十至堅臥不起天寶十載以左拾遺召未至而安祿山入朝求濟於玄宗授范陽掌書記祿山至衛使太守鄭遵意致謁山中濟不得已爲起祿山下拜鈞禮居府中論議正直久之察祿山有反謀不可諫濟素善衛令齊玘因謁歸具告以誠密置羊血左右至夜若歐血狀陽不支昇歸舊廬祿山反使蔡希德封刀召之曰卽不起斷其頭見我濟色不動左手書曰不可以行使者持刀趨前濟引頸待之希德歔歔歎歎止刀以實病告後慶緒復使鹽輿至東都安國觀會廣平王平東都濟詣軍門上謁泣涕王爲感動肅宗詔館之三司署使汙賊官羅拜以媿其心授祕書郎或言太薄更拜太子舍人來瑱辟爲陝西襄陽參謀拜禮部員外郎宣城楚昭

王廟瑯地廣九十畝濟立暨其左瑣死屏居七年大厯初江西節度使魏少游表爲著作郎兼侍御史卒濟生子因其官字曰禮闈曰憲臺而禮闈死憲臺更名逢幼而孤及長耕宜城野自力讀書不謁州縣歲飢節用以給親里大糶則振其餘於鄉黨貧狹者朋友有緩急輒出家貲周贍以義聞逢常以父名不得在國史欲詣京師自言元和中袁滋表濟節行與權臯同科宜載國史有詔贈濟祕書少監而逢與元稹善稹移書於史館修撰韓愈曰濟棄去祿山及其反有名號又逼致之執不起卒不汙其名夫辨所從於居易之時堅其操於利仁之世而猶選懦者之所不爲蓋佛人之心難而害己之避深也至天下大亂死忠者不必顯從亂者不必誅而眷眷本朝甘心白刃難矣哉若甄生者弁冕不加其身祿食不進其口直布衣一男子耳及亂則延頸受刃分死不回不以不必顯而廢忠不以不必誅而從亂在古與今蓋百一焉愈答曰逢能行身幸於方州大臣以標目其先人事載之天下耳目微之天子追爵其父第四品赫然驚人逢與其父俱當得書矣由是父子俱顯名

陽城字元宗定州北平人徙陝州夏縣世爲官族資好學貧不能得書求爲吏隸集賢院竊院書讀之晝夜不出戶六年無所不通及進士第乃去隱中條山與弟堦城常易衣出年長不肯娶謂弟曰吾與若孤桴相育既娶則問外姓雖共處而益疏我不忍弟義之亦不娶遂終身城謙恭簡素遇人長幼如一遠近

幕其行來學者跡接于道閭里有爭訟不詣官而詣城決之有盜其樹者城過之慮其恥退自匿嘗絕糧遺奴求米奴以米易酒醉臥于路城怪其故與弟迎之奴未醒乃負以歸及覺痛咎謝城曰寒而飲何責焉寡妹依城居其子四十餘癡不知人城常負以出入始妹之夫客死遠方城與弟行千里負其柩歸葬歲饑屏跡不過隣里屑榆爲粥講論不輟有奴都兒化其德亦方介自約或哀其餒與之食不納後致糠覈數栝乃受山東節度府聞城義者發使遣五百織戒使者不令返城固辭使者委而去城置之未嘗發會里人鄭俶欲葬親貧於人無得城知其然舉織與之俶既葬還曰蒙君子之施願爲奴以償德城曰吾子非也能同我爲學乎俶泣謝即教以書俶不能業城更徙遠阜使顯其習學如初慙縊而死城驚且哭厚自咎爲服總麻瘞之陝虢觀察使李泌數禮餉城受之泌欲辟致之府不起乃薦諸朝詔以著作佐郎召并賜緋魚泌使參軍事韓傑奉詔至其家城封還詔自稱多病老憊不堪奔奉惟哀憐泌不敢置及爲宰相又言之德宗於是召拜右諫議大夫遣長安尉楊靈寶束帛詣其家城褐衣到闕下辭讓帝遣中人持緋衣衣之召見賜帛五十四匹初城未起縉紳想見風采旣興草茅處諫諍官士以爲且死職天下益憚之及受命它諫官論事苛細紛紛帝厭苦而城寢聞得失且熟猶未肯言韓愈作爭臣論譏切之城不屑方與二弟延賓客日夜劇飲客欲諫止者城揣知其情置飲客辭即自引滿客不得已與酬酢或醉仆

席上城或先醉臥客懷中不能聽客語無得關言常以木枕布衾質錢人重其賢爭售之每約二弟吾所俸入而可度月食米幾何薪菜鹽幾錢先具之餘送酒家無留也服用無贏副客或稱其佳可愛輒喜舉授之有陳萇者候其得俸常往稱錢之美月有獲焉居位八年人不能窺其際及裴延齡誣逐陸贄張滂李充等帝怒甚無敢言城聞曰吾諫官不可令天子殺無罪大臣乃約拾遺王仲舒守延英閣上疏極論延齡罪慷慨引誼申直贄等累日不止聞者寒懼城愈勵帝大怒召宰相抵城罪順宗方爲皇太子爲開救良久得免赦宰相諭遣然帝意不已欲遂相延齡城顯語曰延齡爲相吾當取白麻壞之哭於廷帝不相延齡城力也坐是下遷國子司業引諸生告之曰凡學者所以學爲忠與孝也諸生有久不省親者乎明日謁城還養者二十輩有三年不歸侍者斥之簡孝秀德行升堂上沈酗不率教者皆罷躬請經籍生徒斤斤皆有法度薛約者狂而直言事得罪謫連州吏捕迹得之城家城坐吏於門引約飲食訖步至都外與別帝惡城黨有罪出爲道州刺史太學諸生何蕃季償王魯卿李讜等二百人頓首闕下請留城柳宗元聞之遺蕃等書曰詔出陽公道州僕聞悵然幸生不諱之代不能論列大體聞下執事還陽公之南也今諸生愛慕陽公德懇懇乞留輒用撫手喜甚昔李膺稽康時太學生徒仰闕執訴僕謂訖千百年不可復見乃在今日誠諸生見賜甚厚將亦陽公漸漬導訓所致乎意公有博厚恢大之德并容善僞來者

不拒有狂賊小生依託門下飛文陳愚論者以爲陽公過於納汙無人師道仲尼吾黨狂狷南郭獻譏曾參徒七十二人致禍負芻孟軻館齊從者竊履彼聖賢猶不免如之何其拒人也俞扁之門不拒病夫繩墨之側不拒枉材師儒之席不拒曲士且陽公在朝四方聞風貪冒苟進邪薄之夫沮其志雖微師尹之位而人實瞻望焉與其化一州其功遠近可量哉諸生之言非獨爲己也於國甚宜蕃等守闕下數日爲吏遮抑不得上既行皆泣涕立石紀德至道州治民如治家宜罰罰之宜賞賞之不以簿書介意月俸取足則已官收其餘日炊米二斛魚一大器置甌杓道上人共食之州產侏儒歲貢諸朝城哀其生離無所進帝使求之城奏曰州民盡短若以貢不知何者可供自是罷州人感之以陽名子前刺史坐罪下獄吏有幸於刺史者拾不法事告城欲自脫城輒榜殺之賦稅不時觀察使數誚責州當上考功第城自署曰撫字心勞追科政拙考下下觀察府遣判官督賦至州怪城不迎以問吏吏曰刺史以爲有罪自囚於獄判官驚馳入謁城曰使君何罪我奉命來候安否耳留數日城不敢歸小門闔寢館外以待命判官遽辭去府復遣官來按舉義不欲行乃載妻子中道逃去順宗立召還城而城已卒年七十贈左散騎常侍賜其家錢二十萬官護喪歸葬蕃和州人事父母孝學太學歲一歸父母不許間二歲乃歸復不許凡五歲慨然以親且老不自安揖諸生去乃共閉蕃空舍中衆共狀蕃義行白城請留會城罷亦止初朱泚反諸

生將從亂蕃正色叱不聽故六館之士無受汙者蕃居太學二十年有死喪無歸者皆身爲治喪償魯人魯卿第進士有名

司空圖字表聖河中虞鄉人父與有風幹當大中時盧弘正管鹽鐵表爲安邑兩池權鹽使先是法疏闊吏輕觸禁輿爲立約數十條莫不以爲宜以勞再遷戶部郎中圖咸通末擢進士禮部侍郎王凝特所獎待俄而凝坐法貶商州圖感知已往從之凝起拜宣歙觀察使乃辟置幕府召爲殿中侍御史不忍去凝府臺劾左遷光祿寺主簿分司東都盧攜以故宰相居洛嘉圖節常與游攜還朝過陝虢屬於觀察使盧渥曰司空御史高士也渥卽表爲僚佐會攜復執政召拜禮部員外郎尋遷郎中黃巢陷長安將奔不得前圖弟有奴段章者陷賊執圖手曰我所主張將軍喜下士可往見之無虛死溝中圖不肯往章泣下遂奔咸陽間關至河中僖宗次鳳翔卽行在拜知制誥遷中書舍人後狩寶雞不獲從又還河中龍紀初復拜舊官以疾解景福中拜諫議大夫不赴後再以戶部侍郎召身謝闕下數日卽引去昭宗在華召拜兵部侍郎以足疾固自乞會遷洛陽柳璨希賊臣意誅天下才望助喪王室詔圖入朝圖陽墮笏趣意野羣璨知無意於世乃聽還圖本居中條山王官谷有先人田遂隱不出作亭觀素室悉圖唐興節士文人名亭曰休休作文以見志曰休美也既休而美具故量才一宜休揣分二宜休耄而曠三宜休又少也情長

也率老也迂三者非濟時用則又宜休因自目為耐辱居士其言詭激不常以免當時禍災云豫為冢棺
過勝日引客坐壙中賦詩酌酒裴回客或難之圖曰君何不廣邪生死一致吾寧暫游此中哉每歲時祠
禱鼓舞圖與閭里耆老相樂王重榮父子雅重之數饋遺弗受嘗為作碑贈絹數千圖置虞鄉市人得取
之一日盡時寇盜所過殘暴獨不入王官谷士人依以避難朱全忠已篡召為禮部尚書不起哀帝弑圖
聞不食而卒年七十二圖無子以甥為嗣嘗為御史所劾昭宗不責也

贊曰節誼為天下大閑士不可不勉觀臯濟不汙賊據忠自完而亂臣為沮計天下士知大分所在故傾
朝復支不有君子果能國乎德秀以德城以鯁峭圖知命其志凜凜與秋霜爭嚴真丈夫哉

唐書卷一百九十四

唐書卷一百九十五

宋 端 明 殿 學 士 宋 祁 撰

列傳第一百二十

孝友

唐受命二百八十八年以孝悌名通朝廷者多閭巷刺草之民皆得書于史官萬年王世貴長安嚴待封
涇陽田伯明華原韓難陀華州王瞿曇鄭縣辛法汪郭士舉張長郭士度鄭迪柳仁忠能君德劉崇甘元
爽韓子尚韓思約下邳張萬徹朝邑申屠思恭呂昂鵠張元亮靈臺孫智和新平馮猛將宜川司馬芬
洛交周崇俊洛川何善宜博陵崔定仁冀州燕遺倩貝州馬衡滄州鄭士才清池孫楚信劉賢渤海邊鳳
舉瀛州朱寶積樂陵蘇伏念邯鄲章徵雞澤馮仁海郭守素文安董相武邑王達多張巨感張藝朗暨孫
師才張義節沙河趙君惠南樂谷感德魏縣毛仁武城茹智達歷亭王師威李肆仁臨河李文編湯陰后
斥奴鼓城鼓思義陳岷田堤岳太原盧遺仁王知道蒲州賈孝才解縣衛玄表南岳張利見安邑曹文行
孫懷應相里志降楊王操邵玄同張衡曹存勳李文寔董文海李文秀張仙兒張公憲虞鄉董敬直河東
張金城呂神通呂雲呂志挺呂元光趙舉張祐姚熾張師德馮巨源杜山藏河西郭文政伊闕任仲濟源

榮璧汴州張士巖陳留家師諒董允恭尉氏楊思貞中牟潘良瓊暨子季通陽武時惠珣封丘楊嵩珪許
田李頤道胙城蔡洪石善雄暨孫彥威朗山胡君才徐州皇甫恆彭城尹務榮荊州劉寶長壽史搏益州
焦懷肅郭景華鄆縣曹少微涪城趙烟資陽趙光寓黃昇梓潼馬冬王秦舉王興嗣依政樊漪巴西韋士
宗文博燮暨子詮南鄭李貞古巢縣張進昭萬載廖洪南陵蘇仲方鄱陽張讚樂平謝惟勤沈普姜囑上
饒鮑嘉福虞鎔真句容張常洵弋陽張球李營暨子凝孫楚貴溪黃舟建昌熊士瞻臨江袁鳴籟縣謝俊
餘杭何公弁章成緬方宗建德何起門桐廬祝希進諸暨張萬和蕭山李渭許伯會戴恭俞僅信安徐知
新徐惠誣東陽應先唐君祐睦州許利川建陽劉常邵武黃巨張巨籟吳海泉山黃嘉猷承泰王爽皆事
親居喪著至行者萬年宋興貴奉先張鄂澧陽張仁興樸陽董思寵湖城閻旻高平雍仙高湖城閻鄧正
平周思藝張子英曲沃張君密秦德方馬玄操李君則太平趙德儼隴西陳嗣北海呂元簡經城宋沈之
單父劉九江無棣徐文亮樂陵吳正表河間劉宣董永安邑任君義衛開龍門梁神義賀見涉張奇異鄆
縣王元緒寇元童舒城徐行周睦州方良琨桐廬戴元益高安宋練涇縣萬晏弋陽李植繁昌王丕皆數
世同居者天子皆旌表門閭賜粟帛州縣存問復賦稅有授以官者唐時陳藏器著本草拾遺謂人肉治
羸疾自是民間以父母疾多刲股肉而進又有京兆張阿九趙言奉天趙正言滑清泌羽林飛騎啖榮祿

鄆縣吳孝友華陰尹義華潞州張光毗解縣南鍛河東李忠孝韓放鄆陵任客奴絳縣張子英平原楊仙
朝樂工段日昇河東將陳涉襄陽馮子城固雍孫八虞鄉張抱玉骨英秀榆次馮秀誠封丘楊嵩珪劉浩
清池朱庭玉弟庭金繁昌朱悛歙縣黃芮左千牛薛鋒及河陽劉士約或給帛或旌表門閭皆名在國史
善乎韓愈之論也曰父母疾亨藥餌以是爲孝未聞毀支體者也苟不傷義則聖賢先衆而爲之是不幸
因而且死則毀傷滅絕之罪有歸矣安可旌其門以表異之雖然委巷之陋非有學術禮義之資能忘身
以及其親出於誠心亦足稱者故列十七八焉廣明後方鎮凌法夸地千里事不上聞孝悌篤行之士旌
命所不及載小說者名字不參見他書不可錄若李知本張志寬之屬承上順下有禮讓君子之風故輯
而序之張士巖父病藥須鯉魚冬月冰合有獺銜魚至前得以供父遂愈母病癰士巖吮血父亡廬墓
有虎狼依之焦懷肅母病每嘗其唾若味異輒悲號幾絕母終水漿不入口五日負土成墳廬守日一食
杖然後起繼母沒亦如之張進昭母患孤刺左手墮而終及殯進昭截左腕廬于墓張公藝九世同居北
齊東安王承樂隋大使梁子恭躬慰撫表其門高宗有事太山臨幸其居問本末書忍字以對天子爲流
涕賜緜帛而去四人名頗著詳見于篇

李知本趙州元氏人元魏洛州刺史靈六世孫父孝端仕隋爲獲嘉丞與族弟太冲俱有世閥而太冲官

婚最高鄉人語曰太冲無兄孝端無弟知本涉經術事親篤至與弟知隱雍順子孫百餘至貧用僮僕無間也大業末盜賊過闕不入相戒曰無犯義門往依者五百餘室皆以貞觀初知隱爲伊闕丞知本夏津令開元中孫瑱爲給事中揚州長史知隱孫暉有文辭至太常少卿從祖兄弟位給事中凡四人張志寬蒲州安邑人居父喪而毀州里稱之王君廓兵略地不暴其閭倚全者百許姓後爲里正忽詣縣稱母疾求急令問狀對曰母有疾志寬輒病是以知之令謂其妄繫於獄馳驗如言乃慰遣之母終貢土成墳手時松柏高祖遣使者就弔拜員外散騎常侍賜物四十段表其閭

劉君良瀛州饒陽人四世同居族兄弟猶同產也門內斗粟尺帛無所私隋大業末荒饑妻勸其異居因易置庭樹烏鷄令鬪且鳴家人怪之妻曰天下亂禽鳥不相容况人邪君良卽與兄弟別處月餘密知其計因斥去妻曰爾破吾家召兄弟流涕以告更復同居天下亂鄉人共依之衆築爲堡因號義成堡武德中深州別駕楊弘業至其居凡六院共一庖子弟皆有禮節歎挹而去貞觀六年表異門閭

王少立博州聊城人父隋末死亂兵遺腹生少立甫十歲問父所在母以告卽哀泣求尸是野中白骨覆屢或曰以子血漬而滲者父齒也少立鑲膚闕旬而獲遂以葬創甚彌年乃與貞觀中州言狀拜徐王府

參軍

任敬臣字希古棣州人五歲喪母哀毀天至七歲問父英曰若何可以報母英曰揚名顯親可也乃立志從學汝南任處權見其文驚曰孔子稱顏回之賢以爲弗如也吾非古人然見此兒信不可及十六刺史崔樞欲舉秀才自以學未廣遜去又三年卒業舉孝廉授著作局正字父亡數殞絕繼母曰而不勝喪謂孝可乎敬臣更進饘粥服除遷祕書郎休沐闔門誦書監虞世南器其人歲終書上考固辭召爲弘文館學士俄授越王府西閣祭酒當代王再表留進朝請郎舉制科擢許王文學復爲弘文館學士終太子舍人

支叔才定州人隋末荒饑夜丐食野中還進母爲賊執欲殺之告以情賊聞其孝爲解縛母病癯叔才吮瘡注藥及亡廬墓有白鵠止廬傍高宗時表異其家至德間有常州人王遇弟遐俱爲賊執將釋一人兄弟相讓死賊感其意盡縱之

程袁師宋州人母病十旬不褫帶藥不嘗不進代弟戍洛州母終聞訃日走二百里因負土築墳號癯人不復識改葬會門以來閱二十年乃畢常有白狼黃蛇馴墓左每哭羣鳥鳴翔永徽中刺史狀諸朝詔吏敦駕既至不願仕授儒林郎還之

武弘度士驍兄之子補相州司兵參軍永徽中父卒自徐州被髮徒跣趨喪所負土築塋晨夕號日一溢

米素芝產廬前狸擾其旁高宗下詔褒美旌其門

宋思禮字過庭事繼母徐爲聞孝補蕭縣主簿會大旱井池涸母羸疾非泉水不適口思禮憂懼且禱忽有泉出諸庭味甘寒日之乏汲縣人異之尉柳冕爲刻石頌其孝感

鄭潛曜者父萬鈞駙馬都尉滎陽郡公母代國長公主開元中主寢疾潛曜侍左右造次不去累三月不離面主疾侵刺血爲書請諸神丐以身代火書而神許二字獨不化翌日主愈戒左右無敢言後尙臨晉長公主歷太僕光祿卿

元讓雍州武功人擢明經以母病不肯調侍膳不出閭數十年母終廬墓次廢糧沐飯茶飲水咸亨中太子監國下令表闕于門永淳初巡察使表讓孝悌卓越擢太子右內率府長史歲滿還鄉里人有所訟皆詣讓判中宗在東宮召拜司議郎入謁武后望謂曰卿孝於家必能忠於國宜以治道輔吾子尋卒

裴敬彝絳州聞喜人曾祖子通隋開皇中以太中大夫居母喪哭喪明有白鳥巢冢樾兄弟八人皆爲名孝詔表門闕世謂義門裴氏敬彝七歲能文章性謹敏宗族重之號甘露頂父智周補臨黃令爲下所訟敬彝年十四詣巡察使唐臨直枉臨奇之試命作賦賦工父罪已釋表敬彝于朝補陳王府典籤一日忽泣涕謂左右曰大人病痛吾輒然心悸而痛事叵測乃請急倍道歸而父已卒羸毀踰禮乾封初遷累

監察御史母病醫許仁則者躄不能乘敬彝自爲輿往迎既居喪詔贈兼帛官爲作靈輿終服以著作郎兼修國史歷中書舍人太子左庶子武后時爲酷吏所陷死嶺南

梁文貞號州閩鄉人少從軍守邊逮還親已亡自傷不得養卽穿墻爲門晨夕汛掃廬墓左喑默三十年家人有所問畫文以對會官改新道出文貞廬前行旅見之皆爲流涕有甘露降塋木白兔馴擾縣令刊石紀之開元中刺史許景先表文貞孝絕倫類詔付史官

沈季詮字子平洪州豫章人少孤事母孝未嘗與人爭皆以爲怯季詮曰吾怯乎爲人子者可遺憂於親乎哉貞觀中待母度江遇暴風母溺死季詮號呼投江中少選持母臂浮出水上都督謝叔方具禮祭而葬之

許伯會越州蕭山人或曰玄度十二世孫舉孝廉上元中爲衡陽博士母喪負土成墳不御絮帛嘗滋味野火將逮塋樹悲號于天俄而雨火滅處旱泉湧廬前靈芝生

陳集原瀧州開陽人世爲酋長父龍樹爲欽州刺史有疾卽集原輒不食及亡嘔血數升卽塋作廬盡以田貲讓兄弟里人高之武后時歷右豹韜衛大將軍

陸南金蘇州吳人祖士季從同郡顧野王學左氏春秋司馬史班氏漢書仕隋爲越王侗記室兼侍讀侗

稱制擢著作郎時王世充將篡逆侗謂士季曰隋有天下三十年朝果無忠臣乎士季對曰見危授命臣
宿志也請因啟事為陛下殺之謀洩停侍讀乃不克貞觀初終太學博士兼弘文館學士南金仕為太常
奉禮郎開元初少卿盧崇道抵罪徙嶺南逃還東都南金居母喪崇道偽稱弔客入而道其情南金匿之
俄為讎人跡告詔侍御史王旭捕按南金當重法弟趙璧詣旭自言匿崇道者我也請死南金固言弟自
誣不情旭怪之趙璧曰母未葬妹未歸兄能辦之我生無益不如死旭驚上狀玄宗皆有之南金知書史
履操謹完張說陸象先以賢謂之由庫部員外以瘡疾改太子洗馬卒

張琬河中解人父審素為嵩州都督有陳纂仁者誣其冒職級私庸兵玄宗疑之詔監察御史楊汪即按
纂仁復告審素與總管董堂禮謀反於是汪收審素繫雅州獄馳至嵩州按反狀堂禮不勝忿殺纂仁以
兵七百圍汪脅使露章雪審素罪既而吏共斬堂禮汪得出遂當審素實反斬之沒其家琬與兄瑋尚幼
徙嶺南久之逃還汪更名萬頃瑋時年十三琬少二歲夜狙萬頃於魏王池瑋斫其馬萬頃驚不及闕為
琬所殺條所以殺萬頃狀繫于斧奔江南將殺構父罪者然後詣有司道汜水吏捕以聞中書令張九齡
等皆稱其孝烈宜貸死侍中裴耀卿等陳不可帝亦喟然謂九齡曰孝子者義不顧命殺之可成其志赦
之則虧律凡為子孰不願孝轉相讎殺遂無已時卒用耀卿議者以為冤帝下詔申諭乃殺之臨刑賜

食理不能進琬色自如曰下見先人復何恨人莫不閔之為誅揭于道斂錢為葬北邙尚恐仇人發之作
疑冢使不知其處太宗時有卽墨人王君操父隋末為鄉人李君則所殺亡命去時君操尚幼至貞觀時
朝世更易而君操寔孤仇家無所憚詣州自言君操密挾刃殺之剔其心肝噉立盡趨告刺史曰父死凶
手歷二十年不克報乃今刷憤願歸死有司州上狀帝為貸死高宗時絳州人趙師舉父為人殺師舉幼
母改嫁仇家不疑師舉長為人庸夜讀書久之手殺讎人詣官自陳帝原之永徽初同官人同蹄智壽父
為族人所害智壽與弟智爽候諸塗擊殺之相率歸有司爭為首有司不能決者三年或言弟始謀乃論
死臨刑曰讎已報死不恨智壽自投地委頓身無完膚舐智爽血盡乃已見者傷之武后時下邳人徐元
慶父爽為縣尉趙師韞所殺元慶變姓名為驛家保久之師韞以御史舍亭下元慶手殺之自囚詣官后
欲赦死左拾遺陳子昂議曰先王立禮以進人明罰以齊政枕干讎敵人子義也誅罪禁亂王政綱也然
無義不可罰人亂綱不可明法聖人修禮治內飭法防外使守法者不以禮廢刑居禮者不以法傷義然
後暴亂銷廉恥興天下所以直道而行也元慶報父讎束身歸罪雖古烈士何以加然殺人者死畫一之
制也法不可二元慶宜伏辜傳曰父讎不同天勸人之教也教之不苟元慶宜赦臣聞刑所以生過亂也
仁所以利崇德也今報父之仇非亂也行子之道仁也仁而無利與同亂誅是曰能刑未可以罰然則邪

由正生治必亂作故禮防不勝先王以制刑也今義元慶之節則廢刑也跡元慶所以能義動天下以其忘生而趨其德也若釋罪以利其生是奪其德虧其義非所謂殺身成仁全死忘生之節臣謂宜正國之典實之以刑然後旌閭墓可也時違其言後禮部員外郎柳宗元駁曰禮之大本以防亂也若曰無爲賊虐凡爲子者殺無赦刑之大本亦以防亂也若曰無爲賊虐凡爲子者殺無赦刑之大本亦以防亂也若曰無爲賊虐凡爲治者殺無赦其本則合其用則異旌與誅不得並也誅其可旌茲謂濫刑甚矣旌其可誅茲謂僭壞禮甚矣若師韞獨以私怨奮吏氣虐非辜州牧不知罪刑官不知問上下蒙冒竊號不聞而元慶能處心積慮以衝讎人之骨介然自克卽死無憾是守禮而行義也執事者宜有慙色將謝之不暇而又何誅焉其或父不免於罪師韞之誅不愆於法是非死於吏也是死於法也法其可讎乎讎天子之法而戕奉法之吏是悖驚而凌上也執而誅之所以正邦典而又何旌焉禮之所謂讎者冤抑沉痛而號無告也非謂抵罪觸法陷于大戮而曰彼殺之我乃殺之不議曲直暴寡脅弱而已春秋傳曰父不受誅子復讎可也父受誅子復讎此推刃之道復讎不除害今若取此以斷兩下相殺則合於禮矣且夫不忘讎孝也不愛死義也元慶能不越於禮服孝死義是必達理而聞道者也夫達理聞道之人豈其以王法爲敵讎者哉議者反以爲戮讎刑壞禮其不可以爲典明矣請下臣議附于今有斷斯獄者不宜以前議從事憲宗時衢州人余常安父叔皆爲里人謝全所殺

常安八歲已能謀復仇十有七年卒殺全刺史元錫奏輕比刑部尚書李廓執不可卒抵死又富平人梁悅父爲秦果所殺悅殺仇詣縣請罪詔曰在禮父讎不同天而法殺人必死禮法王教大端也二說異焉下尚書省議職方員外郎韓愈曰子復父讎見于春秋于禮記周官若子史不勝數未有非而罪者最宜詳于律而律無條非闕文也蓋以爲不許復讎則傷孝子之心許復讎則人將倚法闢殺無以禁止夫律雖本於聖人然執而行之者有司也經之所明者制有司者也丁寔其義於經而深沒其文於律者將使法吏一斷於法而經術之士得引經以議也周官曰凡殺人而義者令勿讎讎之則死義者宜也明殺人而不得其宜者子得復讎也此百姓之相讎者也公羊子曰父不受誅子復讎可也不受誅者罪不當誅也誅者上施下之讎非百姓相殺也周官曰凡報仇讎者書於士殺之無罪言將復讎必先言於官則無罪也復讎之名雖同而其事各異或百姓相讎如周官所稱可議於今者或爲官吏所誅如公羊所稱不可行於今者周官所稱將復讎先告於士若孤稚羸弱抱微志而伺敵人之便恐不能自言未可以爲斷於今也然則殺之與赦不可一宜定其制曰有復父讎者事發具其事下尚書省集議以聞酌處之則經無失指矣有詔以悅申冤請罪詣公門流循州穆宗世京兆人康買得年十四父憲責錢於雲陽張菴菴醉拉憲危死買得以菴趨悍度救不足解則舉錘擊其首三日菴死刑部侍郎孫革建言買得救父難不

爲暴度不解而擊不爲凶先王制刑必先父子之親春秋原心定罪周書諸罰有權買得孝性天至宜賜
矜宥有詔減死

侯知道程俱羅者靈州靈武人居親喪穿城作冢皆身執其勞鄉人助者卽哭而卻之廬墳次哭泣無節
知道七年俱羅三年不止知道垢塵積首率夜半傳墳踴而哭鳥獸爲悲號李華作二孝贊表其行曰厥
初生人有君有親孝親爲子忠君爲臣兆自天命降及人倫背死不義忘生不仁過及智就爲之禮文至
哉侯氏創巨病股手足胼胝以成高墳夜黑颺動如臨鬼神哭無常聲迴徹蒼旻直斬三年爾獨終身嗟
嗟程生其哀也均顧後絕配瞻前無隣又有何澄粹者池州人親病日錮俗尙鬼病者不進藥澄粹剔股
肉進親疾爲瘳後親沒伏于墓哭踊無數以毀卒當時號青陽孝子士爲作誄甚衆壽州安豐李興亦有
至行柳宗元爲作孝門銘曰壽州刺史臣承思言九月丁亥安豐令上所部編戶毗興父被惡疾歲月就
亟興自刃股肉假託饋獻父老病已不能啖宿而死興號呼撫臆口鼻垂血捧土就墳沾漬涕洟墳左作
小廬蒙以苫茨伏匿其中扶服頓首晝夜哭訴孝誠幽達神爲見異廬上產紫芝白芝廬中醴泉湧此皆
陛下孝治神化陰中其心而克致斯事謹按興匹庶賤陋循習淺下性非文字所導生與耨耒爲業而能
鍾彼醇孝超出古烈天意神道猶錫瑞物以表殊異伏惟陛下有唐堯如神之德宜加旌褒合于上下請

表其里閭刻石明白宣延風美觀示後祀永無極臣昧死請制曰可銘曰懿厥孝思茲惟淑靈稟承粹
和篤守天經泣侍羸疾默禱隱冥引刃自嚮殘肌敗形羞膳奉進憂勞孝誠惟時高高曾不視聽創巨痛
仍號于穹旻捧土濡涕頓首成墳摺膺腐眦寒暑在廬草木悴死鳥獸踟躕殊類異族亦相其哀肇有二
位孝道爰興克脩厥猷載籍是登在帝有虞以孝烝烝仲尼述經以教于曾惟昔魯侯見命夷宮亦有考
叔寤莊稱純顯顯李氏實與之倫哀嗟道路涕慕里隣神錫祕祉三秀靈泉帝命梓加亦表其門統一上
下交贊天人建此碑號億齡揚芬

許法慎滄州清池人甫三歲已有知時母病不飲乳慘慘有憂色或以珍餌詭悅之輒不食還以進母後
親喪常廬于塋有甘露嘉禾靈芝木連理白兔之祥天寶中表異其閭

林攢泉州莆田人貞元初仕爲福唐尉母羸老未及迎而病攢聞棄官還及母亡水漿不入口五日自埏
費作塚廬其右有白鳥來甘露降觀察使李若初遣官屬驗實會露晞里人失色攢哭曰天所降露禍我
邪俄而露復集鳥亦回翔詔作二闕于母墓前又表其閭蠲徭役時號闕下林家

陳饒奴饒州人年十二親併亡寔弱居喪又歲飢或教其分弟妹可全性命饒奴流涕身丐訴相全養刺
史李復異之給資儲署其門曰孝友童子

王博武許州人會昌中侍母至廣州及沙涌口暴風母溺死博武自投于水嶺南節度使盧貞俾吏沉匿獲一屍焉乃葬之表其墓曰孝子墓詔爲刻石

萬敬儒廬州人三世同居喪親廬墓刺血寫浮屠書斷手二指輒復生州改所居曰成孝鄉廣孝聚大中時表其家

章全益梓州涪城人少孤爲兄全啟所鞠母病全啟割股膳母而愈及全啟亡全益服斬衰斷手一指以報不畜妻僮僕處一室賣藥自業世傳能作黃金居成都四十年號章孝子卒年九十八

贊曰聖人治天下有道曰要在孝悌而已父父子子也兄兄也弟弟也推而之國國而之天下建一善而百行從其失則以法繩之故曰孝者天下大本法其末也至匹夫單人行孝一槩而凶盜不敢凌天子喟而旌之者以其教孝而求忠也故哀而著于篇

唐書卷一百九十五

唐書卷一百九十五考證

張琬傳同官人同歸智壽○同歸二字不可解舊書作周智壽疑當從舊書

唐書卷一百九十五考證

唐書卷一百九十六

宋 端 明 殿 學 士 宋 祁 撰

列傳第一百二十一

隱逸

古之隱者大抵有三槩上焉者身藏而德不晦故自放草野而名往從之雖萬乘之貴猶尋軌而委聘也其次挈治世具弗得伸或持峭行不可屈于俗雖有所應其於爵祿也汎然受悠然辭使人君常有所慕企招然如不足其可貴也未焉者資槁薄樂山林內審其材終不可當世取捨故逃巨圍而不返使人常高其風而不敢加嘗焉且世未嘗無隱有之未嘗不旌賁而先焉者以孔子所謂舉逸民天下之人歸焉唐興賢人在位衆多其遁賤不出者纔班班可述然皆下槩者也雖然各保其素非託默于語足崖壑而志城闕也然放利之徒假隱自名以詭祿仕肩相摩於道至號終南嵩少為仕途捷徑高尚之節喪焉故真可喜慕者類于篇

王績字無功絳州龍門人性簡放不喜拜揖兄通隋末大儒也聚徒河汾間傲古作六經又為中說以擬論語不為諸儒稱道故書不顯惟中說獨傳通知續誕縱不嬰以家事鄉族慶弔冠昏不與也與李播呂

才善大業中舉孝悌廉潔授祕書省正字不樂在朝求爲六合丞以嗜酒不任事時天下亦亂因劾遂解去歎曰網羅在天吾且安之乃還鄉里有田十六頃在河渚間仲長子光者亦隱者也無妻子結廬北渚凡三十年非其力不食績愛其真徙與相近子光瘖未嘗交語與對酌酒懽甚績有奴婢數人種黍春秋釀酒養鳧鴈時藥草自供以周易老子莊子置牀頭他書罕讀也欲見兄弟輒度河還家游北山東臯著書自號東臯子乘牛經酒肆留或數日高祖武德初以前官待詔門下省故事官給酒日三升或問待詔何樂邪答曰良醞可戀耳侍中陳叔達聞之日給一斗時稱斗酒學士貞觀初以疾罷復調有司時太樂署史焦革家善釀績求爲丞吏部以非流不許績固請曰有深意竟除之革死妻送酒不絕歲餘又死績曰天不使我酣美酒邪棄官去自是太樂丞爲清職追述革酒法爲經又采杜康儀狄以來善酒者爲譜李淳風曰君酒家南董也所居東南有盤石立杜康祠祭之尊爲師以革配著醉鄉記以次劉伶酒德頌其飲至五斗不亂人有以酒邀者無貴賤輒往著五斗先生傳刺史崔喜悅之請相見答曰奈何坐召嚴君平邪卒不詣杜之松故人也爲刺史請績講禮答曰吾不能揖讓邦君門談糟粕棄醇醪也之松歲時贈以酒脯初兄凝爲隋著作郎撰隋書未成死績續餘功亦不能成豫知終日命薄葬自誌其墓績之仕以醉失職鄉人斬之託無心子以見趣曰無心子居越越王不知其大人也拘之仕無喜色越國法曰穢

行者不齒俄而無心子以穢行聞王黜之無愠色退而適茫蕩之野過動之邑而見機士機士撫髀曰嚙子賢者而以罪廢邪無心子不應機士曰願見教曰子聞蜚廉氏馬乎一者朱鬣白鬣龍鬣鳳臆驟馳如舞終日不釋轡而以熱死一者重頭昂尾駝頸貉膝躄齧善齧棄諸野終年而肥夫鳳不憎山栖龍不羞泥蟠君子不苟潔以罹患不避穢而養精也其自處如此

朱桃椎益州成都人澹泊絕俗被裘曳索人莫能測其爲長史竇軌見之遺以衣服鹿幘屨躡署鄉正委之地不肯服更結廬山中夏則羸冬緝木皮葉自蔽贈遺無所受嘗織十芒屨置道上見者曰居士屨也爲糞米茗易之置其處輒取去終不與人接其爲屨草柔細環結促密人爭躡之高士廉爲長史備禮以請降階與之語不答瞪視而出士廉拜曰祭酒其使我以無事治蜀邪乃簡條目薄賦斂州大治屢遣人存問見輒走林草自匿云

孫思邈京兆華原人通百家說善言老子莊周洛州總管獨孤信見其少異之曰聖童也顧器大難爲用爾及長居太白山隋文帝輔政以國子博士召不拜密語人曰後五十年有聖人出吾且助之太宗初召詣京師年已老而聽視聰瞭帝歎曰有道者欲官之不受顯慶中復召見拜諫議大夫固辭上元元年稱疾還山高宗賜良馬假鄱陽公主邑司以居之思邈於陰陽推步醫藥無不善孟詵盧照隣等師事之

照隣有惡疾不可爲感而問曰高醫愈疾奈何答曰天有四時五行寒暑迭居和爲雨怒爲風凝爲雪霜張爲虹霓天常數也人之四支五藏一覺一寐吐納往來流爲榮衛章爲氣色發爲音聲人常數也陽用其形陰用其精天人所同也失則蒸生熱否生寒結爲瘤贅陷爲癰疽奔則喘乏竭則燥槁發乎面動乎形天地亦然五緯縮贏孛彗飛流其危診也寒暑不時其蒸否也石立土踊是其瘤贅山崩土陷是其癰疽奔風暴雨其喘乏川瀆竭涸其燥槁高醫導以藥石救以鉞劑聖人和以至德輔以人事故體有可愈之疾天有可振之災照隣曰人事奈何曰心爲之君君尙恭故欲小詩曰如臨深淵如履薄冰小之謂也膽爲之將以果決爲務故欲大詩曰赳赳武夫公侯干城大之謂也仁者靜地之象故欲方傳曰不爲利回不爲義攷方之謂也智者動天之象故欲圓易曰見幾而作不俟終日圓之謂也復問養性之要答曰天有盈虛人有屯危不自慎不能濟也故養性必先知自慎也慎以畏爲本故士無畏則簡仁義農無畏則墮稼穡工無畏則慢規矩商無畏則貨不殖子無畏則忘孝父無畏則廢慈臣無畏則勳不立君無畏則亂不治是以太上畏道其次畏天其次畏物其次畏人其次畏身憂於身者不拘於人畏於己者不制於彼慎於小者不懼於大戒於近者不侮於遠知此則人事畢矣初魏徵等修齊梁周隋等五家史屢咨所遺其傳最詳永淳初卒年百餘歲遺令薄葬不藏明器祭去牲牢孫處約常以諸子見思邈曰俊先顯

侑晚貴倖禍在執兵後皆驗太子詹事盧齊卿之少也思邈曰後五十年位方伯吾孫爲屬吏願自愛時思邈之孫溥尙未生及溥爲蕭丞而齊卿徐州刺史

田游巖京兆三原人永徽時補太學生罷歸入太白山母及妻皆有方外志與共棲遲山水間自蜀歷荆楚愛夷陵青溪止廬其側長史李安期表其才召赴京師行及汝辭疾入箕山居許由祠旁自號由東隣頓召不出高宗幸嵩山遣中書侍郎薛元超就問其母賜藥物絮帛帝親至其門游巖野服出拜儀止謹樸帝令左右扶止謂曰先生比佳否答曰臣所謂泉石膏肓烟霞痼疾者帝曰朕得君何異漢獲四皓乎薛元超贊帝曰漢欲廢嫡立庶故四人都爲出豈如陛下親降巖穴邪帝悅因敕游巖將家屬乘傳赴都拜崇文館學士帝營奉天宮游巖舊宅直宮左詔不聽毀天子自書榜其門曰隱士田游巖宅進太子洗馬裴炎死坐素厚善放還山蠶衣耕食不交當世惟與韓法昭宋之問爲方外友云時又有史德義者崑山人居虎丘山騎牛帶瓢出入塵野高宗聞其名召至洛陽俄稱疾歸天授初江南宣勞使周興薦之復召赴都擢朝散大夫興死免官歸素餐頓衰

孟詵汝州梁人擢進士第累遷鳳閣舍人他日至劉禕之家見賜金曰此藥金也燒之火有五色氣試之驗武后聞不悅出爲台州司馬頻遷春官侍郎相王召爲侍讀拜同州刺史神龍初致仕居伊陽山治方

藥嘗宗召將用之以老因辭賜物百段詔河南春秋給羊酒糜粥尹畢構以誥有古人風名所居爲子平里開元初卒年九十三詵居官頗刻斂然以治稱其間居嘗語人曰養性者善言不可離口善藥不可離手當時傳其嘗

王友貞懷州河內人父知敬善書隸武后時仕爲麟臺少監友貞少爲司經局正字母病醫言得人肉啖頁已友貞剔股以進母疾愈詔旌表其門素好學訓誨子弟如嚴君口不語人過重然諾時以爲君子歷長水令罷歸中宗在東宮召爲司議郎不就神龍初以太子中舍人徵固辭疾詔致珍饌給全祿終身四時送其所州縣存問玄宗在東宮表以蒲車召不至卒年九十九贈銀青光祿大夫敕縣令弔祭

王希夷徐州滕人家貧父母喪爲人牧羊取備以葬隱嵩山師黃頤學養生四十年頤卒更居兗州徂徠與劉玄博友善喜讀周易老子餌松栢葉雜華年七十餘筋力柔強刺史盧齊卿就謁問政答曰己所不欲勿施於人此言足矣玄宗東巡狩詔州縣敦勸見行在時九十餘帝令張說訪以政事宦官扶入宮中與語甚悅拜國子博士聽還山敕州縣春秋致束帛酒肉仍賜絹百衣一稱

李元愷邢州人博學善天步律麻性恭慎未嘗敢語人宋璟嘗師之既當國厚遺以束帛將薦之朝拒不答洛州刺史元行沖邀致之問經義畢贈衣服辭曰吾軀不可服新麗懼不稱以速咎也行沖垢巖復與

之不獲已而受俄報身所蠶素絲曰義不受無妄財也先是定州崔元鑿善禮學用張易之力授朝散大夫家居給半祿元愷謂曰無功而祿災也卒年八十餘

衛大經蒲州解人卓然高行口無二言武后時召之固辭疾素善魏夏侯乾童聞其母卒盛暑步往弔或止之曰方夏涉遠不如致書答曰書能盡意邪比至乾童以事行乃設席行弔禮不訊其家而還開元初畢構爲刺史使縣令孔慎言就謁辭不見大經遂于易人謂之易聖豫筮死日鑿墓自爲誌如言終

武攸緒則天后兄惟良子也恬淡寡欲好易莊周書少變姓名賣卜長安市得錢輒委去後更授太子通事舍人累遷揚州大都督府長史鴻臚少卿后革命封安平郡王從封中岳固辭官願隱居后疑其詐許之以觀所爲攸緒廬巖下如素遁者后遣其兄攸宜敦諭卒不起后乃異之盤桓龍門少室間冬蔽茅椒夏居石室所賜金銀鑑鬲野服王公所遺鹿裘素障屨栝塵皆流積不御也市田潁陽使家奴雜作自混於民晚年肌肉消骨腫有紫光晝能見星中宗初降封巢國公遣國子司業杜慎盈齋書以安車召拜太子賓客苦祈還山詔可安樂公主出降又遣通事舍人李邈以璽書迎之將至帝敕有司卽兩儀殿設位行問道禮詔見日山帔葛巾不名不拜攸緒至更冠帶仗入通事舍人贊就位攸緒趨就常班再拜帝愕然禮不及行朝廷歎息賜予無所受親貴來謁道寒温外默無所言及還中書門下學士朝官五品以

上並祖城東俄而諸韋誅武氏連禍唯攸緒不及睿宗恐其不自安下詔慰諭復召拜太子賓客不就譙王重福之亂攸緒以誣被繫張說表置廬山中書令姚元崇奏攸緒在武后時未嘗輒出今州縣逼遣士爲驚駭願詔賜嵩山舊居令州縣存問詔可開元十一年卒

白履忠汴州浚儀人貫知文史居古大梁城時號梁丘子景雲中召爲校書郎棄官去開元十年刑部尙書王志愔薦履忠博學守操可代褚無量馬懷素入閣侍讀國子祭酒楊瑒又表其賢召赴京師辭病老不任職詔拜朝散大夫乞還手詔許游京師徐返里閭履忠留數月乃去吳兢其里人也謂曰子素貧不露斗米疋帛雖得五品亦何益履忠曰往契丹入寇家取排門夫吾以讀書縣爲免今終身高臥寬徭役豈易得哉

盧鴻字顥然其先幽州范陽人徙洛陽博學善書籀盧山玄宗開元初備禮徵再不至五年詔曰鴻有秦一之道中庸之德鈎深詣微確乎自高詔書屢下每輒辭託使朕虛心引領于今數年雖得素履幽人之介而失考父滋恭之誼豈朝廷之故與生殊趣耶將縱欲山林往而不能返乎禮有大倫君臣之義不可廢也今城闕密邇不足爲勞有司其齋束帛之具重宣茲旨想有以翻然易節副朕意焉鴻至東都謁見不拜宰相遣通事舍人問狀答曰禮者忠信所薄臣敢以忠信見帝召升內殿置酒拜諫議大夫固辭

復下制許還山歲給米百斛綱五十府縣爲致其家朝廷得失其以狀聞將行賜隱居服官營草堂恩禮殊渥鴻到山中廣學廬聚徒至五百人及卒帝賜萬錢鴻所居室自號靈極云

吳筠字貞節華州華陰人通經誼美文辭舉進士不中性高鯁不耐沈浮於時去居南陽倚帝山天寶初召至京師請建道士籍乃入嵩山依潘師正究其術南游天台觀滄海與有名士相娛樂文辭傳京師玄宗遣使召見大同殿與語甚悅敕待詔翰林獻玄綱三篇帝嘗問道對曰深於道者無如老子五千文其餘徒喪紙札耳復問神仙治鍊法對曰此野人事積歲月求之非人主宜留意筠每開陳皆名教世務以微言諷天子天子重之羣沙門嫉其見遇而高力士素事浮屠共短筠於帝筠亦知天下將亂懇求還嵩山詔爲立道館安祿山欲稱兵乃遣茅山而兩京陷江淮盜賊起因東入會稽剡中大厯十三年卒弟子私諡爲宗元先生始筠見惡於力士而斥故文章深詆釋氏筠所善孔巢父李白歌詩略相甲乙云

潘師正者貝州宗城人少喪母廬墓以孝聞事王遠知爲道士得其術居逍遙谷高宗幸東都召見問所須對曰茂松清泉臣所須也既不乏矣帝尊異之詔卽其廬作崇唐觀及營奉天宮又敕直逍遙谷作門曰仙游北曰尋真時太常獻新樂帝更名祈仙望仙翹仙曲卒年九十八贈太中大夫謚體玄先生又有劉道台者亦與師正同居嵩山帝卽所隱立太一觀使居之時將封太山雨不止帝令道台禳祝俄而霽

乃令馳傳先行太山祈祓得賞賜輒散貧乏無所蓄咸亨中爲帝作丹劑成而卒帝後營宮還道合墓開其棺見骸垢若蟬蛻者帝聞恨曰爲我合丹而自服去然所餘丹無它異

司馬承禎字子微洛州溫人事潘師正傳辟穀道引術無不通師正異之曰我得陶隱居正一法逮而四世矣固辭去徧游名山廬天台不出武后嘗召之未幾去睿宗復命其兄承禕就起之既至引入掖廷問其術對曰爲道日損損之又損以至於無爲夫心目所知見每損之尙不能已況攻異端而增智慮哉帝曰治身則爾治國若何對曰國猶身也故游心於淡合氣於漠與物自然而無私焉而天下治帝嗟味曰廣成之言也錫寶琴霞紋帔還之開元中再被召至都玄宗詔於王屋山置壇室以居善篆隸帝命以三體寫老子刊正文句又命王真公主及光祿卿韋綯至所居按金錄設祠厚賜焉卒年八十九贈銀青光祿大夫諡貞一先生親文其碑自師正道合與承禎等語言詭譎似方士剗之不錄直取其隱槩云賀知章字季真越州永興人性曠夷善談說與族姑子陸象先善象先嘗謂人曰季真清談風流吾一日不見則鄙吝生矣證聖初擢進士超拔羣類科累遷太常博士張說爲麗正殿修書使表知章及徐堅趙冬曦入院撰大典等書累年無功開元十三年遷禮部侍郎兼集賢院學士一日併謝宰相源乾曜語說曰賀公兩命之榮足爲光寵然學士侍郎孰爲美說曰侍郎衣冠之選然要爲具員吏學士懷先王之道

經緯之文然後處之此其爲間也玄宗自爲贊賜之遷太子右庶子充侍讀申王薨詔選換郎而知章取舍不平蔭子喧訴不能止知章梯牆出首以決事人皆斬之坐徙工部肅宗爲太子知章遷賓客授秘書監而左補闕薛令之兼侍讀時東宮官積年不遷令之書壁望禮之薄帝見復題聽自安者令之卽棄官徒步歸鄉里知章晚節尤誕放邀嬉里巷自號四明狂客及秘書外監每醉輒屬辭筆不停書咸有可觀未始刊飭善草隸好事者具筆研從之意有所愜不復拒然紙纒十數字世傳以爲寶天寶初病夢遊帝居數日寤乃請爲道士還鄉里詔許之以宅爲千秋觀而居又求周宮湖數頃爲放生池有詔賜鏡湖剡川一曲既行帝賜詩皇太子百官餞送擢其子僧子爲會稽郡司馬賜緋魚使侍養幼子亦聽爲道士卒年八十六肅宗乾元初以雅舊贈禮部尙書令之長谿人肅宗亦以舊恩召而令之已前卒

秦系字公緒越州會稽人天寶末避亂剡溪北都留守薛兼訓奏爲右衛率府倉曹叅軍不就客泉州南安有九日山大松百餘章俗傳東晉時所植系結廬其上穴石爲研注老子彌年不出刺史薛播數往見之歲時致羊酒而系未嘗至城門姜公輔之謫見系輒窮日不能去築室與相近忘流落之苦公輔妻子在連系爲葬山下張建封聞系之不可致請就加校書郎與劉長卿善以詩相贈答權德輿曰長卿自以爲五言長城系用偏師攻之雖老益壯其後東度秣陵年八十餘卒南安人思之爲立亭號其山爲

高士峯云

張志和字子同婺州金華人始名龜齡父游朝通莊列二子書爲象罔白馬證諸篇佐其說母夢楓生腹上而產志和十六擢明經以策干肅宗特見賞重命待詔翰林授左金吾衛錄事參軍因賜名後坐事貶南浦尉會赦還以親既喪不復仕居江湖自稱烟波釣徒著玄真子亦以自號有章詣者爲撰內解志和又著太易十五篇其卦三百六十五兄鶴齡恐其遁世不還爲築室越州東郭茨以生草椽棟不施斤斧豹席櫻櫚每垂釣不設餌志不在魚也縣令使浚渠執畚無忤色嘗欲以大布製裘嫂爲躬績織及成衣之雖暑不解觀察使陳少游往見爲終日留表其居曰玄真坊以門隘爲買地大其閤號回軒巷先是門阻流水無梁少游爲構之人號大夫橋帝嘗賜奴婢各一志和配爲夫婦號漁童樵青陸羽嘗問孰爲往來者對曰太虛爲室明月爲燭與四海諸公共處未嘗少別也何有往來顏真卿爲湖州刺史志和來謁真卿以舟敝漏請更之志和曰願爲浮家泛宅往來蒼苔間辯捷類如此善圖山水酒酣或擊鼓吹笛或筆輒成嘗撰漁歌憲宗圖真求其歌不能致李德裕稱志和隱而有名顯而無事不窮不達巖光之比云孔述睿越州山陰人梁侍中休源八世孫高祖德紹事竇建德爲中書侍郎嘗草檄毀薄太宗賊平執登汜水樓責曰爾以檄謗我云何對曰犬吠非其主帝怒曰賊乃主耶命壯士摔殞樓下曾祖昌寓字廣成

貞觀中對策高第歷魏州司馬有治狀帝爲不置刺史爲政三年璽書褒美進膳部郎中祖祖舜字奉先爲監察御史以累下除成武令雉馴于廷述容少與兄充符弟克讓篤孝已孤偕隱嵩山而述容資嗜學大厯中劉晏薦於代宗以太常寺協律郎召擢累司勳員外郎史館修撰述容每一遷卽至朝謝俄而辭疾歸以爲常德宗立拜諫議大夫命河南尹趙惠伯齎詔書束帛備禮敦遣既至對別殿賜第宅給廐馬兼皇太子侍讀固辭弗許久乃改祕書少監兼右庶子復爲史館修撰述容重次地理志本末最詳性退讓未始忤物雖親朋燕集至嚴默終日人皆畏之與令狐恒同職恒數抵侮然卒不校也時稱長者貞元四年帝念平涼之難尤惻怛以述容精慤而誠故遣持祠具稱詔臨祭又以疾乞解入乃許以太子賓客還鄉賜帛五十匹衣一襲故事致仕不給公驛帝特命給焉卒年七十一贈工部尚書

子敏行字至之元和初擢進士第岳鄂呂元膺表在節度府元膺徙東都河中輒隨府遷入拜右拾遺四遷司勳郎中集賢殿學士諫議大夫李絳遇害事本監軍楊叔元時無敢言敏行上書極論之叔元乃得罪以名臣子少修潔及仕宦能交當時豪俊有名一時而雅操不逮父矣卒年三十九贈工部侍郎陸羽字鴻漸一名疾字季疵復州竟陵人不知所生或言有僧得諸水濱畜之既長以易自茲得蹇之漸曰鴻漸于陸其羽可用爲儀乃以陸爲氏名而字之幼時其師教以蜀行書答曰終鮮兄弟而絕後嗣得

爲孝乎師怒使執糞除垢垣以苦之又使牧牛三十羽潛以竹畫牛背爲字得張衡南都賦不能讀危坐
効羣兒囁嚅若成誦狀師拘之令雜草莽當其記文字懵懵若有遺過日不作主者鞭苦因歎曰歲月往
矣奈何不知書嗚咽不自勝因去匿爲優人作詠諧數千言天寶中州人酺吏署羽伶師太守李齊物
見異之授以書遂廬火門山貌倪陋口吃而辯聞人善若在己見有過者規切至忤人朋友燕處意有所
行輒去人疑其多嘖與人期雨雪虎狼不避也上元初更隱蒼溪自稱桑苧翁閨門著書或獨行野中誦
詩擊木裴回不得意或慟哭而歸故時謂今接輿也久之詔拜羽太子文學徙太常寺太祝不就職貞元
末卒羽嗜茶著經三篇言茶之原之法之具尤備天下益知飲茶矣時鬻茶者至陶羽形置煬突間祀爲
茶神有常伯熊者因羽論復廣著茶之功御史大夫李季卿宣慰江南次臨淮知伯熊善煮茶召之伯熊
執器前季卿爲再舉杯至江南又有薦羽者羽之羽衣野服挈具而入季卿不爲禮羽愧之更著毀茶論
其後尙茶成風時回紇入朝始驅馬市茶

崔觀梁州城固人以儒自業身耕耨取給老無子乃以田宅財貲分給奴婢各爲業而身與妻隱南山約
奴婢過其舍則給酒食夫婦嘯詠相視爲娛山南西道節度使鄭餘慶辟爲參謀敦趣就職不曉吏事餘
慶稱長者文宗時左補闕王直方其里中人也上書論事見便殿訪遺逸直方薦觀高行詔以起居郎召

辦疾不至

陸龜蒙字魯望元方七世孫也父賓虞以文歷侍御史龜蒙少高放通六經大義尤明春秋舉進士一不
中往從湖州刺史張搏游博歷湖蘇二州辟以自佐嘗至饒州三日無所詣刺史蔡京率官屬就見之龜
蒙不樂拂衣去居松江甫里多所論撰雖幽憂疾痛貲無十日計不少輟也文成竄囊篋中或歷年不省
爲好事者盜去得書熟誦乃錄譬比勤勤朱黃不去手所藏雖少其精皆可傳借人書篇帙壞舛必爲輯
褊刊正樂聞人學講論不倦有田數百畝屋三十楹田苦下雨潦則與江通故常苦飢身舂錘棘刺無休
時或譏其勞答曰堯舜黜瘠禹胼胝彼聖人也吾一褐衣敢不勤乎嗜茶置園顧渚山下歲取租茶自判
品第張又新爲水說七種其二慧山泉三虎丘井六松江人助其好者雖百里爲致之初病酒再葺乃已
其後客至絮壺置杯不復飲不喜與流俗交雖造門不肯見不乘馬升舟設蓬席齋束書茶竈筆牀釣具
往來時謂江湖散人或號天隨子甫里先生自比涪翁漁父江上丈人後以高士召不至李蔚盧攜素與
善及當國召拜左拾遺詔方下龜蒙卒光化中韋莊表龜蒙及孟郊等十人皆贈右補闕陸氏在姑蘇其
門有巨石遠祖續嘗事吳爲鬱林太守罷歸無裝舟輕不可越海取石爲重人稱其廉號鬱林石世保其
居云

唐書卷一百九十六

唐書卷一百九十六考證

隱逸孟詵傳○舊書入方伎傳

潘師正傳貝州宗城人○舊書作趙州贊人

賀知章傳○舊書入文苑傳

唐書卷一百九十六考證

唐書卷一百九十七

宋 端 明 殿 學 士 宋 祁 撰

列傳第一百二十二

循吏

治者君也求所以治者民也推君之治而濟之民吏也故吏良則法平政成不良則王道弛而敗矣在堯舜時曰九德咸事也百工惟時也在周文武時曰棫櫟能官人也南山有臺樂得賢也是循吏之效也堯舜五帝之盛帝文武三王之顯王不能去是而治後世可乎哉唐興承隋亂離剗被荒荼始擇用州刺史縣令太宗嘗曰朕思天下事內夜不安枕永惟治人之本莫重刺史故錄姓名於屏風臥興對之得才否狀輒疏之下方以擬廢置又詔內外官五品以上舉任縣令者於是官得其人民去歎愁就安安都督刺史其職察州縣間遣使者循行天下劾舉不職始都督刺史皆天子臨軒冊授後不復冊然猶受命日對便殿賜衣物乃遣玄宗開元時已辭仍詣側門候進止所以光寵守臣以責其功初刺史準京官得佩魚品卑者假緋魚開元中又錮廢酷吏懲無良羣臣化之革苛矯之風爭以惠利顯復詔三省侍郎缺擇嘗任刺史者郎官缺擇嘗任縣令者至宰相名臣莫不孜孜育長人不可輕授亟易是以授受之間雖不能

皆善而所得十五故協氣嘉生薰爲太平垂祀三百與漢相埒致之之術非循吏謂何故條次治宜以循
厥庸若將相大臣兼以勳閥著者名見本篇不列於茲

韋仁壽京兆萬年人隋大業末爲蜀郡司法書佐斷獄平得罪者皆自以韋君所論死無恨高祖入關遣
使者徇定蜀承制擢仁壽爲州都督府長史南寧州納款朝廷歲遣使撫接至率貪沓邊人苦之多叛去
帝素聞仁壽治理詔檢校南寧州都督寄治越巂詔歲一按行尉勞仁壽將兵五百人循西洱河開地數
千里稱詔置七州十五縣酋豪皆來賓見卽授以牧宰威令簡嚴人人安悅將還會長泣曰天子藉公鎮
撫奈何欲去我仁壽以池壁未立爲解諸酋卽相率築城起廩甫旬略具仁壽乃告以實曰吾奉詔第撫
循庸敢擅留夷夏父老乃悲啼祖行遣子弟隨貢方物天子大悅仁壽請徙治南寧州假兵遂撫定詔可
敕益州給兵護送刺史竇軌疾其功詠言山獠方叛未可以遠略不時遣歲餘卒

陳君賓陳鄱陽王伯山子也仕隋爲襄國通守武德初挈郡聽命封東陽郡公遷邢州刺史貞觀初徙鄧
州州承喪亂後百姓流冗君賓加意勞徠不替月皆還自業明年四方霜潦獨君賓所治有年儲倉充羨
蒲虞二州民就食其境太宗下詔勞之曰去年關內六州穀不登糶糧少令析民房逐食聞刺史與百姓
識朕此懷務相安養還有贏糧出布帛贈遺行者此知水旱常數更相拯贍禮讓興行海內之人皆爲兄

弟變澆薄之風朕顧何憂已命有司錄刺史以下功最百姓養戶免今年調物是歲入爲太府少卿轉少
府少監坐事免起爲虔州刺史卒

張允濟青州北海人仕隋爲武陽令以愛利爲行元武民以牸牛依婦家者久之孳十餘犢將歸而婦家
不與牛民訴縣縣不能決乃詣允濟允濟曰若自有令吾何與爲民泣訴其抑允濟因令左右縛民蒙其
首過婦家云捕盜牛者命盡出民家牛質所來婦家不知遽曰此婿家牛我無豫卽遣左右撤蒙曰可以
此牛還婿婦家叩頭服罪元武吏大慙允濟過道旁有姥廬守所時葱因教曰第還舍脫有盜當告令姥
謝歸俄大亡葱允濟召十里內男女盡至物色驗之果得盜者有行人夜發遺袍道中行十餘里乃寤人
曰吾境未嘗拾遺可還取之旣而得袍舉政尤異遷高陽郡丞郡缺太守獨統郡事吏下畏悅賊帥王須
拔攻郡於是糧屈吏食槐葉蘘節無叛者貞觀初累遷刑部侍郎封武城縣男擢幽州刺史卒時又有李
桐客者亦以治稱初仕隋爲門下錄事煬帝在江都以四方日亂謀徙都丹陽召羣臣議左右希意以爲
江左且望幸若巡狩勒石紀功復禹舊跡顧不其然桐客獨曰吳會卑濕而陋不足奉萬乘給三軍吳人
力屈無以堪命且踰越險阻非社稷福御史劾以訕毀幾得罪而免爲宇文化及脅將至黎陽又陷竇建
德賊平授秦王府法曹參軍貞觀初累爲通巴二州刺史治尚清平民呼爲慈父桐客冀州衡水人

李素立趙州高邑人曾祖義深仕北齊爲梁州刺史父政漢爲隋水部郎使淮南死于盜素立仕武德初擢監察御史民犯法不及死高祖欲殺之素立諫曰三尺法天下所共有一動搖則人無以措手足方大業經始奈何輦轂下先棄刑書乎帝嘉納由是恩顧特異以親喪解官起授七品清要有司擬雍州司戶參軍帝曰要而不清復擬秘書郎帝曰清而不要乃授侍御史貞觀中轉揚州大都督府司馬初突厥鐵勒部內附卽其地爲瀚海都護府詔素立領之於是闕泥熟別部數梗邊素立以不足用兵遣使諭降夷人感其惠率高牛以獻素立止受酒一柸歸其餘乃開屯田立署次虜益畏威歷太僕鴻臚卿累封高邑縣侯出爲綿州刺史永徽初徙蒲州將行還所餘儲糒并什器于州齋家書就道會卒高宗特廢朝一日諡曰平

孫至遠始名鵬而素立方奉使謂家人曰古有待事名子吾此役可命子孫矣遂以名之少秀晤能治尙書左氏春秋未見杜預釋例而作編記大趣略同復撰周書起后稷至赧爲傳紀令狐德棻許其良史始調蒲州參軍累補乾封尉上元時制策高第授明堂主簿以喪解官既除調鴻臚主簿奏戎狄簿領高宗悅擢監察御史裏行忤貴倖外遷久乃歷司勳吏部員外郎中遷天官侍郎知選事疾令史受賄謝多所結易吏肅然斂手有王忠者被放吏謬書其姓爲士欲擬訖增成之至遠曰調者三萬無士姓此必王忠

吏叩頭服罪至遠之知選以內史李昭德進人或勸其往謝答曰公以公用我奈何欲謝以私卒不請故昭德銜之出爲壁州刺史卒年四十八至遠父休烈亦有文終邽今年四十九世歎其父子材不盡云至遠見桓彥範力言其賢慮從愿尙少高以評目許弟從遠且貴豫言其位以驗所至蘇頌其出也少失母至遠愛視甚謹以女妻之友兄弟事寡姊有禮世稱其德從遠清密有學神龍初歷中書令太府卿累封趙郡公諡曰懿兄弟皆德望相埒又從父游道武后時冬官尙書同鳳閣鸞臺三品至遠子畚字玉田少聰警初歷汜水主簿遇事蠶銳雖厮豎一閱輒記姓名居業黜陟使路敬潛薦其清白擢右臺監察御史裏行臺廢授監察御史累轉國子司業事母謹累世同居長幼有禮舍妻物故時母病恐悲傷約家人無以哭聞母所朝夕省侍無憂色母終毀而卒從遠子歲年十餘歲會中宗祀明堂以近臣子弟執籩豆嚴進止中禮授右宗衛兵曹參軍歷洛陽尉累遷兵部郎中發扶風兵應姚暉稱旨遷諫議大夫封贊皇縣伯終兵部侍郎嚴善草隸爲參軍時製一裘服終身

薛大鼎字重臣蒲州汾陰人父粹爲隋介州長史與漢王諒同反誅大鼎賈爲官奴流辰州用戰功得還高祖兵興謁見龍門因說帝絕龍門軍承豐倉就食傳檄遠近據天府示豪傑爲拊背扼喉計帝奇之時

諸將已決策先攻河東故議置授大將軍府察非掾出爲山南道副大使開屯田以實倉廩趙郡王孝恭討輔公祏以大鼎爲饒州道軍師引兵度彭蠡湖以功遷涪州刺史累徙滄州無棣渠久厥塞大鼎浚治屬之海商賈流行里民歌曰新溝通舟楫利屬滄海魚鹽至昔徒行今聘駟美哉薛公德滂被又疏長蘆漳衡三渠泄汗潦水不爲害是時鄭德本在瀛州賈敦頤爲冀州皆有治名故河北稱鎗脚刺史永徽中遷銀青光祿大夫行荊州大都督長史卒諡曰恭

子克構有器識永隆初歷戶部郎中族人黃門侍郎頤以弟紹尙太平公主問於克構答曰室有傲婦善士所惡夫惟淑德以配君子無患可矣頤不敢沮而紹卒誅陳思忠居父喪詔奪服客往弔思忠辭以辰日不見克構曰事親者避嫌可也既孤矣則無不哭世服其言天授中遷麟臺監坐弟爲酷吏所陷流死

嶺南

賈敦頤曹州冤句人貞觀時數歷州刺史資廉潔入朝常盡室行車一乘傲甚羸馬繩羈道上不知其刺史也久之爲洛州司馬以公累下獄太宗賞之有司執不贖帝曰人孰無過吾去太甚者若悉繩以法雖子不得於父況巨得事其君乎遂獲原徙瀛州刺史州瀕滹沱滄二水歲溢壞室廬墜數百里敦頤爲立堰庸水不能暴百姓利之時弟敦實爲饒陽令政清靜吏民嘉美舊制大功之嫌不連官朝廷以其

兄弟治行相高故不徙以示寵永徽中遷洛州洛多豪右占田踰制敦頤舉沒者三千餘頃以賦貧民發姦擿伏下無能欺卒于官咸亨初敦實爲洛州長史亦寬惠人心懷向洛陽令楊德幹矜酷烈杖殺人立威敦實喻止曰政在養人傷生過多雖能不足貴也德幹爲竄滅始洛人爲敦頤刻碑大市旁及敦實入爲太子右庶子人復爲立碑其側故號常棣碑歷懷州刺史有美跡永淳初致仕病篤子孫迎醫敦實不肯見曰未聞良醫能治老也卒年九十餘子膺福左散騎常侍昭文館學士以竇懷貞黨誅德幹歷澤齊汴相四州刺史有威嚴時語曰靈食三斗炭不逢楊德幹天授初子神讓與徐敬業起兵皆及誅田仁會雍州長安人祖軌隋幽州刺史封信都郡公父弘襲封至陵州刺史仁會擢制舉仕累左武侯中郎將太宗征遼東而薛延陀以數萬騎掩河內詔仁會與執失思力率兵擊敗之尾逐數百里延陀幾生得璽書嘉尉承徽中爲平州刺史歲旱自暴以祈而雨大至穀遂登人歌曰父母育我兮田使君擬精誠兮上天聞中田致雨兮山出雲倉廩實兮禮義申願君常在兮不患貧五遷勝州都督境有風賊衣山黜行人仁會發騎捕格夷之城門夜開道無寇跡入爲太府少卿遷右金吾將軍所得祿估有贏輒入之官人以爲尙名然資彊擊疾惡晝夜循行有絲毫姦必發廷中謫罰日數百京師無貴賤舉憚之有女巫傳鬼道惑衆自言能活死人市里尊神仁會劾徙于邊轉右衛將軍以年老乞骸骨卒年七十八諡曰威

子歸道明經及第累擢通事舍人內供奉左衛郎將突厥默啜請和武后詔將軍閻知微冊可汗號持節往默啜又遣使謝知微遇諸道即與緋袍銀帶因表使者即到請備禮廷賜歸道諫曰虜背惠積年今悔過入朝解辦削衽宜待天旨而知微擅賜使朝廷何以加之宜敕初服須天子命小國使者不足備禮廷之后從焉默啜將至單于都護府詔歸道攝司賓卿往勞默啜請六胡州及都護府地不得大怨望執歸道將害之歸道色不撓嘗且讓為陳禍福默啜亦悔會有詔賜默啜粟三萬石綵五萬段農器三千且許結婚於是更以禮遣歸道既還具陳默啜不臣狀請備邊已而果反乃擢歸道夏官侍郎益親信遷左金吾將軍司膳卿押千騎宿衛玄武門桓彥範等誅二張而歸道不豫聞及索騎士拒不應事平彥範欲誅之以辭直免還私第然中宗壯其守召拜太僕少卿遷殿中少監右金吾將軍卒贈輔國大將軍追封原國公諡曰烈帝自為文以祭子賓庭開元時至光祿卿

裴懷古壽州壽春人儀鳳中上書闕下補下邳主簿頻遷監察御史姚崇道蠻反命懷古馳驛往懷輯之申明誅賞歸者日千計俄縛首惡遂定南方蠻夏立石著功恆州浮屠為其徒誣告祝詛不道武后怒命按誅之懷古得其枉為后申訴不聽因曰陛下法與天下畫一豈使臣殺無辜以希盛旨哉即其人有不臣狀臣何情寬之后意解得不誅閻知微之使突厥懷古監其軍默啜為知微稱可汗又欲官懷古不肯

拜將殺之辭曰守忠而死與毀節以生孰愈請就斬不避也遂囚軍中因得亡而素庭弱不能騎宛轉山谷間僅達并州時長史武重規縱暴左右妄殺人取賞見懷古至爭執之有果毅嘗識懷古疾呼曰裴御史也遂免遷祠部員外郎姚崇等叩闕下願得懷古鎮安遠夷拜姚州都督以疾辭始安賊歐陽倩眾數萬剽沒州縣以懷古為桂州都督招討擊使未踰嶺逆以書諭禍福賊迎降自陳為吏侵而反懷古知其誠以為示不疑可破其謀乃輕騎赴之或曰獠夷難親備之且不信況易之哉答曰忠信可通神明況裔人耶身至壁撫諭倩等大喜悉歸所掠出降雖諸洞素翻覆者亦牽連根附嶺外平徙相州刺史并州大都督長史所至吏民懷愛神龍中召為左羽林大將軍未至官還為并州人知其還攜扶老稚出迎崔宣道始代為長史亦野次懷古不欲厚愧宣道使人驅迎者還而來者愈眾得人心類如此俄轉幽州都督綏懷兩蕃將舉落內屬會以左威衛大將軍召而孫佺代之佺不知兵遂敗其師卒于官懷古清介審慎在幽州時韓琬以監察御史監軍稱其馭士信臨財廉國名將云

韋景駿司農少卿弘機孫中明經神龍中歷肥鄉令縣北瀕漳連年泛溢人苦之舊防迫漕渠雖峭岸隨即壞決景駿相地勢益南千步因高築鄭水至堤趾輒去其北燥為腴田又維艚以梁其上而廢長橋功少費約後遂為法方河北飢身巡閭里勸人通有無教導撫循縣民獨免流散及去人立石著其功後為

貴鄉令有母子相訟者景駿曰令少不天常自痛爾幸有親而忘孝邪教之不孚令之罪也因嗚咽流涕付授孝經使習大義於是母子感悟請自新遂爲孝子當時治有名者景駿與清漳令馮元淑臨洛令楊茂謙三人景駿後數年爲趙州長史道出肥鄉民喜爭奉酒食迎犒有小兒亦在中景駿曰方兒曹未生而吾去邑非有舊恩何故來對曰耆老爲我言學廬館舍橋郭皆公所治意公爲古人今幸親見所以來景駿爲留終日後遷房州刺史州窮險有蠻夷風無學校好祀淫鬼景駿爲諸生貢舉通隘道作傳舍罷祠房無名者景駿之治民求所以便之類如此轉奉天令未行卒茂謙擢制舉授左拾遺內供奉爲吏介而勤歷秘書郎始竇懷貞雅重其材及執政薦爲大理正左臺御史中丞開元初出爲魏州刺史河北道按察使與司馬張懷玉同鄉長相善洎晚有隙掉訐短長左遷桂州都督徙廣州卒景駿子述自有傳李惠登營州柳城人爲平盧軍裨將安祿山亂從董秦泛海略定滄棣等州輕兵遠鬪賊不支戰輒北史思明反惠登陷賊以計挺身走山南依來瑱表試金吾衛將軍李希烈反屬以兵二千使屯隋州惠登挈州以歸卽拜刺史州數被亂野如蕪人無處業惠登雖朴素無學術而視人所謂利者行之所謂害者去之率心所安暗與古合政清靜居二十年田畝闢戶口日增人歌舞之於是節度使于頔狀其績詔加御史大夫升階爲上州俄檢校國子祭酒卒贈洪州都督

羅珣越州會稽人寶應初詣闕上書授太常寺太祝曹王舉領江西荆襄節度使常署幕府累遷副使舉卒軍亂劫府庫珣取首惡十餘人斬以徇環棘廷中俾投所劫庫物一日皆滿乃賞餘黨召爲奉天令中官出入係道吏緣以犯禁珣榜笞之雖死不置自是屏息擢廬州刺史民間病者捨醫藥禱淫祀珣下令止之修學宮政教簡易有芝草白雀淮南節度使杜佑上治狀賜金紫服再遷京兆尹請減平糶半以常賦充之人賴其利以老病求解徙太子賓客累封襄陽縣男卒諡曰夷

子讓字景宣以文學蚤有譽舉進士宏辭賢良方正皆高第爲咸陽尉父喪幾毀滅服除布衣糲飯不應辟署十餘年淮南節度使李鄴卽所居敦請置幕府除監察御史位給事中累遷福建觀察使兼御史中丞有仁惠名或以婢遺讓者問所從答曰女兒九人皆爲官所賣留者獨老母耳讓慘然爲寢券召母歸之入爲散騎常侍拜江西觀察使卒年七十一贈禮部尙書

韋丹字文明京兆萬年人周大司空孝寬六世孫高祖琨以洗馬事太子承乾諫不聽太宗才之擢給事中高宗在東宮爲中舍人封武陽縣侯孝敬爲太子琨以右中護爲詹事卒贈秦州都督諡曰貞丹孤從外祖顏真卿學擢明經調安遠令以讓庶兄入紫閣山事從父能復舉五經高第歷咸陽尉張獻甫表佐邪靈幕府順宗爲太子以殿中侍御史召爲舍人新羅國君死詔拜司封郎中往弔故事使外國賜州

縣十官竇以取贖號私覲官丹曰使外國不足于資宜上請安有買官受錢卽具疏所宜費帝命有司與之因著令未行而新羅立君死還爲容州刺史教民耕織止惰游興學校民貧自鬻者贖歸之禁吏不得掠爲隸始城州周十三里屯田二十四所教種茶麥仁化大行遷河南少尹未至徙義成軍司馬以諫議大夫召有直名劉闢反議者欲釋不誅丹上疏以爲孝文世法廢人慢當濟以威今不誅闢則可使者唯兩京耳憲宗褒美會闢圍梓州乃授丹劍南東川節度使代李康至漢中上言康守方盡力不可易召還議蜀事闢去梓因以讓高崇文乃拜晉慈隰州觀察使封咸陽郡公閱歲自陳所治三州非要害地不足張職爲國家費不如屬之河東帝從之徙爲江南西道觀察使丹計口受俸委餘於官罷八州冗食者收其財始民不知爲瓦屋草茨竹椽久燥則憂而焚丹召工教爲陶聚材於場度其費爲估不取贏利人能爲屋者受材瓦于官免半賦徐取其償逃未復者官爲爲之貧不能者畀以財身往勸督置南北市爲營以舍軍歲中旱募人就功厚與直給其食爲衡南北夾兩營東西七里以廢倉爲新廩馬息不死築堤扞江長十二里竇以疏漲凡爲陂塘五百九十八所灌田萬二千頃有吏主倉十年丹覆其糧亡三千斛丹曰吏豈自費邪籍其家盡得文記乃權吏所奪丹召諸吏曰若恃權取於倉罪也與若期一月還之皆頓首謝及期無敢違有卒違令當死釋不誅去上書告丹不法詔丹解官待辨會卒年五十八驗卒所告皆

不竇丹治狀愈明太和中裴誼觀察江西上言爲丹立祠堂刻石紀功不報宣宗讀元和實錄見丹政事卓然它日與宰相語元和時治民孰第一周墀對臣嘗守江西韋丹有大功德被八州歿四十年老幼思之不忘乃詔觀察使紇于泉上丹功狀命刻功于碑

子宙推廕累調河南府司錄參軍李珣表河陽幕府宣宗謂宰相墀曰丹有子否以宙對帝曰與好官乃拜侍御史三遷度支郎中盧鈞節度太原表宙爲副是時回鶻已破諸部入塞下剽殺吏民鈞欲得信重吏視邊宙請往自定襄鴈門五原絕武州塞略雲中踰句注徧見酋豪鑄諭之視亭障守卒增其粟約吏不得擅以兵侵諸戎犯者死於是三部六蕃諸種皆信悅召拜吏部郎中出爲永州刺史州方災歉乃斥官下什用所以供刺史者得九十餘萬錢爲市糧餉俗不知法多觸罪宙爲書制律并種植爲生之宜戶給之州負嶺轉餉艱險每饑人輒孳死宙始築常平倉收穀羨餘以待乏罷冗役九百九十四員縣舊置吏督賦宙俾民自輸家十相保常先期湘源生零陵香歲市上供人苦之宙爲奏罷民貧無牛以力耕宙爲置社二十家月會錢若干探名得者先市牛以是爲準久之牛不乏立學官取仕家子弟十五人充之初俚民婚出財會賓客號破酒晝夜集多至數百人貧者猶數十力不足則不迎至淫奔者宙條約使略如禮俗遂改邑中少年常以七月擊鼓羣入民家號行盜皆迎爲辦具謂之起盆後爲解素喧呼痕闕宙

至一切禁之還爲大理少卿久之拜江西觀察使政簡易南方以爲世官遷嶺南節度使南詔陷交趾撫兵積備以幹聞加檢校尚書左僕射同中書門下平章事咸通中卒

雷弟岫字伯起有亦名宙在嶺南以從女妻小校劉謙或諫止之岫曰吾子孫或當依之謙後以功爲封州刺史生二子卽隱襲盧攜舉進士陋甚岫獨謂攜必大用攜執政岫自泗州刺史擢福建觀察使云
盧弘宣字子章元和中擢進士第鄭權帥襄陽辟署幕府李愬代權二人交憾弘宣始謁愬愬敕左右謹衛既與語見其冲遠不覺洗然裴度留守東都表爲判官遷累給事中駙馬都尉韋處仁拜虢州刺史弘宣謂非所任還詔不下開成中山南江西大水詔弘宣與吏部郎中崔瓘分道賑卹使有指還遷京兆尹刑部侍郎拜劍南東川節度使時歲饑盜發結會豪自王僞署官吏發教屠招亡命聯蓬瀛嘉榮諸州賊豐落搖亂根株磐熾弘宣下檄脅諭賊黨稍降其黠強者署軍中辱無能還之農魁長逃入峽中吏捕誅之徙義武節度使弘宣性寬厚政目簡省人便安之然犯者不甚貸河朔故法偶語軍中則死弘宣使除之初詔賜其軍粟三十萬斛貯飛狐弘宣計輓費不能滿直赦吏守之明年春大旱教民隨力往取時幽魏饑甚獨易定自如至秋悉收所貸軍食以饒歷工部尚書祕書監以太子少傅致仕卒年七十七贈尚書右僕射弘宣患士庶人家祭無定儀乃合十二家法損益其當次以爲書子告字子有及進士第終給

事中

薛元賞亡里系所來太和初自農少卿出爲漢州刺史時李德裕爲劍南西川節度使會維州降德裕受之以聞牛僧孺沮其議執還之元賞上書極言可因撫之潰虜膺腹不可失不省段文昌代德裕狀元賞治當最遷累司農卿京兆尹出爲武靈節度使罷泗口獵稅人以爲便徙邠寧會昌中德裕當國復拜京兆尹都市多俠少年以黨墨鑲虐夸詭力剽劫坊閭元賞到府三日收惡少杖死三十餘輩陳諸市餘黨懼爭以火滅其文元賞長吏事能推言時弊件白之禁屯怙勢擾府縣元賞數與爭不少縱由是軍暴折戢百姓賴安就加檢校吏部尚書閏歲進工部尚書領諸道鹽鐵轉運使德裕用元賞弟元龜爲京兆少尹知府事宣宗立罷德裕而元龜坐貶崖州司戶參軍元賞下除袁王傳久之復拜昭義節度使卒何易于不詳何所人及所以進爲益昌令縣距州四十里刺史崔朴常乘春與賓屬汎舟出益昌旁索民挽繹易于身引舟朴驚問狀易于曰方春百姓耕且蠶惟令不事可任其勞朴愧與賓客疾驅去鹽鐵官權取茶利詔下所在毋敢隱易于視詔書曰益昌人不征茶且不可活矧厚賦毒之乎命吏閣詔吏曰天子詔何敢拒吏坐死公得免竄邪對曰吾敢愛一身移暴于民乎亦不使罪爾曹卽自焚之觀察使素賢之不効也民有死喪不能具葬者以俸敕吏爲辦召高年坐以問政得失凡闕民在廷易于丁盜指曉枉

直杖楚遺之不以付吏獄三年無囚督賦役不忍迫下戶或以俸代輸饋給往來傳符外一無所進故無異稱以中上考選羅江令刺史裴休嘗至其邑導侍不過三人廉約蓋資性云

唐書卷一百九十七

唐書卷一百九十七考證

李素立傳父政藻○臣酉按宰相世系表作政期政藻弟也

薛大鼎傳鄭德本在瀛州賈敦頤為冀州○舊書作瀛州刺史賈敦頤曹州刺史鄭德本臣酉按賈敦頤傳亦作瀛州新書自相矛盾

韋景駿傳司農少卿弘機孫○臣酉按弘機子餘慶餘慶子岳岳子景駿則景駿乃弘機會孫也此云孫誤總由以岳子景駿為二人皆餘慶子故以景駿為弘機孫也辨詳舊書考證

唐書卷一百九十七考證

唐書卷一百九十八

宋 端 明 殿 學 士 宋 祁 撰

列傳第一百二十三

儒學上

高祖始受命鈕纒夷荒天下略定即詔有司立周公孔子廟于國學四時祠求其後議加爵土國學始置
 生七十二員取三品以上子弟若孫為之太學百四十員取五品以上四門學百三十員取七品以上郡
 縣二等上郡學置生六十員中下以十為差上縣學置生四十員中下亦以十為差又詔宗室功臣子孫
 就祕書外省別為小學太宗身躡韉風繼露沐然銳情經術即王府開文學館召名儒十八人為學士與
 議天下事既即位殿左置弘文館悉引內學士番宿更休聽朝之間則與討古今道前王所以成敗或日
 晷夜艾未嘗少怠貞觀六年詔罷周公祠更以孔子為先聖顏氏為先師盡召天下惇師老德以為學官
 數臨幸觀釋菜命祭酒博士講論經義賜以束帛生能通一經者得署吏廣學舍千二百區三學益生員
 并置書算二學皆有博士大抵諸生員至三千二百自玄武屯營飛騎皆給博士授經能通一經者聽入
 貢限四方秀艾挾策負素登集京師文治燁然勃興於是新羅高昌百濟吐蕃高麗等羣酋長並遣子弟

入學鼓箠踵堂者凡八千餘人紆侈袂曳方履間秩秩雖三代之盛所未聞也帝又讐正五經繆闕頌天下示學者與諸儒粹章句爲義疏俾久其傳因詔前代通儒梁皇侃褚仲都周熊安生沈重陳沈文阿周弘正張譏隋何妥劉炫等子孫並加引擢二十一年詔左丘明卜子夏公羊高穀梁赤伏勝高堂生戴聖毛萇孔安國劉向鄭眾杜子春馬融盧植鄭玄服虔何休王肅王弼杜預范甯二十一人用其書行其道宜有以褒大之自今並配享孔子廟庭於是唐三百年之盛稱貞觀蓋不其然高宗尙吏事武后矜權變至諸王駙馬皆得領祭酒初孔穎達等始署官發五經題與諸生酬問及是惟判祥瑞案三牒卽罷玄宗詔羣臣及府郡舉通經士而褚無量馬懷素等勸講禁中天子尊禮不敢盡臣之置集賢院部分典籍乾元殿博彙羣書至六萬卷經籍大備又稱開元焉祿山之禍兩京所藏一爲炎埃官牘私楮喪脫幾盡章甫之徒劫爲縵胡於是嗣帝區區救亂未之得安暇語貞觀開元事哉自楊綰鄭餘慶鄭覃等以大儒輔政議優學科先經誼黜進士後文辭亦弗能克也文宗定五經鑿之石張參等是正訛文寥寥一二可紀由是觀之始未嘗不成于艱難而後敗於易也嘗論之武爲救世砭劑文其膏梁歟亂已定必以文治之否者是病損而進砭劑其傷多矣然則武得之武治之不免霸且盜聖人反是而王故曰武創業文守成百世不易之道也若乃舉天下一之於仁義莫若儒儒待其人乃能光明厥功宰相大臣是已至專誦

習傳授無它大事業者則次爲儒學篇

徐曠字文遠以字行南齊司空孝嗣五世孫父徹梁祕書郎尙元帝女安昌公主江陵陷俘以西客偃師費不能自給兄文林鬻書于肆文遠日閱之因博通五經明左氏春秋時耆儒沈重講太學受業常千人文遠從之質問不數日辭去或問其故答曰先生所說紙上語耳若與境彼所未見者尙何觀重知其語召與反復研辯嗟嘆其能性方正舉動純重竇威楊玄感李密王世充皆從受學隋開皇中累遷太學博士詔與漢王諒授經會諒反除名爲民大業初禮部侍郎許善心薦文遠及包愷褚徽陸德明曾達爲學官擢國子博士愷等爲太學博士世稱左氏有文遠禮有褚徽詩有曾達易有陸德明皆一時冠云文遠說經徧舉先儒異論分明是非乃出新意以折衷聽者忘勞越王侗署國子祭酒時洛陽饑文遠自出城樵拾爲李密所得密使文遠南向坐備弟子禮拜之文遠謝曰前日以先王之道授將軍今將軍擁兵百萬威振四海猶能屈體老夫此盛德也安敢不盡將軍若欲爲伊霍繼絕扶傾吾雖老猶願盡力如爲莽卓乘危迫險則僕耄矣無能爲也密頓首曰幸得位上公思所以竭力先征化及刷國恥然後入見天子請罪于有司惟先生教之答曰將軍名臣子累世盡節前陷玄感黨迷未遠而復今若終之以忠天下之人所望於將軍者密頓首曰恭聞命俄而世充專制密又問焉將曰彼殘忍而意褊促必速於亂將軍

非破之不可以朝密曰常謂先生儒者不學軍旅至籌大計乃明略過人密敗復入東都世充給稍異等而文遠見輒先拜或問君踞見李密而下王公何邪答曰密君子能受鄙生之揖世充小人無容故人義相時而動可也世充僭號以爲國子博士士會奔長安世充怒絕其粟文遠餓幾死數矣身出樵爲羅士信所獲送京師仍爲國子博士高祖幸國學觀釋奠文遠發春秋題論難鋒生隨方占對莫能屈帝異之封東莞縣男卒年七十四孫有功自有傳

陸元朗字德明以字行蘇州吳人善名理言受學於周弘正陳太建中後主爲太子集名儒入講承光殿德明始冠與下坐國子祭酒徐孝克敷經倚貴縱辯衆多下之獨德明申答屢奪其說舉坐咨賞解褐始興國左常侍陳亡歸鄉閉隋煬帝擢祕書學士大業間廣召經明士四方踵至於德明與魯達孔褒共會門下省相酬難莫能詘遷國子助教越王侗署爲司業入殿中授經王世充僭號封子玄恕爲漢王以明德爲師卽其廬行束脩禮德明恥之服巴豆劑僵偃東壁下玄恕入拜牀垂德明對之遺利不復開口遂移病成阜世充平秦王辟爲文學館學士以經授中山王承乾補太學博士高祖已釋奠召博士徐文遠浮屠慧乘道士劉進喜各講經德明隨方立義徧析其要帝大喜曰三人者誠辯然德明一舉輒蔽可謂賢矣賜帛五十四遷國子博士封吳縣男卒論議甚多傳于世後太宗閱其書嘉德明博辯以布帛二

百段賜其家子敦信麟德中繇左侍極檢校右相累封嘉興縣子以老疾致仕終大司成

曹憲揚州江都人仕隋爲祕書學士聚徒教授凡數百人公卿多從之游於小學家尤邃自漢杜林衛宏以後古文亡絕至憲復興煬帝令與諸儒議桂苑叢規正文字又註廣雅學者推其該藏于祕書貞觀中揚州長史李襲譽薦之以弘文館學士召不至卽家拜朝散大夫當世榮之太宗嘗讀書有奇難字輒遣使者問憲憲具爲音注援驗詳復帝咨尙之卒年百餘歲憲始以梁昭明太子文選授諸生而周郡魏模公孫羅江夏李善相繼傳授於是其學大興句容許淹者自浮屠還爲儒多識廣聞精故訓與羅等並名家羅官沛王府參軍事無錫丞模武后時爲左拾遺子景倩亦世其學以拾遺召後歷度支員外郎善見子崑傳

顏師古字籀其先琅邪臨沂人祖之推自高齊入周終隋黃門郎遂居關中爲京兆萬年人父思魯以儒學顯武德初爲秦王府記室參軍事師古少博覽精故訓學善屬文仁壽中李綱薦之授安養尉尙書左僕射楊素見其年弱謂曰安養劇縣子何以治之師古曰割鷄未用牛刀素驚其言大後果以幹治聞時薛道衡爲襄州總管與之推舊佳其才每作文章令指摘疵短俄失職歸長安不得調寔甚資教授爲生高祖入關謁見長春宮授朝散大夫拜燉煌公府文學累遷中書舍人專典機密師古性敏給明練治體

方軍國務多詔令一出其手冊奏之工當時未有及者太宗卽位拜中書侍郎封琅邪縣男以母喪解服除還官歲餘坐公事免帝嘗歎五經去聖遠傳習寢訛詔師古于祕書省考定多所釐正既成悉詔諸儒識於是各執所習共非詰師古師古輒引晉宋舊文隨方曉答誼據該明出其悟表人人歎服尋加通直郎散騎常侍帝因頒所定書於天下學者賴之俄拜祕書少監專刊正事古篤奇字世所惑者討析申熟必暢本源然多引後生與訾校抑素流先貴勢雖商賈富室子亦竄選中由是素議薄之斥爲郴州刺史未行帝惜其才讓曰鄉之學信可稱者而事親居官朕無聞焉今日之行自誰取之念卿曩經任使朕不忍棄後宜自戒師古謝罪復留爲故官師古性簡峭視輩行傲然罕所推接既負其才早見驅策意望甚高及是頻被譴仕益不進罔然喪沮乃闔門謝賓客巾褐裙屐放情蕭散爲林墟之適多藏古圖書器物書帖亦性所篤愛與譔五禮成進爵爲子又爲太子承乾注班固漢書上之賜物二百段良馬一時人謂杜征南顏祕書爲左丘明班孟堅忠臣帝將有事泰山詔公卿博士雜定其儀而論者爭爲異端師古奏臣譔定封禪儀注書在十一年于時諸儒謂爲適中於是以付有司多從其說遷祕書監弘文館學士十九年從征遼道病卒年六十五諡曰戴其所注漢書急就章大顯於時永徽三年子揚廷爲符璽郎表上師古所譔匡謬正俗八篇初思魯與妻不相宜師古苦諫父不聽情有所隔帝及之

師古弟相時字睿亦以學聞爲天策府參軍事貞觀中累遷諫議大夫有爭臣風轉禮部侍郎羸瘠多病師古死不勝哀而卒

師古叔游秦武德初累遷廉州刺史封臨沂縣男時劉黑闥初平人多彊暴比游秦至禮讓大行邑里歌之高祖下璽書獎勞終鄆州刺史譔漢書決疑師古多資取其義

孔穎達字仲達冀州衡水人八歲就學誦記日千餘言闡記三禮義宗及長明服氏春秋傳鄭氏尙書詩禮記王氏易善屬文通步麻營造同郡劉焯焯名重海內初不之禮及請質所疑遂大畏服隋大業初舉明經高第授河內郡博士煬帝召天下儒官集東都詔國子祕書學士與論議穎達爲冠又年最少老師宿儒恥出其下陰遣客刺之匿楊玄感家得免補太學助教隋亂避地虎牢太宗平洛授文學館學士遷國子博士貞觀初封曲阜縣男轉給事中時帝新卽位穎達數以忠言進帝問孔子稱以能問於不能以多問於寡有若無實若虛何謂也對曰此聖人教人謙耳己雖能仍就不能之人以資所未能己雖多仍就寡少之人更資其多內有道外若無中雖實容若虛非特匹夫君德亦然故易稱蒙以養正明夷以莅衆若其據尊極之位衡聽耀明恃才以肆則上下不通君臣道乖自古滅亡莫不由此帝稱善除國子司業歲餘以太子右庶子兼司業與諸儒議麻及明堂事多從其說以論譔勞加散騎常侍爵爲子皇太子

令穎達議孝經章句因文以盡箴諷帝知數爭太子失賜黃金一斤絹百匹久之拜祭酒侍講東宮帝幸太學觀釋菜命穎達講經畢上釋奠頌有詔褒美後太子稍不法穎達爭不已乳夫人曰太子既長不宜數面折之對曰蒙國厚恩雖死不恨剴切愈至後致仕卒陪葬昭陵贈太常卿諡曰憲初穎達與顏師古司馬才章王恭王琰受詔撰五經義訓凡百餘篇號義贊詔改爲正義云雖包貫異家爲詳博然其中不能無謬冗博士馬嘉運駁正其失至相譏詆有詔更令裁定功未就永徽二年詔中書門下與國子三館博士弘文館學士考正之於是尙書左僕射于志寧右僕射張行成侍中高季輔就加增損書始布下穎達子志終司業志子惠元力學寡言又爲司業擢累太子諭德三世司業時人美之

王恭者滑州白馬人少篤學教授鄉閭弟子數百人貞觀初召拜太學博士講三禮別爲義證甚精博蓋文懿文達皆當時大儒每講徧舉先儒義而必暢恭所說

馬嘉運魏州繁水人少爲沙門還治儒學長論議貞觀初累除越王東閣祭酒退隱白鹿山諸方來受業至千一人十一年召拜太學博士弘文館學士以孔穎達正義繁釀故持摭其疵當世諸儒服其精高宗爲太子引爲崇賢館學士數與洗馬秦暉侍講宮中終國子博士

歐陽詢字信本潭州臨湘人父紇陳廣州刺史以謀反誅詢嘗從坐匿而免江總以故人子私養之親寢

悅敏悟絕人總教以書記每讀輒數行同盡遂博覽經史仕隋爲太常博士高祖微時數與游既即位累擢給事中詢初傲王羲之書後險勁過之因自名其體尺牘所傳人以爲法高麗嘗遣使求之帝歎曰彼觀其書固謂形貌魁梧邪嘗行見索靖所書碑觀之去數步復返及疲乃布坐至宿其傍三日乃得去其所嗜類此貞觀初歷太子率更令弘文館學士封渤海男卒年八十五

子通儀鳳中累遷中書舍人居母喪詔奪哀每入朝徒跣及門夜直藉藁以寢非公事不語還家輒號慟年饑未克葬居廬四年不釋服冬月家人以甌絮潛置席下通覺卽徹去遷累殿中監封渤海子天授初轉司禮卿判納言事輔政月餘會鳳閣舍人張嘉福請以武承嗣爲太子通與岑長倩等固執忤諸武意及長倩下獄坐大逆死來俊臣并引通同謀通雖被慘毒無異詞俊臣代占誅之神龍初追復官爵通妻孤母徐教以父書懼其墮嘗遺錢使市父遺跡通乃刻意臨做以求售數年書亞於詢父子齊名號大小歐陽體褚遂良亦以書自名嘗問虞世南曰吾書何如智永答曰吾聞彼一字直五萬君豈得此曰孰與詢曰吾聞詢不擇紙筆皆得如志君豈得此遂良曰然則何如世南曰君若手和筆調固可貴尙遂良大喜通晚自矜重以狸毛爲筆覆以兔毫管皆象犀非是未嘗書

朱子奢蘇州吳人從鄉人顧彪授左氏春秋善文辭隋大業中爲直祕書學士天下亂辭疾還鄉里後從

杜伏威入朝授國子助教太宗貞觀初高麗百濟同伐新羅連年兵不解新羅告急帝假子奢員外散騎侍郎持節諭旨平三國之憾子奢有儀觀夷人尊畏之二國上書謝罪贈遺甚厚初子奢行帝戒曰海夷重學卿爲講大誼然勿入其幣還當以中書舍人處卿子奢唯唯至其國爲發春秋題納其美女帝責違旨而猶愛其才以散官直國子學累轉諫議大夫弘文館學士始武德時太廟享止四室高祖崩將祔主于廟帝詔有司詳議子奢建言漢丞相韋玄成奏立五廟劉歆議當七鄭玄本玄成王肅宗歆於是歷代廟議不能一旦天子七廟諸侯五降殺以兩禮之正也若天子與子男同則間無容等非德厚游廣德薄游狹之義臣請依古爲七廟若親盡則以王業所基爲太祖虛太祖室以俟無疆迭遷乃處之於是尙書共奏自春秋以來言天子七廟諸侯五大夫三士二推親親顯尊尊爲不可易之法請建親廟六詔可乃祔弘農府君高祖神主爲大室及帝崩禮部尙書許敬宗議弘農府君廟應毀按玄成說毀廟主當廢且四海常所宗享矣舉而廢之非神理所愜晉范宣議別廟以奉毀廟之主或言當藏天府天府瑞異所舍也禮去祧有壇有墀臣皆所未安唐家宗廟共殿異室以右爲首若奉遷主納右夾室而得尊處所之禮之未絕也有詔如敬宗議然言七廟者本之子奢帝嘗詔起居紀錄臧否朕欲見之以知得失若何子奢曰陛下所舉無過事雖見無嫌然以此開後世史官之禍可懼也史官全身畏死則悠悠千載尙有聞乎

池陽令崔文康坐事櫟陽尉魏禮臣劾治獄成御史言其枉禮臣訴御史阿黨乞下有司雜訊不如所言請死鞠報禮臣不實詔如請子奢曰在律上書不實有定罪今抵以死死不可復生雖欲自新弗可得且天下惟知上書獲罪欲自言者皆懼而不敢申矣詔可子奢爲人樂易能劇談以經誼緣飾每侍宴帝令論難羣臣恩禮甚篤卒于官

張士衡瀛州樂壽人父文慶北齊國子助教士衡九歲居母喪哀慕過禮博士劉軌思見之爲泣下奇其操謂文慶曰古不親教子吾爲君成就之乃授以詩禮又從熊安生劉焯等受經貫知大義仕隋爲餘杭令以老還家大業兵起諸儒廢學唐興士衡復講教鄉里幽州都督燕王靈夔以禮邀聘北面事之太子承乾慕風迎致謁太宗洛陽宮帝賜食擢朝散大夫崇賢館學士太子以士衡齊人也問高氏何以亡士衡曰高阿那瓌之凶險略提婆之佞韓長鸞之虐皆奴隸才是信是使忠良外誅骨肉內離剝喪黎元故周師臨郊人莫爲之用此所以亡復問事佛營福其應奈何對曰事佛在清靜仁恕爾如貪憚驕虐雖傾財事之無損於禍且善惡必報若影赴形聖人言之備矣爲君仁爲臣忠爲子孝則福祚永反是而殃禍至矣時太子以過失聞士衡因是規之然不能用也太子廢給傳罷歸鄉里卒士衡以禮教諸生當時顯者承平賈公彥趙李玄植

公彥終太學博士撰次章句甚多子大隱儀鳳中爲太常博士會太常仲春告瑞太廟高宗問禮官何世而然大隱對曰古者祭以首時薦以仲月近世元日奏瑞則二月告廟告者必有薦本于始不得其時焉遷累中書舍人垂拱中博士周綜請武氏廟爲七室唐廟爲五下比諸侯大隱奏言秦漢母后稱制未有展古越禮者綜損國廟數悖大義不可以訓武后不獲已僞聽之時皆服大隱沈正不詭從有大臣體終禮部侍郎公彥傳業玄植玄植又受左氏春秋於王德韶受詩於齊威該覽百家記書貞觀間爲弘文館直學士高宗時數召見與方士浮屠講說玄植以帝闇弱頗箴切其短帝禮之不寤坐事遷巴令卒張後唐字嗣宗蘇州崑山人祖僧紹梁零陵太守父冲陳國子博士入隋爲漢王諒并州博士後唐甫冠以學行禪其家高祖鎮太原引爲客以經授秦王義寧初爲齊王文學封新野縣公武德中擢員外散騎侍郎賜宅一區太宗卽位進燕王諮議從王入朝召見初帝在太原嘗問隋運將終得天下者何姓答曰公家德業天下繫心若順天而動自河以北指搗可定然後長驅關右帝業可成至是自陳所言帝曰是事未始忘之乃賜燕月池帝從容曰今日弟子何如後唐曰昔孔子門人三千達者無子男之位臣翼贊一人乃王天下計臣之功過於先聖帝爲之笑令羣臣以春秋酬難帝曰朕昔受大誼於君今尙記之後唐頓首謝曰陛下乃生知臣叨天功爲己力罪也帝大悅遷燕王府司馬出爲睦州刺史乞骸骨帝見其

疆力問欲何官因陳謝不敢帝曰朕從卿受經卿從朕求官何所疑後唐頓首願得國子祭酒授之遷散騎常侍永徽中致仕加金紫光祿大夫朝朔望祿賜防閣如舊卒年八十三贈禮部尙書諡曰康陪葬昭陵孫齊巨歷監察御史朔方節度使終東都留守諡曰貞獻子鎰別有傳

蓋文達冀州信都人博涉前載尤明春秋三家刺史竄抗集諸生講論於是劉焯劉軌思孔穎達並以耆儒開門授業是日悉至而文達依經辯舉皆諸儒意所未叩一坐厭歎抗奇之問安所從學焯曰若人岐嶷出自天然以多問寡則焯爲之師抗曰冰生於水而寒於水其謂此邪武德中授國子助教爲秦王文學館直學士貞觀初擢諫議大夫兼弘文館學士爲蜀王師王有罪文達免官拜崇賢館學士卒宗人文懿亦以儒學稱當時號二蓋高祖於祕書省置學以教王公子文懿爲國子助教既升席公卿更相質問文懿譬曉密微遠近宗仰終國子博士

谷那律魏州昌樂人貞觀中累遷國子博士淹識羣書褚遂良嘗稱爲九經庫遷諫議大夫兼弘文館學士從太宗出獵遇雨沾漬因問曰雨衣若爲而無漏邪那律曰以瓦爲之當不漏帝悅其直賜帛二百段卒

孫倚相仕爲祕書省正字隸覆圖書多所刊定子崇義天寶末爲幽州大將以雄敢聞歷左金吾衛大將

軍遂客竊門生子從政略涉儒學有風操事李寶臣歷定州刺史封清江郡王寶臣及張孝忠妻其女兒弟也寶臣初倚任晚稍疏忌從政乃闔門謝交游不事及惟岳知節度與田悅謀拒天子命從政諫曰上神斷細諸侯欲致太平爾考與燕有切骨恨天子致討命帥莫先於燕誅怨復讎必盡力後已前日而考誅大將百餘子弟存者常不平乘危相覆誰不能爾昔魏有洛相之圍王師四集身投零陵仰天垂泣不知所出賴爾考保佑頓兵不進而先帝寬厚僅獲赦貸不然田氏尚有種乎今悅兇獍孰與承嗣爾又幼富貴不出戶庭便欲旅拒且人心難知天道難欺軍中諸將乘危投隙自古豈少哉今圖久安計莫若令而兄惟誠攝留後爾速入宿衛則福祿可保矣不納從政塞門移疾不出惟岳所信王他奴等疑其怨望日伺之從政懼乃吐血卽仰藥五日死曰吾不恨死而痛渠覆宗矣後惟岳被殺於王武陵如其揣云蕭德言字文行陳吏部郎引子也系出蘭陵明左氏春秋甫冠以國子生爲岳陽王賓客陳亡徙關中詭浮屠服亡歸江南州縣部送京師仁壽中授校書郎貞觀時歷著作郎弘文館學士太宗欲知前世得失詔魏徵虞世南褚亮及德言哀次經史百氏帝王所以興衰者上之帝愛其書博而要曰使我稽古臨事不惑者公等力也賚賜尤渥德言晚節學愈苦每開經輒被濯束帶危坐妻子諫曰老人何終日自苦答曰對先聖之言何復憚勞詔以經授晉王時許叔牙爲侍讀同勸講王爲太子德言又兼侍讀而叔牙亦

兼弘文館學士德言請致仕太宗不許下詔敦勉封武陽縣侯進祕書少監久乃得謝高宗立拜銀青光祿大夫全給其祿遣通事舍人卽家致問乘輿至蕭章門引見禮遇隆重由是晉府及東宮舊臣子孫並增秩賜金卒年九十七贈太常卿諡曰博

叔牙字延基句容人貞觀時遷晉王府參軍事弘文館直學士於詩禮尤寔獻詩纂義十篇太子寫付司經御史大夫高智周見之曰欲明詩者宜先讀此

子子儒字文舉高宗時爲奉常博士初太尉長孫無忌等議祠令及禮用鄭玄六天說圓丘祀昊天上帝南郊太微感帝明堂太微五帝直據緯爲說不指蒼旻爲天而以昊天帝當北辰耀魄寶郊明堂當太微五帝唐家祀圓丘太史所上圖昊天上帝外自有北辰令李淳風曰昊天上帝位于壇北辰斗列第二壇與緯書駁異司馬遷天官書太微宮五精之神五星所奉有人主象故名曰帝猶房心有天王象安得盡爲天乎日月麗于天草木麗于地以日月爲天草木爲地昧者不信也周官兆五帝四郊又有祀五帝皆不言天知太微之神非天也經稱郊祀后稷王肅以郊圓丘爲一玄析而二之曰圓丘曰郊非聖人意今祠令固守玄說與著式相違宜有刊正且經嚴父莫大於配天宗祀文王於明堂以配上帝明堂之祀天也星不足配之矣月令孟春祈穀上帝春秋啟蟄而郊郊而後耕故郊后稷以祈農詩春夏祈穀於上帝

皆祭天也著之感帝尤爲不稽請四郊迎氣祀太微五帝郊明堂罷大天說止祀昊天方丘既祭地又祭神州北郊皆不載經請止一祠詔曰可乾封初帝已封禪復詔祀感帝神州以正月祭北郊司禮少常伯郝處俊等奏言顯慶定禮廢感帝祀而祈穀昊天以高祖配舊祀感帝神州以元皇帝配今改祈穀爲祀感帝又祀神州還以高祖配何升降紛紛焉虞氏禘黃帝郊魯夏禘黃帝郊緜殷禘魯郊冥周禘魯郊稷玄謂禘者祭天圓丘郊者祭上帝南郊崔靈恩說夏正郊天王者各祭所出帝所謂王者禘祖之所自出以其祖配之則禘遠祖郊始祖也今禘郊同祖禮無所歸神州本祭十月以方陰用事也玄說三王之郊一用夏正靈恩謂祭神州北郊以正月諸儒所言猥互不明臣願會奉常司成博士普議於是子儒與博士陸遵楷張統師權無二等共白北郊月不經見漢光武正月建北郊咸和中議北郊以正月武德以來用十月請循武德詔書明年詔圓方二丘明堂感帝神州宜奉高祖太宗配仍祭昊天上帝及五天帝於明堂子儒長壽中歷天官侍郎弘文館學士封潁川縣男以選事委令史句直日偃臥不下筆時人語曰句直平配既而補授失序傳爲口實德言曾孫至忠自有傳

敬播蒲州河東人貞觀初擢進士第時顏師古孔穎達譏次隋史詔播詣祕書內省參纂再遷著作佐郎兼修國史從太宗伐高麗而帝名所戰山爲駐蹕播謂人曰鑿輿不復東矣山所以名蓋天意也其後果

然遷太子司議郎時初置是官尤清近中書令馬周歎曰恨資品妄高不得歷此職又與令狐德棻等譏晉書大抵凡例皆播所發也有司建言謀反大逆惟父子坐死不及兄弟請更議詔羣臣更議播曰兄弟雖孔懷之重然比於父子則輕故生有異室死有別宗今高官重爵本蔭唯逮子孫而不及昆季烏有榮隔其蔭而罪均其罰詔從播議永徽後仕益貴歷諫議大夫給事中始播與許敬宗譏高祖實錄興創業盡貞觀十四年至是又譏太宗實錄訖二十三年坐事出爲越州長史徙安州卒房玄齡嘗稱播陳壽之流乎玄齡患顏師古注漢書文繁令撮其要爲四十篇是時漢書學大興其章章者若劉伯莊秦景通兄弟劉訥言皆名家

伯莊者彭城人爲弘文館學士遷國子博士與許敬宗等論譏甚多終崇賢館學士自所著書亦百餘篇子之宏世其學武后時以著作郎兼修國史終相王府司馬睿宗立贈祕書監

景通者晉陵人與弟暉俱有名皆精漢書號大秦君小秦君當時治漢書非其授者以爲無法云景通仕至太子洗馬兼崇賢館學士暉後復踐其官及職

訥言乾封中歷都水監主簿以漢書授沛王王爲太子擢訥言洗馬兼侍讀嘗集俳諧十五篇爲太子歡太子廢高宗見怒除名爲民復坐事流死振州

羅道琮蒲州虞鄉人慷慨尚節義貞觀末上書忤旨徙嶺表有同斥者死荆襄間臨終泣曰人生有死獨
委骨異壤邪道琮曰吾若還終不使君獨留此瘞路左去歲餘遇赦歸會霖潦積水失其殯處道琮慟諸
野波中忽若溢沸者道琮曰若屍在可再沸祝已水復湧乃得屍負之還鄉尋擢明經仕至太學博士爲
時名儒

